





Bibliotheca
ori Coll. Rom.
Societ. Jesu

III . 19. h

III
8
G

III
8
G

23. 4. 6.



DE LA
PVISSANCE
LEGITIME DV
PRINCE SVR
LE PEUPLE, ET
du peuple sur le
Prince.

*Traité tres-vtile & digne de lecture en ce temps,
escrit en Latin par Estienne Iunius Bru-
tus, & nouvellement traduit
en François.*



M. D. LXXXI.

QUESTIONS EXPLIQUEES
EN CÉTRAITE.

- I. Aſauoir ſi les ſuiets ſont tenus & doyent obeir aux Princes, ſ'ils commandent quelque choſe contre la Loy de Dieu.
- II. S'il eſt loiſible de reſiſter à vn Prince qui veut enfreindre la Loy de Dieu, ou qui ruine l'Egliſe. Item à qui, comment, & iuſques où cela eſt loiſible.
- III. S'il eſt loiſible de reſiſter à vn Prince qui opprime ou ruine vn eſtat public, & iuſques où ceſte reſiſtance ſ'eſt d. Item à qui, comment, & de quel droit cela eſt permis.
- IIII. Si les Princes voiſins peuuent ou ſont tenus de droit dōner ſecours aux ſuiets des autres Princes, affligez à cauſe de la vraye Religion, ou opprimez par tyrannie manifeſte.

LES EMPEREURS THEO-
DOSE ET VALENTINIAN
à Volusian grand Preuost de
l'Empire.

C'Est vne chose bien seante à la Maieité d'un
qui domine sur les autres, de declarer qu'il
est Prince lié aux loix. Aussi nostre puissance de-
pend de l'autorité du droit. Et à la verité, c'est vne
chose plus excellente que la dignité de l'Empire
mesmes, d'assuiettir la Principauté aux loix. Sca-
noir faisons à tous, par la declaration de cestuy no-
stre Edict, cela que nous ne voulons souffrir nous e-
stre loisible. Donné à Rauenne, l'onziemes iour de
Iuin, sous le Consulat de Florent & Denis.

IVSTIN, AV SECOND LI-
VRE, PARLANT DE LY-
curgus Legislateur des Lace-
demoniens.

IL fit des loix aux Spartiates qui n'en auoyent
point: & fut autant renommé pour s'estre mon-
stré aussi diligent obseruateur, que sage inuenteur
d'icelles. Car il ne fit loy quelcōque pour les autres,
à laquelle il ne s'assuiettist le premier: dressant &
acoustumant le peuple à obeir aux Princes; & les
Princes à gouverner & commander comme il ap-
partient.

Handwritten text at the top of the page, possibly a title or header.

Handwritten text in the middle section of the page, appearing as several lines of script.

Handwritten text in the lower middle section of the page.

Handwritten text in the bottom section of the page, above the signature.

Handwritten signature or name at the bottom of the page.

P R E F A C E D E C. S V-
 P E R A N T I V S, S V R L E
 traité d'Estiene Iunius
 Brutus,

A V X P R I N C E S C H R E S T I E N S.

IE sauoy bien, Messieurs, qu'en publiant ces questions d'Estiene Iunius Brutus, touchant le vray droit & la puissance du Prince sur le peuple, & du peuple sur le Prince: il se trouueroit des gens qui m'en sauoyent mauuais gré. Car elles sont manifestement contraires aux mauuais pratiques, conseils pernicieux, fausses & pestiferes maximes de Nicolas Machiauel Florentin, lequel ils ont pour guide au gouuernement des affaires d'estat. l'estime donc qu'ils me condamneront comme audacieux (afin de mordre en quelque sorte) de ce que vous estant du tout inconnu, i'ay prins la hardiesse de vous escrire, spécialement en ce temps, de choses de si grande importance. Mais la ferme amitié & singuliere affectiō que ie porte au bien public, à quoy ie pense continuellemēt, m'ont arraché ceste peur. En apres il m'a semblé que ces disputes vous appartenoyent plus qu'à nuls autres: d'autāt qu'il n'est point ici parlé de choses legeres, mais de consequence, & necessaires d'estre bien entendues parmi tant de troubles publics. Ainsi dōc

A. iij.

vous auez maintenant vn discours, monstrant comme il faut maintenir la vraye Maiesté du Prince & des Rois, desquels vous estes descen-
dxs, & conseruer au peuple ce droit que les
bonnes loix & mœurs aprouees des nations
ont establi d'vn mesme consentement. Mes-
mes quelques vns d'entre vous, procurans que
ceste Maiesté royale & les anciens droits des
peuples fussent remis sus es Gaules, y ont mené des armées contre certaine nation, qui se
mocquant de Dieu & des hommes, appuyee
sur ruses & trahisons, a employé tout son e-
sprit, ses moyens & sa force, pour reduire en
la seruitude d'vne cruauté barbare les Gau-
lois, francs & libres de nature, & du tout no-
bles si lon considere leurs mœurs, loix & cou-
stumes anciennes. Or en la deduction de ces
Questions qui sont ici examinees, nous ver-
rons à œil ouuert l'ancienne, c'est à dire, la
parfaite effigie du gouvernement des roya-
umes, comme vne chaste, vraye & sainte ma-
trone, sans aucun fard ni desguisement: au lieu
de laquelle ces Machiauellistes ci n'ont point
honte de nous presenter vne forme d'admi-
nistration, qui est bastarde, fardée, impudique
& meschante. Ceste ancienne façon de gou-
uerner les Prouinces, Royaumes & Empires, a
esté pratiquée par vos predecesseurs, & les Prin-
ces ornez de toutes sortes de vertus royales,
l'ont diligemment obseruée toute leur vie, la
baillans de main en main les vns aux autres.

A bon

A bon droit donc faut-il que vous entendiez ce qui est discouru en ces Questions. Finalement, ie me suis persuadé, & à bon droit, qu'en vous dediant telles disputes, cela seroit cause que plusieurs les voudroyent fucilleter, pour la renommee de vostre nom & de vostre nation. Vray est que quelques vns esmeus, à cause des troubles & partialitez, seront fort curieux de sauoir que c'est. Mais tous receuront de bonne & grande affection ce liuret, à cause de l'excellente doctrine qui y est contenue, & de l'equité de la cause. Et ce dautant plus volontiers que ces Questions ont esté expliquées au long, sans desir de picquer ni favoriser vn parti plustost que l'autre : mais seulement pour monstrier la verité aux lecteurs, l'auteur ayant esté contraint de ce faire par la consideration des calamitez & ruines de la France, à ce que lon cherche quelque prompt, seur, & perpetuel remede, pour empescher que tels maux ne se voyent par ceux qui viendront apres nous. Ce qu'apperceuront aisément ceux qui liront de pres ces discours, en tel temps qu'il leur plaira, de quelque parti, nation ou cōdition qu'ils puissent estre : pourueu toutesfois qu'ils facent profession de la Religion Catholique, ou de la Romaine, ou de la reformee.

E T pourtant, comme le Seigneur Brutus, 11.

A.iiij.

gētilhomme docte & sage, deuisoit avec moy, il y a enuiron deux ans des miseres de la France: apres auoir amplement discouru de part & d'autre sur l'origine, sur les causes, commence-
mens & auancemēs d'icelles, en fin nous conclusmes, qu'entre autres causes les liures de Machiauel aiguisoient fort les esprits de certaines personnes à trouuer les moyens de troubler l'estat, en s'aidant de l'autorité de ceux qui le gouuernent. Que Machiauel auoit posé les fondemēs de la tyrannie en ces liures siens, comme il nous apparut assez par les preceptes & enseignemens detestables y semez ça & là. Qu'il n'y auoit remede plus prompt & certain que de ramener la domination des Princes & le droit des peuples à ses legitimes & certains premiers principes: que la puissance des vns & des autres seroit par ce moyē arrestee en certaines limites, sans quoy le gouuernement de l'estat ne peut subsister, & consequemment les preceptes de Machiauel doyuent estre reiettez, estans du tout aneantis par ces principes. Depuis il m'enuoya ce liure de Questions, auquel ces principes sont contenus, prouuez & bien esclaircis, afin que ie le leusse, pour puis apres luy en dire mon auis. Pour certain, le Seigneur Brutus a heureusemēt employé le tēps, n'ayant eu riē plus cher que de dresser à grand travail ces Questions pour maintenir le bien public & la Religion Chrestienne en leur entier. I'estime donc, Messieurs, que ces questions

stions fuffifent pour refuter les Machiauellistes & leurs escrits, qui par leurs conseils pernicious font cause que l'estat est diuisé en tant de dissensions ciuiles, partialitez & remuemens: & que ce sont ici comme les principes tresfermes, ou les colonnes, ou les reigles pour bien reformer l'estat, specialement en ce temps, & pour redresser & remettre en sa premiere splendeur le legitime gouuernement: qui me fait croire que ces Questions donneront grand contentement aux hommes sages & craignans Dieu.

O R combien que ie presume que quelques I I I.
Machiauellistes ou esclaués des tyrans s'esleueront contre Brutus: toutesfois dautant que ce sera à cause qu'ils craignent que leurs meschantes pratiques ne soyent descouuertes & detestées par vous, si vous daignez considerer les raisons principales de ces questions, & que vous, Messigneurs, ferez conoistre leur malice à tout le monde: à quel propos Brutus gentilhomme de bõ cœur se soucieroit-il de leurs choleres & detractions? Il a occasion de se resjouir, quand par sa diligence & estude les iniustices, meschancetez, rapines & fraudes des Machiauellistes ont esté finalement descouuertes, pour le salut euident des Rois & des peuples, qui est vne chose à quoy lon se doit employer de tout son pouuoir. S'ils disēt qu'il propose doctrine fausse, c'est à eux à le monstrier. Mais ie vous prie, par quel bout com-

menceront ils? Car tout ce qui est mis en a-
uant en ces Questions est prouué par tesmoi-
gnages expres de l'Escripture sainte, alleguez à
propos: item par les preceptes & enseignemēs
tirez de la philosophie morale, politique & na-
turelle: par les loix, par les auis des Iuriskon-
sultes, par les edits des Empereurs, par les
mœurs & coustumes de diuerses nations, selon
les notables exēples qui en sont proposez par
beaucoup d'historiens. Quant à la façon d'en-
seigner, (ie parle aux Philosophes & dispu-
teurs) pour prouuer plus clairement & certai-
nement son dire, il recueille des effects & con-
sequences les causes & maximes ou reigles,
qu'il propose aux lecteurs, & monte comme
par degrez iusqu'au plus haut de ce qu'on peut
atteindre en telles matieres: tellement qu'à la
façon des Geometres (qu'il semble auoir vou-
lu ensuiure en cela) d'un point il tire vne ligne,
d'une ligne la superficie, & d'icelle le corps en-
tier: qui est vne maniere de demōstrer & prou-
uer la plus claire & briefue qu'il est possible.
En espluchant ces Questions, il s'est porté fort
modestement, desireux de rechercher soigneu-
sement & tirer la verité comme du fond d'un
puits. Ceux qui ne la voudront regarder estant
maintenāt au iour & exposee aux yeux de tous,
sont du tout meschās: & ceux-là du tout aueu-
gles qui ne pourront voir ce que tout le mon-
de void. Ces Questions estans ainsi expliquees,
on void assez quel est & doit estre le droit &
deuoir du Prince enuers le peuple, & du peu-

ple enuers le Prince: & que ces deuoirs mutuels & reciproques sont distinguez l'un de l'autre. Item que Dieu, nature & les coustumes des peuples ont posé des bornes au Prince & au peuple: que celui qui outre passe les siennes peche griefuement cōtre Dieu, cōtre les bōnes loix, & cōtre le droit des Gents. Qu'en outre passant les bornes, l'estat tombe en cōfusion, dōt s'ensuit rupture d'alliāce ciuile & humaine: de là naist tyrannie, qui engēdre sedition, dōt procede la guerre ciuile. Au cōtraire si on estraint fermement ce liē de la societé humaine, & qu'on plante ces bornes & limites comme les Questions le mōstrent & prouuent par principes veritables & equitables: il s'ensuit que la doctrine de Machiauel, qui n'a que babil, qui est meschāte & pernicieuse au gēre humain, se ruine de soy-mesme, & ne peut subsister en sorte que ce soit. Et n'y a hōme qui luy puisse fournir assez fermes estācons pour l'appuyer & soutenir. Toutesfois, que les Machiauellistes entrent en chāpde bataille, si bō leur semble. Nous nous aiderōs de ces vrayes & legitimes armes de l'Escripture sainte, de la Philosophie morale & politique, des loix, des coustumes des peuples, & des exēples que fournissent les histoires: puis nous viēdrons hardiment aux mains cōtre eux. S'ils ne veulent iōindre, ils mōstrēt leur mauuaise cōsciēce, & cōfesseront par cela qu'ils sōt vaincus. S'ils s'excusent à cause des armes, qui toutesfois sont pour les vns & pour les autres, qu'auons-nous besoin de nous plus arrester

à eux? Nous confessons franchemēt & deuant tout le monde que nous sommes Chrestiens, & declarons ne vouloir auoir aucune acoïntance avec ceux qui refuseront ces armes, comme gens indignes de viure, & d'habiter avec les autres hōmes. Or, pource qu'ils n'ont que le tort de leur costé, & ne sauroyent rien repliquer qui vaille contre ce qui leur est opposé maintenant: peut estre qu'ils diront que ces Questîōs sont seditieuses, que les principes d'icelles sont faux, & pour toute raison voudrōt plaider à coups d'espee. Mais au contraire, puis que ces principes sont veritables, pourquoy taxeront-ils de sedition ces Questîōs? pourquoy arment-ils les satellites des Princes contre ceux qui les maintiennent? Est-ce raison que le Prince ignore ce qui est veritable? principalement en fait de consequence & qui atouche sa personne & tout l'estat? Mais voirement les Tyrans, (que ces Machiauellistes forment & enseignent si diligemment) qui compassent toutes choses selon leur seule fantaisie, sans auoir aucun esgard à l'vtilité publique, peuuent estimer que la verité n'engendre que sedition: au contraire la verité sera tenue pour vne tresexcellente vertu par le Chrestien & sage Prince enseigné & instruit par ces Questîōs.

IIII. M A I S, comme vous sauez, Messieurs, que les principes & arrests de ces Questîōs sont tresiustes: aussi tāt de vos illustres deportemens,

temens, le desir qu'avez tousiours monstré de procurer vne bonne paix, & tant de voyages qu'avez faits pour y paruenir, montrent clairement que vous aprouuez par effect ces principes. C'est donc raison, puis que ces arrests montrent le vray remede, que finalement vous ioigniez toutes vos forces pour apporter les mains & guerir les discords de ce temps, & les maux qui en sont issus. Certainement Dieu tout puissant & tout bon vous a donné tant de sagesse & bon conseil, a suscité entre vous tant de bons chefs de guerre, & iusques à present vous a enuironnez de la faueur de tant de nations, qu'il a opposé vostre constance aux ruses des Machiauellistes de nostre temps, vostre force à l'audace de nos Geans, la vertu de vostre noble famille & nation à la stupidité de ce siecle, parmi tant de troubles qui ont agité l'estat, les affaires, les Prouinces & les plus grands de la France. Vous donc, suiuant les principes de ces Questions, avez prins en main la defense du bon droit de quelques François, avez pour cest effect amassé & amené vos forces. Or ces Questions montrent que non seulement vous avez eu droit pour pouuoir faire cela, mais aussi que vous y estiez & estes tenus. Quant à nous, de bonne affectiō nous prions Dieu qu'il vous maintiene, & esperons qu'apres auoir esté honorez de tant d'entreprises & victoires Chrestienes, vous ferez establi quelque iour vne ferme paix, pour employer

à l'aide de Dieu, & par arrest commun de tous estats, (ie parle à vous tous, Princes Chrestiens) vos esprits, forces, science militaire, vertu, autorité & moyēs contre ce cruel tyran de Turquie: afin que sous vostre conduite, la Chrestienté triomphe de ce puissant & orgueilleux ennemi, à la grande gloire de Dieu, au salut de l'Eglise, & au repos de l'estat public. Nous prions tous & supplions humblement le Seigneur tout puissant & tout bon qu'ainsi auienne. De Soleurre, ce premier iour de Ianuier
M. D. LXXVII.

P R E-

15

7

P R E M I E R E Q V E -
S T I O N,

A S A V O I R S I L E S S V -

iets sont tenus & doyuent obeir aux
Princes, s'ils commandent quel-
que chose contre la Loy
de Dieu.

P E v t estre que de prime face ce-
ste Question semblera du tout su-
perflue & inutile: veu que par icel-
le il semble que lon reuoque en
doute vn axiome tenu pour trescertain entre
les Chrestiens, cōfermé par tant de tesmoigna-
ges de l'Escripture, par tāt d'exēples de l'histoi-
re de tous tēps, & par la mort de tāt de fideles
Martyrs. Car d'ou sont procedēz (dira quel-
qu'un) tant d'afflictions que les Chrestiens ont
endurees, sinon de ce qu'ils ont tousiours esté
d'avis qu'il falloit obeir à Dieu simplement &
absoluemēt, & aux Rois avec exception, c'est
asauoir entant qu'ils ne cōmandent rien con-
tre la Loy de Dieu? Autrement pourquoy les
Apostres auroient-ils respondū qu'il faut o- *Act. 4.19*
beir plustost à Dieu qu'aux hōmes? Dauātage,
puis que la seule volōté de Dieu est tousiours
iuste, & celle des hōmes peut estre iniuste bien
souuēt: qui doute qu'il ne faille tousiours obeir
à Dieu sans exception, & aux hōmes tousiours
avec quelque exception? Mais pource qu'il y a

pour le iourdhy plusieurs Princes, se disans Chrestiens, qui s'attribuent audacieusement vne puissance desmesuree & sur laquelle Dieu mesmes n'a que voir : & qu'ils n'ont pas faute de flagorneurs qui les adorent comme dieux en terre: plusieurs aussi qui par crainte, ou par autre cōtrainte semblent estre d'auis, ou mesmes estiment que lon doiue obeir aux Princes en tout & par tout. Dauātage, veu que le malheur de nostre temps est tel qu'il n'y a rien si ferme, certain & pur, que lon n'esbranle, desmente & pollue : ie crain bien que quiconque considerera le tout de bien pres, ne cōfesse ceste Question estre non seulement vrile, mais aussi du tout necessaire en ce temps. Quant à moy, lors que ie considere la cause de tant de calamitez dont la Chrestieté a esté battue depuis quelques ans, il me souuient de ce que dit *Osee* 5.10 le Prophete Osee, Les Princes de Iuda ont esté comme ceux qui transposent la borne : & pourtant ie respandray sur eux mon courroux comme eau. Ephraim souffre iniure & est cassé en iugement, pource qu'il a commencé d'aller apres le commandemēt mauuais. Vous voyez ici le peché des Princes & du peuple descrit en deux mots. Les Princes trāsposent les bornes, qui ne se contētans pas de l'autorité que Dieu tout bon & tout puissant leur a donnee, taschent d'vsurper la souueraineté qu'iceluy s'est reseruee sur tous hommes: quād ils ne se contentent pas de faire des corps & des biens de leurs

leurs suiets à leur plaisir, ains aussi se donnent licence de commander aux consciences, ce qui appartient entierement à Iesus Christ : & n'estimans pas la terre assez grâde pour eux, veulent escheller & conquerir le ciel mesme. Le peuple d'autre part suit les cōmandemens mauuais quand il s'accorde avec les Princes qui lui commandent quelque chose contre la Loy de Dieu, & par maniere de dire encense & adore ces Dieux de terre : & au lieu de leur resister, quand il en a les moyens, leur laisse vsurper la place de Dieu, & ne fait conscience de rendre à Cesar ce qui appartient à Dieu proprement. Or il n'y a personne qui ne voye cela. Si quelqu'un n'obeit à vn Prince commandant choses meschantes, incontinent il est estimé rebelle, traistre, criminel de lese Maieité. Iesus Christ, les Apostres, tous les Chrestiens de la primitive Eglise estoient chargez de telles calomnies. Si quelqu'un, à l'exēple d'Esdras ou Nehemie, se dispose pour bastir le temple du Seigneur, on dira qu'il aspire à la couronne, qu'il machine quelque nouueauté, & veut renuierfer l'estat. Puis incontinent vous verrez vn millio de marmousets & flatteurs venir corner aux oreilles des Rois, Si vne fois ce temple est rebasti, c'est fait de vostre royaume: ne pēsez plus receuoir tailles ni impôts de ces gens. Mais quelle fureur est cela? Il n'y a estats que lon doye estimer fermes, si nō ceux au milieu desquels le tēple de Dieu est basti, & qui sont

ce temple mesmes. On peut dire ceux là estre
vrayement Rois qui regnent avec Dieu, veu
que c'est par luy que les Rois regnēt. Au con-
traire quelle bestise est-ce de penser que l'estat
& le royaume ne puissent subsister, si ce tem-
ple n'est desmoli, & si Dieu tout puissant n'en
est chassé? De là procedent tant d'entreprises
tyrâniques, tant de morts malheureuses & tra-
giques des Rois, tant de ruines des peuples. Si
les flatteurs fauoyent quelle differēce il y a en-
tre Dieu & Cesar, entre le Roy des Rois & vn
simple Roy, entre le Seigneur & le vassal, quel
tribut ce Seigneur requiert de ses suiets, &
quelle autorité il donne aux Rois sur iceux
suiets: certainement tant de Princes ne s'ef-
forceroient pas de troubler le royaume de
Dieu, & n'en verroit-on pas aucuns precipi-
tez de leur throne par le iuste courroux de
Dieu, se végeant d'eux au milieu de leurs plus
grands efforts. Aussi le peuple ne seroit pas
tant foulé, pillé & saccagé. C'est donc afaire
aux Princes de sauoir iusques où s'estend leur
autorité, & aux suiets comment ils doyuent o-
beir: de peur que les vns anticipans sur vne iu-
risdiction qui ne leur appartient, & les autres
obeissans à celuy qui leur commande plus a-
uant qu'il ne faut, & respondans deuant vn
autre iuge, ne soyent chastiez. Or le but de la
question proposee, dont principalement l'E-
scripture sainte donnera la resolution, est tel
que s'ensuit.

O N

O N demande, Si les ſuiets ſont tenus d'obeir aux Rois, en cas qu'ils commandent quelque choſe contre la Loy de Dieu? c'eſt à dire, auquel des deux (Dieu ou le Roy) il faudra pluſtoſt obeir. Quand la queſtion ſera vuidee pour le regard du Roy, qu'on eſtime auoir vne puissance abſolue, elle le ſera auſſi pour le regard des autres Magiſtrats. Premièrement, l'Eſcriture ſaincte enſeigne que Dieu regne *Prouer. 8.* par ſa propre autorité, les Rois par emprunt: *Iob 12.* Dieu de par ſoy-mesme, les Rois de par Dieu: Que Dieu a vne iuriſdiction propre, les Rois ſont deleguez de luy. Il ſ'enſuit que la iuriſdiction de Dieu n'a point de limites, celle des Rois au contraire: que la puissance de Dieu eſt infinie, celle des Rois non: que le royaume de Dieu s'eſtend en tous lieux, celuy des Rois eſt compris en certains pays & conſins. Item, Dieu a créé de rien le ciel & la terre: parquoy à bon droit il eſt Seigneur & vray propriétaire de l'un & de l'autre. Tous les habitans du monde tiennent de luy ce qu'ils ont, & ſont comme ſes cenſiers & admodiataires: tous les iuges & gouuerneurs de la terre, ſont ſes beneficiers & vaffaux, & ſont tenus de prendre & reconoiſtre leur inueſtiture de luy. Brief, Dieu eſt ſeul propriétaire & ſeul Seigneur: tous hommes en quelque degré qu'ils ſoyent ſont ſes ſeruiteurs, fermiers, officiers & vaffaux, qui luy doyuent la cenſe ſelon le bien qui leur eſt ſé commis. Tant plus haut eſt leur ſiege,

B.ij.

plus sont-ils comptables : & selon qu'ils ont esté esleuez en charges honorables , plus seront-ils chargez deuant Dieu : ce que l'Eſcriture enſeigne en vne infinité d'endroits , & tous les fideles, meſmes les plus ſages Payens, l'ont touſiours ainſi reconu. La terre appartient au Seigneur , & tout le contenu d'icelle, ce dit le Roy David. Et afin que les hommes ne ſacrifient à leur charrue, la terre ne ſauroit rien produire ſans la graiſſe du ciel. Pourtant Dieu vouloit que ſon peuple luy offriſt les pre mices de tous fruits (& les Payens meſmes les ont conſacrez à leurs dieux) afin de le re-
Pſe. 24. 1 conoiſtre Seigneur & eux ſes grangiers & vigne-
Iſa. 66. 1 rons. Le ciel eſt le throne du Seigneur , & la terre le ſcabeau de ſes pieds. Et pourtant, puis que tous les rois du monde ſont deſſous ſes pieds, ce n'eſt pas merueilles ſi Dieu eſt appelle Roy des rois & Seigneur des Seigneurs : & ſi les rois ſont nommez ſes ſeruiteurs , eſtablis pour iuger & gouverner le monde en qualité de lieutenans. Par moy (ce dit la Sageſſe diuine) les rois regnent , & les Princes iugent la
Prou. 8. 15 terre. S'ils ne le font , ie deſlie le baudrier des
Iob 12. 16 rois, & mets ſur leurs reins vne ſimple ceinture : comme ſ'il diſoit, c'eſt à moy d'eſtablir les
Iſa. 2. 21 rois en leur throne, ou les en chaſſer. A l'oc-
2. Chr. 9. 8 caſion de quoy le throne des rois eſt appelle throne de Dieu. Le Seigneur ton Dieu ſoit benit, diſoit la roine de Saba au roy Salomon, qui t'a eu agreable pour te mettre ſur ſon throne, comme

comme roy, au lieu du Seigneur ton Dieu, afin
que tu faces iugement & iustice. Semblable-
ment nous lisons en vn autre endroit que Sa-^{1. Chron.}
lomon a esté assis au throne du Seigneur, ou^{29.23}
au throne du royaume du Seigneur. Avec mes-
me raison le peuple est tousiours appelé peu-^{1. Sam. 9.}
ple & heritage du Seigneur: & le Roy gouver-^{16. & 10.}
neur de cest heritage, & conducteur du peuple^{1.}
de Dieu: qui est le titre donné nommément à^{2. Sam. 6.}
Dauid, à Salomon, à Ezechias, & aux autres^{2. Rois}
bons Princes. Quant aussi l'alliance se passe^{20.5}
entre Dieu & le Roy, c'est à condition que le^{2. Chron.}
peuple soit & demeure tousiours peuple de^{1.9. & c.}
Dieu: pour monstrier que Dieu ne se despoil-^{2. Rois 11}
le point de sa propriété & possession, quand il^{2. Chron.}
baille aux rois le gouuernemēt du peuple, ains^{33.16}
les establit pour en auoir la charge & le bien
entretenir: ne plus ne moins que celuy qui
choisit vn berger pour garder ses troupeaux
demeure neantmoins tousiours maistre d'i-
ceux. Cela a esté bien conu des bons rois, Da-
uid, Salomon, Iosaphat, & autres, qui reconois-^{2. Chron.}
soient que Dieu estoit le Seigneur des royau-^{20.6}
mes & nations, & ne laissoient pas de regner:
mesmes ils regnoient tant plus heureusement
qu'ils s'employoient alaigrement au seruice
de Dieu. Nebuchadnesar, quoy qu'il fust Payē,
& puissant Empereur, a finalement reconu ce-
la: car comme Daniel l'appellaist Roy des rois,
auquel le Roy des cieux auoit donné vne puis-
sance & gloire royale sur tous autres: mais au

B. iij.



*Dan. 2.**37, & 4.**14.*

contraire, dit-il, ton Dieu, ô Daniel, est vrayement le Dieu des dieux, & le dominateur des dominateurs: donnant les royaumes à qui bon luy semble, voire aux plus chetifs du monde. Pour ceste cause Xenophon dit, qu'au couronnement de Cyrus on sacrifia à Dieu: & les auteurs profanes en plusieurs endroits magnifient Dieu tout puissant souverain Roy. Aujourd'hui au sacre des Rois & Princes Chrestiens, ils sont appelez seruiteurs de Dieu, destinez pour gouverner son peuple. Puis donc que les Rois sont seulement lieutenans de Dieu, establis au throne de Dieu par le Seigneur Dieu mesme, & que le peuple est peuple de Dieu: & que l'honneur qu'on fait aux lieutenans ne procede que de la reuerence qu'on porte à ceux qui les ont enuoyez: il s'ensuit sans difficulté qu'il faut obeir aux Rois à cause de Dieu, non pas contre Dieu, & lors qu'ils seruent & obeissent à Dieu, non autrement.

PEUT estre que les flatteurs de Cour repliqueront que Dieu a resigné toute puissance aux Rois, reseruant le ciel pour soy, & leur donnant la terre pour y regner & gouverner à leur plaisir: brief que les grands du monde ont fait partage d'empire avec Dieu. Voila vn propos conuenable à quelque vilain Cleon impudent flatteur d'Alexandre, ou au poete Martial, qui n'a point de hôte d'appeler les edits de Domitian, les edits du Seigneur Dieu. Ce propos, di-ie est digne de cest execrable Domitiā, lequel (cōme recite Suetone) voulut estre appellé Dieu & Sei-

gneur. Mais cela est du tout indigne des oreilles d'un Prince Chrestien, & de la bouche des bōs suiets. Ceste sentēce de Dieu tout puissant demeure tousiours ferme, Je ne dōneray point ma gloire à vn autre: c'est adire persōne n'aura telle puissāce, que ie ne demeure tousiours souuerain. Dieu ne se despouille iamais de sa puissāce & autorité. Il tient vn sceptre en vne main pour reprimer & rōpre la teste aux Rois qui se mutinēt cōtre luy. En l'autre il porte vne balāce pour cōtroller ceux qui n'administrēt pas iustice cōme il apartiēt. Or lō ne sauroit mōstrer pl^r certaines marques d'Empire souuerain que celles là. Que si l'Empereur en creant quelque Roy reserue tousiours la souueraineté Imperiale: ou qu'un Roy, cōme celuy de Frāce, en dōnāt le gouuernemēt ou la possēssiō d'une province à vn estrāger, ou mēmes à son frere ou à sō fils, retiēt tousiours & a vers soy les cas royaux, la conoissāce de certaines choses reseruees à sa Maiesté royale, & la souueraineté, lesquelles sont estimées de droit estre exceptées, encor que mēti on n'en ait esté faite au formulaire de l'investiture & feauté promise: à combiē meilleure raison Dieu doit-il auoir ceste souueraine puissance sur tous Rois, ses seruiteurs & officiers, veu que nous lisons en tant de passages de l'Escripture qu'il les appellera à compte, & les punira, s'ils ne s'acquittent de leur deuoir? Ainsi donc les Rois sont vassaux du Roy des Rois, investis par le glaive, qui est

Isa. 48. 11.

Pse. 2. 2.

Sapient.

6. 4.

l'enseigne de l'autorité royale, afin que par le moyen de ce glaive ils maintiennent la Loy de Dieu, conseruent les bons, exterminent les meschans: tout ainsi que nous voyons que par l'espee, le bouclier & l'estandart, celuy qui est Seigneur souuerain met ses vassaux en possession du fief, à la charge de combattre pour luy avec les mesmes armes, quand besoin sera. Or si nous considerons que c'est de vassaux, nous trouuerôs que ce qui peut estre dit d'eux conuient proprement aux rois. Le vassal reçoit le fief de son seigneur avec droit de iustice & charge d'aller en guerre. Le Roy est establi par le Seigneur Dieu Roy des rois, afin de iuger son peuple & le conseruer contre tous ennemis. Le vassal reçoit loy & conditions de son souuerain, Dieu commande au Roy d'observer ses loix & les auoir tousiours deuant ses yeux, promettant que luy & ses successeurs possederont longuement le royaume s'ils sont obeissans, au contraire que leur regne ne sera pas de duree s'ils sont rebelles au Roy souuerain. Le vassal s'oblige par serment à son Seigneur, & iure qu'il sera fidele & obeissant. Semblablement le Roy promet solennellement de commander selon le contenu de la Loy de Dieu. Bref, le vassal perd le fief s'il commet felonnie, & selon le droit perd soy-mesme tous ses priuileges. Au cas semblable le Roy perd de droit, & quelquesfois aussi de fait, son royaume, s'il mesprise Dieu, s'il complotte

1. Sam. 8,
& 9. 20

Deut. 17.
19

plotte avec les ennemis d'iceluy , & s'il com-
met felonnie contre Dieu. Cela apparoiſtra
plus clairement par la conſideration de l'al-
liance qui ſe cōtraſtoit entre Dieu & le Roy:
car Dieu faiſoit ceſt honneur à ſes ſeruiteurs
de les appeller ſes confederez. Or nous liſons
deux ſortes d'alliance au ſacre des Rois: la pre-
miere entre Dieu, le Roy & le peuple, à ce que
le peuple fuſt peuple de Dieu: la ſeconde en-
tre le Roy & le peuple , aſauoir que le peuple
obeiroit fidelement au Roy qui commande-
roit iuſtement, Nous traiterons ci apres de
ceſte ſeconde, parlons maintenant de la pre-
miere.

Q V A N D le Roy Ioas fut couronné , nous *Alliance*
liſons qu'alliance fut contractee entre Dieu, *entre*
le Roy & le peuple: ou, comme il eſt dit en vn *Dieu &*
autre endroit, entre Ioiada ſouuerain Sacrifi- *les rois.*
cateur, tout le peuple & le Roy, à ce que Dieu *2. Rois II.*
fuſt leur Seigneur. De meſme liſons nous que *2. Chron.*
Joſias & tout ſon peuple firent alliance avec *23. 16.*
Dieu. Nous recueillons de ces teſmoignages *2. Rois 23.*
qu'en paſſant telles alliances le ſouuerain Sa-
cricateur ſtipuloit au nom de Dieu , en ter-
mes expres, Que le Roy & le peuple donne-
royent ordre que Dieu ſeroit ſerui purement
& ſelon ſa volonté en tout le royaume de Ju-
da: Que le Roy regneroit tellement, qu'il laiſ-
ſeroit le peuple ſeruir à Dieu , & le contien-
droit en l'obeiſſance d'iceluy: Que le peuple
obeiroit tellement au Roy, que ce ſeroit pour

s'assuiettir premierement à Dieu. Il appert de cela que le Roy & le peuple, comme obligez à promettre, s'obligeoyent par serment solennel de seruir à Dieu auant toutes choses. Et de fait & incontinent apres auoir iuré l'alliance, Iosias & Ioas ruinerent l'idolatrie de Baal & retablirent le pur seruice de Dieu. Les points principaux de l'alliance estoient tels en somme, Que le Roy mesme & tout le peuple fussent soigneux d'honorer & seruir Dieu selon sa volonté declaree en la Loy: en quoy faisant Dieu leur assisteroit & maintiendrait leur estat. S'ils faisoient le contraire il les abandonneroit & exterminerait: comme il appert par la conference de plusieurs passages de l'Escripture. Moyses venant à mourir propose ces conditions d'alliance à tout le peuple: & à l'instant commande que la Loy, c'est à dire les articles presentez par le Seigneur soyent deposez & gardez en l'Arche de l'Alliance. Apres le trespas de Moyses, Iosué fut establi chef & conducteur du peuple de Dieu. Suiuant cela le Seigneur mesme l'admoneste de ne s'esloigner aucunement de la Loy, s'il veut auoir heureux succés en ses affaires. Iosué de sa part voulant faire entendre aux Israelites à quelle condition Dieu leur auoit donné le pays de Chanaan, si tost qu'ils y furent entrez, & apres les sacrifices deuëment paracheuez, leur la Loy en presence de tout le peuple, promettant tous biens de par le Seigneur s'ils y obeissoient,

Dent. 29.

30. 31

Dent. 31.

26.

Iosué 1.

Dent. 27.

26.

Iosué 5,

C 24.

foyent, & les menaçât de tous maux s'ils y contreuenoyent. En somme il les aſſeura de toute proſperité s'ils obſeruoient la Loy, & au contraire leur declaira par expres qu'ils ſeroyent du tout ruinez, faiſant le contraire. Auſſi toutes & quantesfois qu'ils delaſſent le ſeruice de Dieu ils ſont liurez és mains des Chaneens, & rendus eſclaues de la tyrannie. Or ceſte alliance entre Dieu & le peuple du temps des Iuges, eut vigueur auſſi du temps des Rois & fut traittee avec eux. Apres que Saul euſt eſté oinct, eſleu & du tout eſtabli Roy, Samuel parla au peuple en tels termes, Voici le Roy 1. Sam. 12. que vous avez demandé & eſleu. Dieu l'a eſtabli Roy ſur vous. Obeiſſez & ſeruez à Dieu, tant vous que voſtre Roy qui eſt eſtabli ſur vous : autrement vous & voſtre Roy perirez. Comme s'il diſoit, Vous avez voulu vn Roy, & Dieu vous a donné ceſtuy-ci. Ne penſez pas toutesſois que Dieu vueille qu'on rongne quelque choſe de ſon droit : ains ſachez que le Roy eſt obligé à obſeruer la Loy d'iceluy auſſi bien que vous, & que s'il ne le fait, meſme chaſtiment luy eſt appreſté qu'à vous : brief que Saul vous eſt donné pour Roy pour marcher deuant vous en guerre, ſelon voſtre deſir : mais à cōditiō qu'il ſuiue auſſi la Loy de Dieu.

APRES la reiection de Saul, pource qu'il n'auoit pas tenu promeſſe, David fut eſtabli Roy à meſme condition, comme auſſi le fut ſon fils Salomon. Car le Seigneur 1. Rois 2.
4. & 6. 12.

liance entre Dieu & les Rois de Iuda , qu'au-
 parauant entre Dieu & le peuple du temps de
 Iosue & des Iuges. Mais nous voyons en plu-
 sieurs endroits, que quand le peuple a mespri-
 sé la Loy , ou fait alliance avec Baal , Dieu les
 a liurez entre les mains d'Eglon , Iabin & au- *Iuges 2.*
 tres rois de Chanaan. Et comme c'est vne *24. & 4.*
 mesme alliance , aussi ceux qui l'enfraignent *2. & c. &*
 reçoquent semblable chastiment. Saul est si *9. 33.*
 audacieux de sacrifier , contreuenant à la Loy *1. Sam. 13.*
 de Dieu : & tost après sauue la vie à Agag roy *13. & 15.*
 des Amalecites , contre l'expres mandement
 du Seigneur. Pour ceste cause il est appelé re-
 belle par Samuel , & finalement est chastié de
 sa rebellion. Tu as sacrifié, luy dit-il: mais il
 valoit mieux obeir à Dieu, car obeissance vaut
 mieux que sacrifice. Tu as reietté le Seigneur
 ton Dieu: luy aussi t'a reietté, à ce que tu ne re-
 gnes plus sur Israel. Cela a esté tellement
 mainteñu du Seigneur , que les enfans de Saul
 mesme ont esté priuez du fief paternel , com-
 me luy ayant commis crime de lese maiesté &
 encouru la punition des tyrans qui affectent
 vn royaume qui ne leur appartient pas. Et
 non seulement les rois, mais aussi leurs enfans
 & successeurs ont esté priuez du royaume à
 cause de telle felonnie. Salomon se reuolte de *1. Rois 12.*
 Dieu pour seruir aux idoles. Incontinent le *53.*
 Prophete Ahia predict que le royaume sera di-
 uisé sous son fils Roboam. Finalement la pa-
 role du Seigneur est acomplie , & dix linees

qui faisoient la plus grande part du royaume quittent Roboam pour adherer à Ieroboam seruiteur d'iceluy. Pourquoy cela? dautant, dit le Seigneur, qu'ils se sont destournez de moy pour aller apres Astaroth Dieu des Sidoniens & Chamos Dieu des Moabites, &c: ie mettray aussi en pieces leur royaume. Comme s'il disoit, Ils ont violé l'alliance & n'ont pas tenu promesse: ie ne suis donc plus obligé à eux. Ils veulent amoindrir ma Maiesté: & i'amoindriray leur royaume. Encor qu'ils soyent mes seruiteurs, neantmoins ils me veulent chasser de mon royaume: mais ie les en chasseray eux-mesmes par Ieroboam qui est leur seruiteur. Depuis, pource que ce seruiteur, craignant que les dix lignees ne retournassent en Ierusalem à cause de la religion, dressa les veaux en Bethel, & donna occasion à Israel de pecher, destournant ainsi le peuple loin de Dieu: quelle fut la punition d'un vassal si ingrat enuers son Seigneur, & d'un si malheureux traistre? Premièrement son fils mourut, & en fin toute sa race iusques au dernier masle fut raclee du monde par le glaive de Baasa, suivant la sentence que luy en prononça le Prophete, pource que il s'estoit reuolté de l'obeissance du Seigneur Dieu. C'est donc la cause suffisante, proposee souuentefois aussi, pour laquelle Dieu oste au roy son fief, quand il s'oppose à la Loy de Dieu, & se destourne d'iceluy pour suiure ses ennemis, a sauoir les idoles. Et comme mesmes crimes meritent mesmes supplices, nous lisons es

histoires saintes que les Rois d'Israel & de Juda qui se sont ainsi oubliez , ont fait mesme fin, c'est à dire sont peris malheureusement.

O R combien que la forme de l'Eglise & du royaume Iudaïque soit changée , attendu que ce qui estoit auparauant enclos en Iudee peut estre estendu par tout le monde: si est-ce qu'il faut dire le mesme des Rois Chrestiens. L'Euāgile a succédé à la Loy & les Rois Chrestiens sont au lieu des Rois Iuifs. Il y a mesme alliance, mesmes conditions, mesmes chastimens si on ne les accomplit, vn mesme Dieu tout puissant vengeur de toute perfidie & desloyauté. Et comme ceux-la estoient tenus de obseruer la Loy, ceux-ci sont obligez d'adherer à la doctrine de l'Euangile, pour l'auancement duquel ils promettent tous s'employer alors qu'on les sacre & reçoit Rois. Herodes redoutant Iesus Christ, le regne duquel il deuoit auancer , & voulant le faire mourir comme s'il auoit affecté de se faire Roy au monde, perit miserablement luy mesme & perd son royaume. Iulian l'Apostat abandonne Iesus Christ pour adherer à l'idolatrie & impiété des Payens. Mais peu de temps apres il sent à sa confusion la force du bras de Christ, lequel par moquerie il apeloit Galileen. Les histoires anciennes sont remplies de tels exemples, & de nostre tēps nous n'en auōs pas faulte. Depuis quelques annes plusieurs rois enyurez de la boisson que leur a présenté la putain de Babylone, ont prins les armes, & pour

Sainct Paul maintient que d'iceluy tous magistrats ont receu leur autorité. Car combien que Dieu n'ait pas commandé en termes si expres aux Payens de luy obeir, comme il a fait à ceux qui le conoissent: si est-ce que les Payens doyuent auouer que c'est par la faueur du Dieu souuerain qu'ils regnent. Pourtant, s'il ne leur chaut de payer le tribut qu'ils doyuent à Dieu pour leur regard: au moins qu'ils n'attendent ni n'empeschét point leur Souuerain de recueillir ce qui luy est deu par des peuples qu'il leur a assuiettis: qu'ils n'anticipent ni ne s'approprient en sorte quelconque la iurisdiction Diuine. Voila le crime de lese Maiesté & de vraye tyrânie, à l'occasion dequoy le Seigneur a griefuement chastié les Rois Payens mesmes. Il faut donc que les Princes qui se veulent garentir d'un si enorme cas, distinguent leur iurisdiction d'auec celle de Dieu, voire d'autant plus soigneusement que Dieu & le Prince ont leur droit tous deux sur vne mesme terre, sur vn mesme hōme, sur vne mesme chose.

L'HOMME est composé de corps & d'ame. Dieu a formé le corps & inspiré l'ame en iceluy. Luy seul donc pouuoit s'attribuer & approprier le corps & l'ame de l'homme. Si de sa grace il a permis aux Rois d'vser des corps & biens de leurs suiets, à la charge aussi de conseruer iccux suiets: certainement les Rois doyuent penser que l'vsage leur en est tellement permis, qu'il leur est cependant defendu d'en

abuser. Premièrement, eux qui confessent tenir leur ame & vie de Dieu, comme ils sont tenus le reconnoistre, n'ont aucun tribut à imposer sur les ames. Le Roy prend cense ou tribut du corps & des choses acquises ou maintenues par le seruice & trauail du corps. Dieu principalement exige son droit de l'ame, laquelle besongne par le corps. Au tribut du Roy sont compris les fruiçts de la terre, les contributions de deniers, les autres charges reelles & personnelles. Le tribut de Dieu requiert les prieres, sacremens, predications de la pure doctrine, brief ce qu'on appelle seruice diuin tant priué que public. Ces deux tributs sont tellement diuers & distinguez, que l'un ne nuist point à l'autre: le, fisque de Dieu n'oste rien à celuy de Cesar, ains chascun a son droit tout liquidé. Mais pour dire en vn mot, qui confond ces choses, il mesle ciel & terre, & met tout sans dessus dessous. Daud a tresbien distingué cela, ordonnant des officiers pour le droit de Dieu, & des autres pour le droit du Roy. Iosaphat l'a ensuiui, establiissant certaines personnes pour le iugement de l'Eternel, & d'autres pour la iustice du Roy: c'est à dire, les vns pour maintenir le seruice de Dieu, les autres pour conseruer les droits du Roy.

Mais si vn Prince vsurpe le droit de Dieu, & s'ingere, à la façon des Geans, de vouloir escheller les cieux, il est criminel de lese Maieité au chef, comme felonnie tout ainsi que seroit

l'un

1. Chron.
26.29.

2. Chron.
9.6, &
11.

l'un de ses vassaux qui s'empareroit des droits de sa couronne, & se met en danger euident d'estre despouillé de ses estats, & ce d'autant plus iustement qu'il n'y a aucune proportion entre Dieu & vn Roy terrien, entre le Tout-puissant & vn homme mortel: au lieu qu'entre vn Seigneur & son vassal encores y auoit-il quelque rapport & conuenance. Doncques toutes & quantes fois que quelque Prince se oublie iusques là de dire en son cœur, *Isai. 14. 22.* Je monteray au ciel, i'esleueray mon throne par dessus les estoilles & seray semblable au Souuerain: mais moy au contraire, dira l'Eternel, Je m'esleueray plus haut, ie me dresseray contre toy, ie racleray ton nom, & toute ta race. Tes conseils s'en iront en fumee: mais ce que i'ay vne fois arresté demeure ferme & ne sauroit estre aneanti. Le Seigneur disoit à Pharaon, *Exod. 5. 8. &c.* Laisse aller mon peuple, afin qu'il me serue, & me face sacrifice: & pource que cest orgueilleux respond qu'il ne conoit point le Dieu des Hebreux, tost apres il perit malheureusemēt. Nebucadnezar veut qu'on adore sa statue, & se *Dan. 3. 5. & 4. 25. &c.* fait honorer cōme Dieu. Mais en peu de tēps le vray Dieu reprime l'audace effrence de ce miserable. Voulāt estre estimé Dieu il deuient beste, & extrauague par lieux deserts & escartez cōme vn asne sauuage. Iusq̃s à ce (dit le Prophete) qu'il reconoisse que le Dieu d'Israel est souuerain Seigneur de tous. Sō fils Belsasar abusé des vaisseaux sacrez du Tēple de Ierusalem,

& les fait seruir à son yurongnerie: pource dōc qu'il ne donne pas gloire à celuy qui tenoit son ame & ses conseils en main, il est tué en la mesme nuit de son festin & perd son royaume. Alexandre le grand prenoit plaisir aux mensonges des flatteurs qui l'apelloient fils de Iupiter, & soustenoyent qu'on le deuoit adorer: mais vne mort soudaine fauche les triomphes qu'il commençoit à obtenir sur le monde. Antiochus, sous couleur de pacifier & vnir ses suiets, commande à tous de laisser les Loix de Dieu, & d'obeir aux siennes. Il profane le temple des Iuifs, & pollue les autels: mais apres beaucoup de ruines, desfaites & pertes de batailles, despouillé & desnudé de forces, il meurt de regret, confessant ces maux luy estre auenus, pour auoir voulu contraindre les Iuifs à quitter leur Religion. Si nous considerons la mort de Neron, cruel meurtrier des Chrestiens, qu'il accusoit d'auoir voulu brusler Rome: la fin de Caligula, qui se faisoit adorer: de Domitian, qui se fit apeller Seigneur & Dieu: de Commodus & de tant d'autres, qui se sont voulu apropiier les honneurs deus à Dieu seul: nous trouuerons qu'ils sont tousiours & tous peris malheureusement, comme ils le meritoient. Au contraire, Traian, Adrian, Antonin le Debonnaire & autres ont fait assez dou ce fin: car encores qu'ils n'ayent pas conu le vray Dieu, au moins ont-ils permis aux Chrestiens l'exercice de leur Religion.

EN

1. Macha.
1.43.

1. Macha.
6.12,13.

EN somme, tout ainsi que les vassaux rebelles, taschans s'emparer du royaume, meritent d'estre exterminéz, & commettent felonnie par le tesmoignage de toutes loix: aussi ceux-la sont criminels en toute sorte qui ne veulent obseruer la Loy Diuine à laquelle ils sont obligez, ou qui persecutent ceux qui desirent se reigler selon icelle, sans les vouloir ouir en leurs defences. Or puis que nous voyons que Dieu inuestit les Rois de leurs royaumes, presques de mesme sorte que les vassaux sont inuestis du fief par leur souuerain, il faut conclurre que les Rois qui sont vassaux de Dieu, meritent d'estre priuez du benefice de leur Seigneur, s'ils commettent felonnie, en mesme façon que les vassaux rebelles en ce monde.

Ce que dessus presupposé, lon pourra aisément soudre nostre question. Car si Dieu tiét place de Seigneur Souuerain, le Roy de vassal: qui oseroit nier qu'il ne faille plustost obeir au Souuerain qu'au vassal? Si Dieu commande vne chose, le Roy en commande vne contraire: qui est l'orgueilleux qui voudra nommer rebelle celuy qui refuse obeir au Roy en desobeissant à Dieu? Mais au contraire, faut-il pas condamner & tenir pour vray rebelle celuy qui differera d'obeir à Dieu, ou qui obeira au Roy defendât de rendre obeissance à Dieu? Brief, si Dieu nous apelle d'un costé pour nous enrooller, & le Roy d'un autre: y aura-il homme qui ne die qu'il faut laisser le Roy,

pour seruir à Dieu? Tants'en faut donc que nous soyons tenus d'obeir à vn Roy commandant quelque chose contre la Loy de Dieu, qu'aucontraire en luy obeissant nous sommes rebelles à Dieu: ne plus ne moins que nous appellerions rebelle vn paysân, qui pour l'amour de quelque riche & vieil vassal porteroit les armes contre le Prince souuerain: ou qui aimeroit mieux obeir aux lettres d'vn iuge inferieur que d'vn superieur, aux commandemens d'vn lieutenant de prouince que du Prince, brief à la voix d'vn officier qu'à l'ordonnance expresse du Roy mesme. Faisant cela nous encourons la malediction du Prophete Michee, qui deteste & maudit au nom de Dieu tous ceux qui obeissent aux meschantes ordonnances des Rois.

*Mich. 6.
16.*

PAR la Loy de Dieu nous entendons les deux tables baillees à Moyse, dans lesquelles, comme en bornes immuables, l'autorité de tous Princes doit demeurer enclose. La premiere comprend ce que nous deuons à Dieu: la seconde, ce que nous deuons à nos prochains: brief elles contiennent Pieté & Iustice coniointe à Charité, à quoy la predication de l'Euangile ne deroge point, ains au contraire l'autorise & conferme. La premiere table est estimee la principale tant en ordre qu'en dignité. Si le Prince commande que lon coupe la gorge à quelque innocent, que lon pille, que lon face extorsion, il n'y a homme, pourueu qu'il

qu'il ait quelque peu de conscience, qui vou-
lust obeir à tel mandement. Si le Prince ayant
commis quelque crime, comme vn adultere,
parricide, ou autre telle meschanceté, veut
qu'on l'approuue, voici d'entre les Payens le do-
cte Iurifconsulte Papinian, qui reprendra en
face Caracalla, aimera mieux mourir qu'o-
beir, & combien que ce Prince cruel luy com-
mande de mentir & d'excuser le peché, le me-
naçant de mort effroyable, ne voudra pour-
tant estre faux tefmoin. Que sera-ce donc, si le
Prince nous commande d'estre idolatres? S'il
veut que nous rattachions derechef Iesus
Christ à la croix? S'il enioint que lon blasphe-
me & despise Dieu, & qu'on le chasse du ciel,
si faire se peut? y a-il pas encores plus de rai-
son de ne luy pas rendre obeissance? Disons
dauantage. Puis que ce n'est pas assez de s'ab-
stenir du mal, ains faut aussi faire le bien, au
lieu de nous encliner deuant les idoles, nous
adorerons & seruirōs le vray Dieu, selon qu'il
le nous a commandé: & au lieu de fieschir le
genouil deuant Bial, nous rendrons au Sei-
gneur l'honneur & le seruice qu'il requiert
de nous. Car nous sommes tenus de seruir
Dieu à cause de luy-mesme: mais nous hon-
norons le Prince, & aimons nostre pro-
chain, à cause & pour l'amour de Dieu.
Or si c'est mal fait d'offenser le prochain,
si c'est crime capital de s'esleuer contre le

*Il y a vn certain po-
litique de
nostre tēps
si detesta-
ble que de
auoir osé
condāner
Papiniā,
& escrire
en ses li-
ures pleins
d'erreurs
en matie-
re d'estat,
que Papi-
nian pour
n'auoir
voulu ex-
cuser le
parricide
de Cara-
calla a ap-
porté des
dōinages
irrepara-
bles aux
affaires de
l'Empire.*

Prince ; quel nom donnerons nous au for fait commis contre la Maïesté du Seigneur souverain de tous hommes ? Brief, comme c'est chose beaucoup plus griefue d'offenser le Createur que la creature, l'homme que l'image : & en termes de droit, celuy qui a blessé la propre personne du Roy, est beaucoup plus coupable que l'autre qui auroit brisé la statue d'iceluy : aussi ne faut-il douter que plus rude chastiment est préparé à ceux qui violent la premiere table de la Loy, qu'à ceux qui pechét contre la seconde, encores que l'une depende de l'autre : dont il s'ensuit, à parler par comparaison, qu'il faut encores prendre de plus pres garde à l'observation de la premiere que de la seconde.

A v resté, les exemples de nos deuanciers nous penuent aprendre le moyen qu'il faut suiure en cest endroit. Le Roy Achab, à l'instigation de sa femme Iesabel, fait tuer tous les Prophetes & seruiteurs de Dieu que lon
1. Rois 18. peut attraper. Neantmoins Abdias, maistre
4. d'hostel d'Achab cache & nourrit cent Prophetes. L'excuse est toute preste à cela. En toute obligation, tant estroite puisse elle estre, il faut tousiours excepter le Seigneur Dieu. Le mesme Achab enioint à tous de sacrifier à Baal. Elie au lieu de se refroidir en redargue plus viuement le Roy & tout le peuple, conuaincq les prestres Baalistes de leur impiété, & en fait iustice : puis en despit de la meschante & furieuse

furieuse Iefabel, & maugré ce Roy valet de sa femme, il redresse de tout son pouuoir le seruice du vray Dieu. Quand Achab luy reproche, 1. Rois 18. ce que font les Princes de nostre temps, qu'il trouble Israel, que c'est vn rebelle, vn seditionieux, titres dont lon charge ordinairement ceux qui n'en sont nullement coupables: mais c'est toy-mesme, respond Elie, qui par ton apostasie as troublé Israel ayant quitté ton Seigneur & vray Dieu, pour prendre parti avec les dieux estranges ses ennemis. C'est ainsi, & par la conduite du mesme esprit, que Sidrac, Dan. 3. 18. Misach & Abednago refusent d'obeir à Nebuchadnezar: Daniel à Darius, Eleazar à Antiochus, & infinis autres. Apres la venue de Iesus Christ, estant defendu aux Apostres de prescher l'Euangile, Iugez, disent-ils, s'il est raisonnable deuant Dieu, d'obeir plustost aux hommes qu'à Dieu. Act. 4. Suiuant cela, les Apostres ne se soucient nullemēt des pensees ni des efforts des Rois, ains s'employent à faire ce que Iesus Christ leur a commandé. Les Iuifs mesmes ne peurent souffrir que lon dressast dedans le temple de Ierusalem l'aigle d'argent & la statue de Caligula. Que fit saint Ambroise, Philo Iuif au discours de l'ambassade à Caius. lors que l'Empereur Valentinian luy commanda de bailler le temple de Milan aux Arians? Les Conseilliers & Capitaines me sont venus trouuer, dit-il, pour me faire vistement liurer le temple, disans que cela s'executoit par l'autorité de l'Empereur, pource que tou-

S. Ambroise en l'epist. 33.

tes choses sont en sa puissance. I'ay respondu à cela, que s'il me demandoit le mien, c'est adire mon heritage, mon argent, ie ne luy refuserois nullemēt ce droit là, encores que tout mon bien apartiene proprement aux pauvres: mais que les choses diuines ne sont point assuietties à la puissance de l'Empereur. Que pensons nous que ce saint personnage eust respondu, si on luy eust demandé sauoir mon s'il faut asservir aux idoles le temple vis du Seigneur? Ces exemples, & la constance d'un million de Martyrs, qui ont mieux aimé mourir qu'obeir, selon que les histoires, qui en sont pleines, le monstrent, pourroyent seruir d'une loy bien expresse.

M A I S encores n'auons nous pas faute de loy forinellement escrite. Car toutes & quantes fois que les Apostres admonestent les Chrestiens d'obeir aux Rois & Magistrats, ils exhortent premierement, & comme par fait d'auis, vn chascū de s'assuiettir au preallable à Dieu, & luy obeir premier qu'à nul autre: sans qu'on puisse trouuer en leurs escrits vn seul trait de ceste obeissance desreglee que les flatteurs des Princes exigēt des gens de petit sens.

Rom. 13. 1.

Toute ame, dit S. Paul, soit suiette aux puissances superieures: car il n'y a nulle puissance sinō de par Dieu. Il fait mention de toute ame, afin que lon ne pense qu'il vueille exempter aucun de ceste suiettion. On pouoit assez recueillir de telles paroles, qu'il faut plustost obeir à

Dieu

Dieu qu'au Roy. Car s'il obeit au Roy à cause & pour l'amour de Dieu, certainement ceste obeissance ne doit pas estre vne conspiration contre Dieu. Mais l'Apostre veut couper broche à toute ambiguité, en adioustant que le Prince est seruiteur de Dieu pour nostre bien, asauoir pour faire iustice. De cela s'ensuit ce que nous venons de toucher, c'est qu'il appert assez qu'il faut plustost obeir à Dieu qu'au seruiteur d'iceluy. Encores cela ne contente pas S. Paul: car il adiouste pour la fin, Rendez le tribut, l'honneur, & la crainte à qui ils apartiennent: comme s'il disoit ce qui fut allegué par Iesus Christ, Rendez à Cesar ce qui est à Cesar, & à Dieu ce qui est à Dieu. A Cesar, tribut & honneur: à Dieu crainte. S. Pierre dit le mesme, Craignez Dieu, honorez le Roy. Seruiteurs obeissez à vos maistres, non seulemēt aux bons & humains, mais aussi aux rigoureux. Il faut pratiquer ces preceptes selō l'ordre qu'ils sont proposez: asauoir que cōme les seruiteurs ne sont tenus d'obeir à leurs maistres, s'ils commandent quelque chose contre la volonté de Dieu: les suiets pareillemēt ne doyuent obeissance aux Rois qui leur veulent faire outrepasser la Loy de Dieu.

Matt. 22.

21.

1. Pier. 2.

17, 18.

CERTAINS garnemens obiection, Qu'es choses mesmes qui concernent la conscience il faut obeir aux Rois, & sont effrōtez iusques là de produire pour tesmoins d'une opinion si meschāte les Apostres, Sainct Pierre & Sainct Paul. Concluans de cela qu'il faut acquiescer

1. Obiection.

à tout ce que le Roy ordonnera, & embrasser
 sans repliche telle superstition qu'il luy plaira
 establi. Mais il n'y a homme, tant soit-il gros-
 sier, qui ne voye l'ineptie & impieté de telles
Rom. 13. 5. gens. Ils repliquent que S. Paul dit en termes
 expres, qu'il faut estre suiets aux Princes, non
 point seulement pour l'ire, mais aussi pour la
 conscience enuers Dieu. En opposant la con-
 science à l'ire, c'est autant comme si l'Apostre
 disoit, que l'obeissance dont il parle doit pro-
 ceder non point de crainte d'estre puni, mais
 de l'amour de Dieu & de la reuerence que tous
 sont tenus porter à sa Parole. En ce mesme
Coloss. 3. sens, S. Paul enioint aux seruiteurs de servir tel-
22. lement à leurs maistres, que ce ne soit point
 par crainte de leurs yeux ou de leurs coups,
 mais en considerant qu'ils seruent à Dieu mes-
 mes : non point simplement pour acquerir la
 bonne grace des hommes, lesquels ils peuuent
 tromper, ains pour porter la charge mise sur
 leurs espaules par celuy que personne ne sau-
 roit deceuoir. Brief, il y a manifeste difference
 entre ces deux manieres de parler, obeir pour
 la conscience, & obeir es choses qui touchent
 la conscience : autrement ceux qui ont mieux
 aimé perdre la vie par vne infinité de tourmens
 que d'obeir aux Princes qui leur comman-
 doient choses cōtraires à la volonté de Dieu,
 ne nous eussent pas enseigné ce que ceux-ci
 veulent que nous facions.

ILs ne se monstrent pas moins impudens
 en ce

en ce qu'ils ont acoustumé d'obicter à ceux ^{2. Obie-}
 qui n'ont assez d'adresse pour leur respondre, ^{ction.}
 Qu'obeissance vaut mieux que sacrifice : car il
 n'y a texte en l'Escripture sainte qu'ils con-
 fonde plus euidentement que cestuy-là, conte-
 nu en la reprehension de Samuel taxant le ^{1. Sam. 15.}
 Roy Saul d'auoir desobey au mandement de ^{22.}
 Dieu, & de sacrifier mal à propos. Si donc Saul,
 tout Roy qu'il estoit, a deu obeir à Dieu : il
 s'ensuit par toute bonne consequence que les
 suiets ne sont tenus d'obeir au Roy pour of-
 fenser Dieu. En somme, si ceux qui (à la façon
 des barbares Calcutiens) veulent que le serui-
 ce de Dieu depende de la volonté del'hom-
 me, & la Religion du bon plaisir d'un Roy,
 comme si c'estoit quelque Dieu en terre, ne
 tiennent pour assez ferme le tesmoignage de
 l'Escripture sainte : au moins qu'ils aprenent
 d'un orateur Payen qu'en tout estat public il y ^{Ciceron}
 a quelques degrez du deuoir de ceux qui y ^{au 1. lin.}
 conuersent, dont on peut conoistre ce dont ^{des Off.}
 les vns sont obligez enuers les autres : telle-
 ment que la premiere partie de ce deuoir tou-
 che les Dieux immortels, la deuxiesme concer-
 ne la patrie, la troisieme ceux qui sont de no-
 stre sang, les autres parties suiuanes de degré
 en degré nos autres prochains. Or combien
 que le crime de lese Maiesté soit atroce, tou-
 tesfois il va apres le sacrilege, offense qui tou-
 che proprement le Seigneur Dieu & son ser-
 uice : ce que les Iurifconsultes conferment, tel-
^{L. 1. ad}
^{Leg. Jul.}
^{Maiest.}
^{Digest.}

lemēt que faire effort à vn Temple est par eux
estimé plus grand crime que de cōspirer con-
tre la vie du Prince. Voila quant à la premiere
question, où nous estimons auoir satisfait à
tout homme, s'il n'est entierement despouillé
de la crainte de Dieu.

S E C O N D E Q V E- S T I O N,

A S A V O I R S I L E S T L O I-
fible de resister à vn Prince qui veut en-
fraindre la Loy de Dieu, ou qui rui-
ne l'Eglise. Item à qui, com-
ment, & iusques où cela
est loisible.

CE S T E Question de prime face semble
estre haute & difficile, en ce que n'estant
besoin d'en parler aux Princes craignās Dieu,
au contraire il y a du danger d'en battre les o-
reilles de ceux qui ne reconoissēt autre souue-
rain qu'eux-mesmes: à l'occasion dequoy per-
sonne n'en a parlé, ou si lon en a dit quelque
chose, ç'a esté comme en passant. On deman-
de de fait, s'il est loisible de resister à vn Prin-
ce enfraignant la Loy de Dieu, ou ruinant l'E-
glise, ou empeschant la restauration d'icelle.
Si nous nous en tenons au dire de l'Escripture
saincte, elle nous en resoudra. Car si tel cas a
esté

esté loisible au peuple des Iuifs (ce qu'on peut aisément recueillir des liures du vici Testament) voire mesmes si cela leur a esté enioint, ie croy que lon m'accordera qu'il faut en accorder autant à tout vn peuple Chrestien de quelque royaume & pays que ce soit.

E N premier lieu, il faut ici considerer, que Dieu ayant choisi Israel d'entre tous autres peuples, pour luy estre peuple peculier, fit alliance avec, à ce qu'il fust peuple de Dieu. Cela est escrit en plusieurs endroits du Deuteronomie. La substance & teneur de ceste alliance estoit, que tous fussent soigneux en leurs lignees, tribus & familles en la terre de Chanaan, de seruir purement à Dieu, lequel vouloit auoir vne Eglise dressée à iamais au milieu d'eux: ce que lon peut recueillir de plusieurs tesmoignages, nommément de ce qui est contenu au vingtseptiesme chapitre du Deuteronomie. Là Moyse & les Leuites, stipulans comme au nom de Dieu, assemblent tout le peuple, & luy disent, Auioirdhui, ô Israel, sois le peuple du Seigneur ton Dieu. Obeis donc à la voix d'iceluy, &c. Et Moyse dit, Quand tu auras passé le Iordain, six lignees seront en la montagne de Garizim d'vn costé, & les six autres en la montagne d'Hebal, & alors les Leuites liront la Loy de Dieu, promettans toute felicité

*Deuter. 7.
6, 6^e 14.2*

*Dent. 11.
29.*

*Iosué 5.**24. & 24.**20. & 6.*

aux obferuateurs & menaçans de toutes fortes de maux aux infraçteurs d'icelle. Et tout le peuple refpondra, Amen: ce qui fut depuis exécuté par Iofué entrant en la terre de Chanaan, & quelques iours auant fa mort. Nous voyons par cela que tout le peuple eftoit obligé à maintenir la Loy de Dieu, conseruer l'Eglife, & au contraire exterminer les idoles du pays de Chanaan: stipulation qui ne peut appartenir aux particuliers, ains feulemēt à tout le corps du peuple. A quoy aufsi femble se rapporter ce que toutes les lignees campoyent autour de l'Arche du Seigneur, afin que tous conseruaſſent ce qui eftoit commis à la garde de tous.

*Juges 19.**& 20.*

Q V A N T à l'vfage & pratique de ceste alliance, nous en pouons produire des exemples. Les habitans de Gabaa de la lignee de Benjamin forcent la femme d'un Leuite, laquelle meurt par leur violence. Le Leuite fait douze pieces du corps de fa femme, & les enuoye aux douze lignees, afin que tout le peuple enfemble efface ceſt horrible forfait commis en Iſrael. Tout le peuple ſe trouue en Maſpha & demande aux Beniamites qu'ils ayent à liurer les coupables d'un tel crime pour en eſtre chaſtiez. Iceux font refus de cela, à cauſe dequoy, du conſentement de Dieu meſmes, les eſtats du peuple ordonnent d'un commun conſentement que lon fera la guerre aux Beniamites: & par ainſi la ſeconde table de la Loy fut

fut maintenue en son autorité, aux despens & à la ruine d'une lignee entiere, qui l'auoit enfreinte en l'un de ses articles. Quant à la premiere nous en auons vn exemple tout manifeste en Iosué. Apres que les Rubenites, Gadites, & Manasseens, se furent retirez en leurs demeures deçà le Iordain, ils dresserent incontinent vn riche autel en Galiloth pres du fleuve. Cela sembloit contreuenir au mandement du Seigneur, qui defendoit de sacrifier ailleurs qu'au pays de Chanaan: & pourtant lon pouoit craindre que ceux-là ne voulussent seruir aux idoles. L'affaire ayant esté communiquee au peuple habitant delà le Iordain, on assigne les estats en Silo, où estoit l'Arche du Seigneur. Tous s'y treuuent, & le Sacrificateur Phinees fils de Eleazar est enuoyé vers les autres, pour traiter avec eux touchant ce péché commis contre la Loy. Et afin qu'ils sceussent que tout le public besongnoit en cela, lon enuoya des principaux de chasque lignee pour se plaindre que le seruice de Dieu estoit corrompu par tel artifice: que Dieu seroit irrité de telle rebellion & seroit ennemi non seulement aux coupables, ains à tout Israel aussi, comme auparauant en Beelphegor: brief que guerre ouuerte leur estoit denoncee, s'ils ne se deportoyent de telle façon de faire. Il s'en fust aussi ensuiui beaucoup de mal si ces lignees deçà le Iordain n'eussent protesté d'auoir dressé l'autel pour vn memorial seulement, que les Israe-

Iosué 22.

lites deçà & delà le Iordain auoyent tousiours fait & faisoient profession d'une seule & mesme Religion. Au reste, toutes & quantesfois qu'ils se sont monstrez lasches à maintenir le seruice de Dieu, nous voyons comme ils en ont esté chastiez. C'est la vraye cause pourquoy ils perdirent deux batailles contre les Beniamites, selon qu'il appert par la fin du liure des Iuges: car en voulant se mesler de punir vn rapt & l'outrage fait à vn particulier, ils estoient conuaincus d'ailleurs d'estre si lasches à maintenir le droit de Dieu, que tous les iours ils laissoient impunies vne infinité de paillardises corporelles & spirituelles. Il y eut donc premierement telle alliance entre Dieu & le peuple.

*Alliance
entre Dieu
& le peu-
ple.*

*2. Rois II.
17, & 23.
3.
2. Chron.
23. 16.*

O R apres que les Rois eurent esté donnez au peuple, ce pact au lieu d'estre rescindé fut renouuellé & confirmé pour iamais. Nous auons dit qu'au sacré du Roy se traitoit double alliance, asauoir entre Dieu & le Roy, & entre Dieu & le peuple: brief alliance se traitoit entre le Souuerain Sacrificateur, le peuple, (qui est nommé le premier au 23. chapitre du 2. liure des Chroniques) & le Roy. La fin d'icelle estoit que le peuple fust peuple de Dieu, c'est à dire, que ce peuple fust l'Eglise de Dieu. Nous auons monsté ci-deuant à quelle fin Dieu traitoit alliance avec le Roy. Considerons maintenant pourquoy il s'allioit aussi avec le peuple. C'est chose toute certaine que
Dieu

Dieu n'a point fait cela en vain: & si le peuple n'eust eu quelque autorité de promettre & de tenir promesse, c'estoit perdre temps & paroles de contracter alliance. Il semble donc que Dieu a fait comme les presteurs qui ont affaire à des emprunteurs non assez feables, & en font obliger plusieurs ensemble au payement d'une mesme somme, tellement que deux ou plusieurs sont liez l'un pour l'autre, & un seul pour le tout au payement du total, & le peut on demander à qui lon veut de chascun d'eux. Il y auoit danger de commettre la garde de l'Eglise à un seul homme: & pourtant Dieu s'en fie à tout le peuple. Le Roy esleué en un lieu si glissant pouuoit aisément se corrompre. De peur donc que l'Eglise ne trebuchast avec, Dieu a voulu que le peuple en respondist aussi. En la stipulation, de laquelle il s'agit, Dieu, ou (en sa place) le Souuerain Sacrificateur stipule: le Roy & tout le peuple, asauoir Israel, promettent, tous deux pour une mesme cause, & volontairement obligez ensemble. Le Sacrificateur demande s'ils ne promettent pas que le peuple sera peuple de Dieu, & qu'ils donneront ordre que Dieu aura tousiours son temple son Eglise au milieu d'eux, où il sera purement serui? Le Roy respond, aussi fait le peuple, non point separément, ains ensemble, comme les paroles en font foy, incontinent & non point par interualle, ni l'un long temps apres l'autre.

*L. mortuo.
22. D. de
fideicom.*

*L. si non
singuli. C.
si cert. pet.
l. penult.
D. de duo.
res. 2. &
3. §. 1. D.
eodem.*

*L. cum
poss. D. de
cenfib. &
ibi Do-
ctores.*

*L. cum
apparebit
D. locati.
l. si diuisa.
C. eodem.*

Nous voyons donc ici deux rees, le Roy & Israel, qui par consequent sont obligez l'un pour l'autre, & vn seul pour le tout. Par ainsi, comme quand Caius & Titius ont promis ensemble payer à Seius creancier stipulant certaine & mesme somme, chascun d'eux est obligé pour soy & pour son compagnon, & la peut-on demander entierement auquel des deux lon voudra: aussi le Roy seul, & Israel à par soy, est tenu de bien prendre garde que l'Eglise ne reçoive aucun dommage. Si l'un ou l'autre n'en tient conte, Dieu peut demander le tout auquel des deux il luy plaira, & encores plus du peuple que du Roy, en ce que plusieurs ne s'escoulent pas si aisément & ont mieux de quoy payer qu'un seul. Item, comme de deux hommes redeuables, sur tout au fisque public, l'un est tellement lié pour l'autre qu'il ne peut s'aider du benefice de diuision octroyé par la nouuelle cōstitution de Iustinian: semblablement puis que le Roy & Israel promettent de payer tribut à Dieu qui est le Roy des Rois: l'un y est obligé pour l'autre. Et comme deux rees en promesse, sur tout es contrats, dont l'obligation met les promettans en coulpe, telle qu'est ceste ci: la coulpe de l'un nuist à l'autre: tellemēt que si Israel abandonne Dieu, & le Roy n'en fait semblant, il est coupable de la reuolte d'Israel. Semblablement, si le Roy prend parti avec les dieux estranges, & non contēt d'y adherer, y attire aussi ses suiets, s'efforçant

forçant par tous moyens de ruiner l'Eglise: si Israel ne le tire de ceste fuite, s'il ne le reprime, du peché de son Roy il en fait le sié. Brief, tout ainsi qu'il y a danger que l'un de deux redevables en dissipant son bien & ne pouvant estre soluable, l'autre ne responde pour foy & pour son compaignõ, au creancier qui ne doit souffrir dommage, encores que l'un de ses debtes se soit mal gouverné: le mesme faut-il craindre d'Israel envers le Roy, & du Roy envers Israel, auenant que l'un d'eux serue aux idoles ou rompe l'alliance en quelque autre sorte, que l'un ne paye la folle enchere & soit chastié pour l'autre.

OR que la stipulation, de laquelle nous traitons maintenant soit de ceste nature, il en appert par d'autres tesmoignages de l'Escripture sainte. Saul ayât esté establi Roy d'Israel, ^{I. SAM. 12.} Samuel Sacrificateur & Prophete du Seigneur, ^{14, 25.} parle ainsi au peuple. Et vous, & vostre Roy qui est sur vous, suiuez le Seigneur vostre Dieu: mais si vous perseuerez en malice (il les taxe de malice, pource qu'ils auoyent preferé le gouvernement d'un homme à celui de Dieu) vous & vostre Roy perirez. Il adiousté puis apres la raison: car il a pleu à Dieu vous faire son peuple. Vous voyez là deux rées conioints euidentement en la stipulation de mesme chastiment. De mesmes, Aza Roy de Iuda, par le conseil du Prophete Azarie, asséble en Ierusalem tout le peuple, asauoir Iuda & Benia-

2. Chron.
15.13.

2. Rois 23.

2.

2. Chron.

4.29.

min, pour traiter alliance avec Dieu? Illec se trouuerent plusieurs des lignees d'Ephraïm, de Manassé & de Simeon, qui y estoient venus pour seruir purement au Seigneur. Apres les sacrifices faits selon la Loy, l'alliance est contractée en ces termes, Quiconque n'inuquera point le Seigneur Dieu d'Israel, soit le plus petit, soit le plus grand, qu'il meure de mort. En faisant mention du plus grand, vous voyez que le Roy mesme n'est pas exempté de la punition decernée. Mais qui pourroit châtier le Roy (car il est ici question de punition corporelle & temporelle) si ce n'est tout le peuple, à qui le Roy iure & s'oblige, ne plus ne moins que le peuple au Roy? Nous lisons aussi que le Roy Josias, maître de vingt-cinq ans, ensemble tout le peuple, traita alliance avec le Seigneur: le Roy & le peuple promettans garder les Loix & ordonnances de Dieu, comme dès l'heure, pour accomplir en quelque sorte la teneur de l'alliance, l'idolatrie de Baal fut mise bas. Si quelqu'un veut plus exactement feuilleter l'Histoire sainte, peut-estre pourra-il y trouuer encores d'autres témoignages.

MAIS à quel propos auroit esté requis le consentement du peuple, pourquoy Israel ou Iuda se seroit-il obligé d'observer la Loy de Dieu, à quelle occasion auroit-il promis si solennellement d'estre à jamais le peuple de Dieu, si lon veut nier que par mesme moyen il n'ait

n'ait eu de Dieu l'autorité & puissance de se garantir de periure & d'empescher la ruine de l'Eglise? Car dequoy seruiroit de faire promettre au peuple d'estre peuple de Dieu, s'il endure, ou s'il est tenu d'endurer que les Rois le tirent apres les dieux estranges? Si le peuple n'est autre chose que serf, pourquoy luy est-il commandé de donner ordre que Dieu soit purement adoré, si ainsi est qu'il ne puisse s'obliger à Dieu? Et s'il ne luy est loisible de tenir la main à l'entretienement de sa promesse, dirons-nous que Dieu ait fait alliance avec celuy qui n'a eu droit de promettre ni de tenir promesse? Mais au contraire en traitant alliance avec le peuple, & pourchassant cest afaire, Dieu a voulu monstrier tout ouuertement que le peuple a droit de faire, tenir, & entretenir promesse. Car si lon se moque, & si lon ne veut ouir en iustice celuy qui aura contracté avec vn esclaue ou vn fils de famille: seroit-ce pas auoir perdu toute honte d'imputer à Dieu qu'il eust voulu contracter avec celuy qui ne auroit puissance quelconque?

*L. quod at-
tinet. 32. 1
D. de reg.
iur.*

MAIS de là vient que quand les Rois ont enfreint l'alliance, les Prophetes s'adressent tousiours à la maison de Iuda & de Iacob, & à Samarie, pour les auertir de leur devoir. Outreplus ils requierent le peuple qu'il ne se deportte pas seulement de sacrifier à Baal, mais aussi qu'il brise l'idole & extermine les sacrificateurs Baalites, maugré le Roy mesme.

D.iiiij.

1. Rois 18. Pour exemple, Achab ayant tué les Prophetes
19. de Dieu, le Prophete Elie assemble le peuple,
& par maniere de dire tient les estats, tance,
reprend & redargue vn chascun. Le peuple à
son exhortation empoigne & fait mourir les
prestres de Baal. Pource que le Roy ne se sou-
cie de son deuoir, il faut qu'Israel s'acquitte du
sien, sans tumulte ni à l'estourdie, ains par au-
torité publique, les estats assemblez, & l'equité
de la cause ayant esté debatue par ordre, &
bien conue auant que mettre la main à aucu-
ne execution.

A v contraire toutes & quantes fois que
Israel a failli de s'opposer à vn Roy qui ren-
uersoit le seruice de Dieu, ce qui a esté dit des
deux redeuables, dont le mauuais mesnage de
l'vn preiudicie à l'autre, est lors auenu. Car
comme le Roy a esté puni de son idolatrie &
desloyauté, aussi le peuple a esté chastié de sa
paresse, conuiuence & stupidité : & est auenu
que les Rois ont decliné beaucoup plus sou-
uent que le peuple, d'autant que d'ordinaire
les plus grâds se moulent aux mœurs du Roy,
& le peuple se conforme à ceux qui le gouuer-
nent : brief, tous pechent plustost à l'exemple
d'un, que ce seul ne s'amende avec tous les au-
tres. Ce que nous disons paroistra encores
1. Sam. 31. mieux par exemples. Que pensons nous qui a
esté cause de la desfàite & route de l'armee de
Israel avec son Roy Saul ? Dieu chastie-il le
peuple pour les pechez du Prince ? L'enfant
est-il

est-il batu au lieu du pere ? C'est vn propos mal aisé à digerer, disent les Iurifconsultes, de soustenir que les enfans portent la peine deuee aux pechez de leurs peres. Les loix ne permettent point que quelqu'un souffre pour la meschanceté d'autrui. Or, ia n'auienne, que le iuge du monde, dit Abraham, destruisse l'innocent avec le coupable. Au contraire, dit le Seigneur, comme la vie du pere, aussi la vie du fils est à moy. Le pere ne souffrira point pour le forfait du fils, ni le fils pour le forfait du pere. La personne qui aura peché mourra. Ceste desfaite donc est-elle pas procedee de ce que le peuple ne s'opposoit pas à Saul violant la Loy de Dieu, ains luy applaudissoit lors que ce miserable Prince persecutoit meschamment les gens de bien, a sauoir Dauid & les Sacrificateurs du Seigneur?

De plusieurs autres exemples produisons en encores quelques vns. Le mesme Saul, pour agrandir les possessions de la lignee de Iuda, rompit la foy publique donnee aux Gabaoonites dès l'entree du peuple en la terre de Chanaan, & fait mourir tous les Gabaoonites qu'il peut attraper. Par telle execution Saul contreuenoit au troisieme commandement, car Dieu auoit esté tesmoin de l'accord : & au sixiesme aussi, dautant qu'il tuoit les innocens. Il falloit maintenir l'autorité des deux tables de la Loy, & est dit que Saul & sa maison ont commis ceste meschanceté. Cependant, apres la mort

de Saul, & Dauid establi Roy, le Seigneur estant enquis respond, que c'estoit ia la troisieme annce que tout le pays d'Israel estoit affligé de famine à cause de ceste cruauté, & la main du Seigneur ne cessa de frapper iusques à ce que sept hommes de la maison de Saul eurent esté donnez aux Gabaonites qui les firent mourir.

*L.crimen.
26.D.de
pœnis.*

V E V que chascun doit porter sa charge, & que nul n'est estimé successeur du crime d'autrui, pourquoy direz vous que tout le peuple d'Israel merite d'estre puni pour Saul, lequel estoit desia mort, & qui auoit (ce semble) enterré le proces quand & foy: sinon dautant que le peuple n'a tenu conte de s'opposer à vne meschanceté publique & toute aparente, quoy qu'il le deust & peust faire? Voudriez vous qu'on chastiaist quelqu'un, s'il ne l'a merité? Et en quoy a ici failli tout le peuple, sinon en ce qu'il a toleré le peché de son Roy? De mesmes, lors que Dauid commande à Ioab & aux gouuerneurs d'Israel, de nombrer le peuple, il est chargé d'auoir commis vne grande faute.

*L.Sancimus.C.de
pœnis.*

2.Sam.

24.2.

1.Chron.

21.2.

Car tout ainsi qu'Israel auoit prouoqué l'ire de Dieu en demandant vn Roy, sur la prudence duquel il sembloit apuyer son salut, semblablement Dauid s'oublloit par trop, en esperant victoire par vne grande multitude de suiets. Pource que cela est proprement (selon le dire du Prophete) sacrifier à ses filez, & encenser aux hameçons, espece d'idolatrie abominable.

*Abacus
1.16.*

ble. Quant aux gouuerneurs, voyans que cela attireroit quelque mal sur le peuple, ils resist- uent quelque peu du commencement : puis ils font ceste description comme par maniere d'acquit. Cependant tout le peuple est chastié:& non seulement Dauid, mais aussi les anciens d'Israel, qui representent tout le corps du peuple, vestent la haire & se couurent de cendres:ce qui toutesfois n'estoit auenu ni n'auoit esté pratiqué lors que Dauid se souilla d'un horrible meurtre & d'un vilain adultere. Qui ne void en ce dernier fait que tous auoyēt peché & deuoyent se repentir, & que finalement ils ont esté chastiez tous? asauoir Dauid, qui auoit irrité Dieu par inique commandement, les Gouuerneurs, qui comme Pairs & asseffeurs du royaume deuoyent s'opposer au Roy au nom de tout Israel, par leur conniuen- ce ou trop molle resistance, & tout le peuple aussi qui estoit comparu pour se faire enrool- ler. Pour le regard de Dieu, faisant en cest endroit comme vn souuerain chef & general de quelque armee, il a chastié la faute de tout le camp par vn alarme donné par tout, & par le supplice de quelques particuliers qu'il a prins entre les autres, pour tenir en bride tout le reste.

MAIS dites moy pourquoy, apres que le Roy Manasses eust pollué le temple de Ierusa- lem, nous lisons que Dieu tança non seule- ment Manasses, ains aussi tout le peuple?

2. Rois

24.4.

2. Chron:

33.10.

Iere. 15.4.

estoit-ce pas afin d'auertir Israel, l'un des respondans, que s'il ne contenoit le Roy en deuoir, ce seroit au dam de tous? Car que veut dire le Prophete Ieremie, que la maison de Iuda est asseruie aux Assyriens à cause de l'impieté & cruauté de Manasses, sinon qu'elle a esté coupable de tout cela, pour ne s'y estre pas op-

*S. August.
sur le Ps.
82.*

*Ambroise
és offic.*

posée. Pourtant S. Augustin & S. Ambroise disent, Herodes & Pilate condamnent Iesus Christ, les Sacrificateurs le liurent à la mort, le peuple en a quelque compassion, & neantmoins tous sont punis. Pourquoi cela? Dautant qu'ils sont coupables de la mort de celuy qu'ils pouuoient tirer d'entre les mains des meschans iuges & gouuerneurs. On pourroit adiouster ici plusieurs autres choses recueillies de diuers auteurs pour verification de ce que dessus, n'estoit que les tesmoignages de l'Escripture sainte doiuent suffire aux Chrestiens.

Au reste, pource que le deuoir d'un bon politique est d'empescher & preuenir le mal à venir plus que de punir le peché commis, comme les medecins prescriuent plustost vne diete pour chasser les maladies, que des remedes pour les reprimer: certainement vn peuple affectionné à la vraye Religion ne se contentera pas simplement de reprimer le Prince qui voudroit abolir la Loy de Dieu, mais aussi prendra bien garde que rien ne soit introduit qui porte nuisance par la malice & meschanceté d'iceluy, & qui par trait de temps puisse

se corrompre le pur seruice de Dieu: & au lieu de supporter les crimes commis publiquemēt contre la Maieſté diuine, il oſtera ſoigneuſement toutes les occaſions dont les perſonnes ſe pourroyent couurir pour excuſer leur faute. Nous liſons cela auoir eſté pratiqué par tout Iſrael par arreſt des eſtats de tout le peuple pour ſe plaindre à ceux de deçà le Iordain touchant l'autel qu'ils auoyent dreſſé, & par le Roy Ezechias qui fit briſer le ſerpent d'airain. Et pourtant il eſt loiſible à Iſrael de faire teſte au Roy s'il veut renuerſer la Loy de Dieu & abolir l'Egliſe: & non ſeulement cela, mais auſſi doit-il ſauoir qu'à faute de le faire il ſera coupable de meſme crime, & en portera les coups avec ſon Roy. S'il eſt aſſailli de parole, il reſiſtera de parole, ſi par armes, il prendra les armes, combatant de la langue & de la main: voire meſmes par embuſches & contremines, ſi on le veut ſurprendre, n'y ayant intereſt en guerre legitime, de combattre à deſcouuert ou à couuert: en telle ſorte que lon diſtingue touſiours ſoigneuſement le dol d'avec la perfidie laquelle eſt touſiours illicite.

Auguſt. in Iofu. iiii. 23. q. 2. Dominus. L. i. D. de dolo malo.

MAIS ie voy bien qu'on me fera ici vne obiection. Quoy, direz-vous? faudra-il que toute vne populaiſſe, ceſte beſte qui porte vn million de teſtes, ſe mutine & accoure en deſordre pour donner ordre à ce que deſſus? Quelle adreſſe y a-il en vne multitude desbri-
dec? quel conſeil & quelle prudence pour

Ce qui eſt entendu par le nō de peuple.

pouruoir aux affaires? Quand nous parlons de tout le peuple, nous entendons par ce mot ceux qui ont en main l'autorité de par le peuple, auaoir les Magistrats qui sont inferieurs au Roy, & que le peuple a deleguez, ou establis en quelque sorte que ce soit, comme conforsts de l'empire & controlleurs des Rois, & qui representent tout le corps du peuple. Nous entendons aussi les Estats, qui ne sont autre chose que l'epitome ou brief recueil du royaume, ausquels tous affaires publics se rapportent. Tels estoient les Septante anciens au royaume d'Israel, desquels le Souuerain Sacrificateur estoit comme President, & qui iugeoyent des choses de plus grande importance, ayans esté premierement prins & choisis septante testes, six de chasque lignee des douze qui estoient descendues en Egypte. Puis apres les chefs ou gouuerneurs des Prouinces. Item, les Iuges & Preuosts des villes, les capitaines de mille hommes, les Centeniers & autres qui commandoyent sur les familles: les plus vaillans, nobles & autres personnages notables, desquels estoit composé le corps des Estats, assemblez beaucoup de fois, selon qu'il appert par les mots de l'Histoire sainte. Quand il est question d'eslire le premier Roy, auaoir Saul, tous les anciens d'Israel s'assemblerent en Rama. Item, Et tout Israel fut assemble: ou, tout Iuda & Benjamin, &c. Or n'est il pas vray-semblable que tout le peuple vn
par

*1. Sam.
8.4.*

par vn se soit trouué là.

DE ce rang sont en tout royaume bien gouuerné, les Princes, les Officiers de la courōne, les Pairs, les grāds Seigneurs, les plus notables, les deputéz des Prouinces, desquels est cōposé le corps ordinaire des Estats, ou vne assēblee extraordinaire, ou vn Parlement, ou vne iournee, ou autre assemblée, selon les noms vsitez és diuers pays du monde: esquelles assemblees il faut pouruoir que la Republique ou l'Eglise ne reçoie aucun detrimēt. Or comme les officiers susnōmez sont inferieurs au Roy, aussi estans cōsiderez tous ensemble en ce corps sus mentionné ils sont ses superieurs. Car comme les Conciles de Basle & de Constance ont determiné (& bien determiné) que le Cōcile vniuersel estoit par dessus l'Euesque de Rome, tout ainsi que le Chapitre est par dessus l'Euesque, l'Vniuersité par dessus le Recteur, la Cour par dessus le President, brief celuy à qui toute vne cōpagnie dōne autorité est tousiours inferieur à la cōpagnie, encoresqu'il soit par dessus vn chascū des mēbres d'icelle: aussi est-ce vne chose hors de doute qu'Israel, qui a demādé & establi vn Roy, cōme gouverneur du public, est par dessus Saul establi à la requeste & pour l'amour d'Israel, cōme il sera dit encores plus amplement ci apres. Et pourtant, puis que l'ordre est requis en toutes choses qui requierent d'estre bien acheminees, & que cest ordre ne sauroit estre gardé parmi vn si grand nombre de

peuple : & que souuent des cas se presentent que lon ne sauroit faire entendre à vne multitude sans peril & danger pour tout le public: nous disons que tout ce qui a esté dit des priuileges octroyez & du droit commis au peuple, se doit rapporter aux officiers & deputez du royaume: que tout ce qui a esté dit d'Israel s'entend des Princes & Anciens d'Israel, à qui ces choses ont esté accordees & commises, comme aussi l'vsage l'a verifié.

1. Chron.
23.

LA Roine Athalia, apres la mort de son fils Ochozias Roy de Iuda, donna ordre de faire mourir toute la race royale, excepté le petit Ioas, qui estant encores au berceau fut sauué par la pieté & prudence de Iosaba sa tante. Athalia s'empare du gouuernement, & regne six ans sur Iuda. Peut-estre que le peuple murmuroit lors entre les dents, & n'osoit à cause du danger dire ce qu'il retenoit en sa pensee. Finalement le Souuerain Sacrificateur Ioias, mari de Iosaba, ayant fait secrettement vne ligue & coniuration avec les principaux du royaume, fait sacrer & couronner Roy son neveu Ioas aagé de sept ans. Il ne se contente pas seulement de chasser la Roine meré du throne Royal, mais aussi la fait mettre à mort, & racle incontinent l'idolatrie de Baal. Le fait de Ioias est aprouué & à bon droit: car il plaidoit pour bonne cause, & assailloit la tyrannie, non pas le royaume: la tyrannie, di-je, qui n'auoit point de titre, comme parlent les

Iurif-

Iurifconsultes modernes. Car la Loy n'appel- *Bartol. de*
 loit pas les femmes au gouvernement du roy- *Tyrānid.*
 aume de Iuda. Dauantage, ceste tyrannie e- *Dent. 17:*
 stoit en vigueur & exercice: car Athalia auoit *15.*
 par vne meschanceté du tout desbordee en-
 uahi la couronne de ses neveux, elle commet-
 toit vne infinité de maux, & qui estoit le pis a-
 uoit reietté le vray Dieu pour adorer & faire
 adorer Baal. Ainsi donc elle a esté iustement
 punie, & par celuy qui auoit legitime charge
 & autorité de ce faire. Car Ioiadas n'estoit
 point vn homme priué & particulier, ains sou-
 uerain Sacrificateur, à qui lors appartenoit la
 conoissance des causes ciuiles. En apres il a-
 uoit pour adioints les principaux du royau-
 me, les Leuites, & estoit parët & allié du Roy.
 Or quant à ce qu'il n'assemble les Estats en
 Mizpat, à la maniere acoustumee, il n'en est
 pas reprins, ni d'auoir consulté & conspiré se-
 crettement: pource que s'il eust tenu quelque
 autre procedure, l'affaire n'eust pas bien succe-
 dé, ains s'en fust allee au vent. Vne coniura- *Bartol. au*
 tion est bonne ou mauuaise, selō que la fin où *traité des*
 elle vise est bonne ou mauuaise, & selon aussi *Guelfes*
 que sont affectionnez ceux qui la font. Nous *& Gibel-*
 disons donc que les Princes de Iuda ont bien *lins,*
 fait, & qu'en suiuant vne autre procedure ils
 eussent mal fait. Car tout ainsi que le tuteur
 doit prendre garde que les biens de son pu-
 pille ne deperissent, & s'il n'en tient conte, on
 luy en peut demander & faire rendre conte

aussi ceux à la garde desquels le peuple s'est
 commis, & qu'il a constituez ses tuteurs &
 procureurs, doiuent le maintenir sain &
 entier avec tous ses droits. En somme,
 comme il est loisible à tout vn peuple de
 faire teste à la tyrannie, aussi les princi-
 paux d'un royaume, representans le corps
 du peuple, peuuent comme chefs, & pour
 le bien de tout le corps, se liguier & asso-
 cier ensemble. Et comme ce qui est fait en
 public par la plus grande part est attribué
 à tous: aussi faut-il dire que tous ont fait,
 ce que la meilleure part des principaux a
 fait: brief, que tout le peuple y a mis la
 main.

*Ylp. l. 160.
 D. de reg.
 iuris.*

*Asauoir si
 une par-
 tie du roy-
 aume peut
 résister.*

M A I S il se presente ici vne autre que-
 stion, laquelle merite d'estre considerée &
 amplément debatue pour la circonstance du
 temps. Posons le cas que quelque Roy vueil-
 le abolir la Loy de Dieu ou ruiner l'Egli-
 se: que tout le peuple ou la plus grande
 part y consente: que tous les Princes, ou
 le plus grand nombre d'iceux, face sem-
 blant de rien: que ce pendant vne petite
 poignée de peuple, asauoir quelqu'un des
 Princes & quelques Magistrats vueillent
 conseruer la Loy de Dieu entiere & in-
 uiolable, & seruir purement au Seigneur:
 que sera-il loisible de faire, si le Roy veut
 contraindre ceux-ci d'estre idolatres, ou
 leur veut oster l'exercice de la vraye Reli-
 gion?

gion? Nous ne parlons point ici des priuez & particuliers confidez vn par vn, & qui ne font estimez parties du corps entier, comme les aix, les cloux, les cheuilles ne font parties d'un baſteau: ni les pierres, cheurons, la blocaille, ne font parties d'une maiſon: mais nous parlons de quelque ville ou Prouince, qui face vne portion du royaume, comme la prouë, la poupe, la carene & autres telles parties font le baſteau: le fondement, le toict, les murailles font la maiſon. Nous parlons auſſi du Magiſtrat qui gouuerne ceſte ville ou Prouince. S'il faut combattre par exemples, encores que nous en ayons peu *Exẽples.* en main, à cauſe de la nonchalance des hommes quand il eſt queſtion de maintenir le ſeruice de Dieu: toutesſois ſi en auons nous quelques vns, que nous propoſons, pour eſtre poſez & receus ſelon qu'ils le meritent.

L O B N A , ville des Sacrificateurs, ſe *Lobna.* ſouſtrait de l'obeiſſance de Ioram, Roy de *Iofué 21.* Iuda, & quitte ce Prince, pource qu'il auoit abandonné le Dieu de ſes peres, lequel *13.* ceſte ville vouloit ſeruir, & peut-eſtre crai- *1. Chron.* gnoit auſſi qu'on ne la contraignit de ſacri- *6. 57.* fier à Baal. *2. Chron.* *21. 10.*

S E M B L A B L E M E N T, alors que le Roy Antiochus commanda que tous les Iuiſs adheraſſent à ſa religion, & quittaſſent
E.ij.

Mathathias.

celle que Dieu leur auoit enseignee, Mathathias respond, Nous n'obeirons point, & ne ferons rien contre nostre Religion. Il ne se contente pas de parler, mais aussi estant espris du zeile de Phinees, il tue de sa propre main le Iuif qui contraignoit ses citoyens de sacrifier aux idoles, puis il prend les armes, se retire aux montagnes, amasse des troupes, & fait la guerre contre Antiochus pour la religion & pour la patrie, avec tel succes, qu'il regaigne Ierusalem, rompt & aneantit la force des Payens amassez pour ruiner l'Eglise, & restablit le pur seruice de Dieu. Si nous considerons Mathathias, il estoit pere des Machabees de la lignee de Leui: tellement qu'il ne luy estoit loisible, selon le droit de sa race, de preseruer le royaume de la tyrannie d'Antiochus. Ceux de sa troupe estoient gens refugiez aux montagnes, avec les habitans de Modin, auxquels s'estoient ioints les Iuifs voisins & autres acourus de diuers endroits de Iudee, qui desiroyēt le restablissement del'Eglise. Presques tous les autres, voire les principaux, obeissoient à Antiochus, mesmes après la route de son armee, & que ce tyran fust mort miserablemēt, encores qu'il y eust lors belle occasion de secouer le ioug, les Iuifs allerent chercher le fils d'Antiochus & le prierent de s'emparer du royaume, promettans luy estre obeissans & fideles. Je pourroye ici mettre en auant l'exemple de

Debora.

Debora. Le Seigneur Dieu auoit asserui Israel à la-

à Iabin Roy de Chanaan, & ceste seruitude auoit ia duré l'espace de vingt ans, ce qui auoit acquis aucunement prescription de droit sur le royaume, ioint aussi que presque tout Israel seruoit aux dieux estranges. Les principales & plus puissantes lignees, asauoir, Ruben, Ephraim, Beniamin, Dan, Aser & quelques autres adheroyent à Iabin. Ce nonobstant la Prophetesse Debora, qui iugeoit Israel, fait prendre les armes aux lignees de Zabulon, de Nephtali & d'Issachar, ou du moins à quelques vns de ces lignees sous la conduite de Barac, met en route Sisara lieutenant de Iabin, deliure Israel, qui n'y pensoit pas & estoit content de demeurer esclau, & l'arrache de dessous le ioug des Chananeens, puis remet sus le seruice du vray Dieu. Mais dautant que Debora semble auoir eu vne vocation extraordinaire: que l'Ecriture n'approuue pas en termes expres le fait de ceux de Lobna, encores qu'en se taisant elle semble le trouuer bon: & que l'histoire des Machabees n'a pas eu grande autorité en l'Eglise ancienne: & que lon dit communément qu'il faut prouuer son dire par loix & tesmoignages, non point par exemples: examinons par le fait ce qu'il faut iuger selon le droit en la matiere dont est question.

No vs auons dit, que le Roy iuroit de garder la Loy de Dieu, & promettoit, autant que ses moyens se pourroyent estendre de maintenir l'Eglise: que le peuple d'Israel, consideré

en vn corps, faisoit la mesme promesse à Dieu, stipulant par le Souuerain Sacrificateur.

O R nous disons maintenant que toutes les villes, & tous les magistrats d'icelles villes, qui sont parts & portions du royaume, promettoient chascun d'eux pour son regard, & en termes expres faire le mesme: ce que toutes villes & communautéz Chrestiennes ont fait aussi, encores que ç'ait esté sans parler. Iosué estant fort vieil & prochain de la mort, assemble tout Israel en Sichem en la presence de Dieu, c'est à dire deuant l'Arche de l'Alliance du Seigneur qui estoit là. Il est dit que les Anciens du peuple, les chefs des lignees, les Iuges & gouverneurs, & tous ceux qui auoyent quelques charges publiques es villes d'Israel s'y trouuerent, où ils iurerent d'observer la Loy du Seigneur, & accepterent volontairement le ioug de Dieu tout-puissant. Dont il appert assez, que ces Magistrats s'obligerent au nom des villes & communautéz qui les enuoyoyent de donner ordre que Dieu seroit serui par tout le pays selon ce qu'il auoit declairé par sa Loy. Quant à Iosué, ayant contracté ceste sainte Alliance entre Dieu & le peuple, & dressé acte de tout ce qui s'estoit fait, pour memorial perpetuel de la chose, eleua incontinent vne pierre. S'il faut faire
venir

Iosué 24.

*Iosué 24.
25.*

venir l'Arche du Seigneur, on appelle les principaux du pays & des villes, les Capitaines, les Centeniers, les Preuosts & autres, par le decret & mandement de Dauid & de la Synagogue d'Israel. S'il est question de bastir vn temple au Seigneur, on obserue le mesme. Et afin que lon ne pense quelque changement estre suruenu apres la creation des Rois, du temps de Ioas & de Iosias, lors qu'il fut question de renouueller l'Alliance entre Dieu & le peuple, tous les Estats s'y treuuent, & tous sont astraits & obligez particulièrement. Aussi non seulement le Roy, mais le Royaume: & non seulement tout le Royaume, mais aussi toutes les parties du Royaume promettent chascune pour soy fidelité & obeissance à Dieu. Je di derechef que non seulement le Roy & le peuple, mais aussi toutes les villes d'Israel & leurs Magistrats s'obligent à Dieu, & luy faisans vn hommage lige s'astreignent d'estre siens à iamais enuers & contre tous. Pour preuue de ce que dessus ie prie le lecteur de fueilletter diligemment l'Histoire sainte, specialement és liures des Rois & és Chroniques.

P O U R esclaireir encores mieux cela, prenons vn exemple de ce qui est auourd'huy en vsage. En l'Empire d'Allemagne, quand il faut couronner l'Empereur,

E.iiij.

*Exemple
de ce que
dessus en
l'Empire
d'Aléma-
gne.*

les Electeurs & Princes de l'Empire, tant laics qu'Ecclesiastiques, s'y trouuent en personne, ou y enuoyent leurs ambassadeurs. Les Prelats, Comtes, Barons, & tous les deputez des villes Imperiales y viennent aussi, avec mandement special. Lors ils font hommage à l'Empereur, ou pour eux-mêmes, ou pour ceux qu'ils representent, avec & sous certaines conditions. Or maintenant, presupposons qu'un de ceux-là qui a fait hommage volontairement tasche puis apres de degrader l'Empereur, pour se mettre en sa place: que les Princes & Barons denient à leur Souuerain le secours & tribut qu'ils luy doiuent, & que mesmes ils s'entendent avec l'autre qui conspire pour se emparer du throne Imperial: estimez-vous que ceux de Strasbourg ou de Nuremberg, qui ont obligé leur foy au legitime Empereur n'ayent droit de reprimer & forclorre ce brigand-là? Mais au contraire, s'ils ne le font, s'ils ne donnent secours à l'Empereur en telle necessité, pensez-vous qu'ils ayent satisfait à leur promesse? veu que celuy qui n'a conserué son gouuerneur, lors qu'il auoit moyen de ce faire, doit estre tenu aussi coulpable que celuy qui a commis la violence.

*L. 3. l. om-
ne delict.
§. ult. D.
de remil.*

Si ainsi est (comme chascun le reconoit assez) est-il pas loisible à ceux de Lobna & de Modin, & leur deuoir leur enioint-il pas d'en faire autant, si les autres Estats du royaume ont

ont delaiſſé Dieu, au ſervice duquel ils conoiſſent eſtre obligez de ſe ranger? Imaginons donc quelque Ioram ou Antiochus qui aboliffe la vraye Religion, qui s'eſleue par deſſus Dieu: qu'Israel diſſimule & en ſoit content: que doit faire la ville qui deſire ſervir purement à Dieu? Premièrement, elle doit dire avec Iofué, Quant à vous autres, regardez à qui vous aimez mieux obeir, ou au vray Dieu, ou aux dieux des Amorrheens. De ma part, moy & ma famille ſervirons au Seigneur. Choiffez, di-ie, ſi vous voulez obeir en ceſt endroit à ceſtuy-ci qui ſans droit quelconque uſurpe vne puiffance qui ne luy appartient nullement: de moy, quoy qu'il en doive auenir, ie garderay ma foy à celuy à qui ie l'ay promiſe. Ie ne doute nullement que Iofué n'eut fait tous ſes efforts de conſerver le ſervice du vray Dieu en Thamnath Serath ville d'Ephraim, où eſtoit ſon bien & ſa maiſon, ſi tous les Israelites enſemble ſe fuſſent oubliés iuſques là de vouloir adorer le Dieu des Amorrheens en la terre de Chanaan.

Iofué 24.

15.

Iofué 19.

50.

M A I S ſi le Roy paſſe outre, & enuoye des lieutenans qui nous contraignent d'eſtre idolatres, & s'il nous commande de chaſſer Dieu du milieu de nous, fermerons nous pas la porte au Roy & à ſes officiers pluſtoſt que chaſſer hors de noſtre ville le Seigneur

10. Collat.
de forma
fidei. &
c. 1. de no-
ua fide l.
form.

Dieu qui est le Roy des Rois? Que les bourgeois & citoyens des villes, Que les Magistrats & gouverneurs du peuple de Dieu demeurant és villes considerent ici qu'ils ont traité deux alliances & fait deux sermens. La premiere & la plus ancienne avec Dieu, à qui le peuple a iuré d'estre son peuple: la seconde & prochaine ensuiuante avec le Roy, à qui le peuple a promis obeissance comme à celuy qui est gouverneur & conducteur du peuple de Dieu. Ainsi donc, comme si vn Viceroy coniurant contre son souuerain, encores que il eust receu vne tresgrande autorité, s'il nous sommoit de luy liurer le Roy qu'il tiendrait assiegé dans l'enclos de nos murailles, il ne faudroit pas luy obeir, ains luy resister par tous moyens selon la teneur de nostre serment de fidelité: semblablement, estimons que c'est vne meschanceté du tout detestable, si à l'appetit d'un Prince, qui est vassal & seruiteur de Dieu, nous chassons Dieu habitant au milieu de nous, ou le liurons, entant qu'en nous est, és mains de ses ennemis.

V o u s direz, peut-estre, Que les villes apartiennent au Prince. Et moy, ierespon, que les villes ne consistent point en monceau de pierres, ains en ce que nous appellons peuple: Que le peuple est peuple de Dieu, auquel

auquel il est obligé premierement, & secondement au Roy. Quant aux villes, combien que les Rois ayent puissance sur icelles, toutesfois le domaine en appartient aux citoyens & bourgeois. Car tout ce qui est en vn royaume est bien sous la domination du Roy, mais non pas de son patrimoine. Dieu à la verité est seul Seigneur propriétaire de toutes choses, & c'est de luy que le Roy tient son domaine, & le peuple son patrimoine. C'est donc à dire, repliquerez vous, que pour le fait de la Religion il sera loisible aux suiets se reuolter de l'obeissance du Roy. Si lon accorde vne fois cela, sera-ce pas ouurer la fenestre à rebellion?

*Senec. li.
7. de be-
nef. c. 6. 7.
&c.*

OR escoutez ici patiemment, & considererez la chose de pres. Je pourrois respondre en vn mot, s'il faut de deux choses en faire l'vne, qu'il conuient plustost se destourner du Roy que de Dieu : ou, avec saint Augustin, au quatriesme liure de la Cité de Dieu, chapitre quatriesme, & au liure dix-neufuiesme, chapitre vingtvniensme, Que là où il n'y a point de iustice, il n'y a point de Republique. Qu'il n'y a point de iustice, quand l'homme mortel veut arracher l'homme d'entre les mains de Dieu, pour le rendre esclau du Diable, puis que iustice est vne vertu qui rend à chascun ce qui luy appartient:

*L. 5. D. de
cap. mi-
nus.*

& que ceux qui se soustrayent de telles dominations se garantissent de la tyrannie des malins esprits, & abandonnent vne multitude de brigands, non pas la Republique. Mais, pour reprendre le propos de plus haut, ceux qui se porteront comme dit a esté ci dessus, ne semblent nullement estre accusables du crime de reuolte. Ceux là quittent le Roy ou la Republique, qui d'un cœur ennemi se soustrayent de l'obeissance du Roy ou de la Republique : au moyē dequoy ils sont tenus pour aduersaires, & souuent sont beaucoup plus à craindre que tous autres ennemis. Mais ceux dōt nous parlons n'ont rien qui approche de cela. Premièrement ils ne refusent point d'obeir, moyennant qu'on leur commande ce qu'ils peuuent de droit, & que ce ne soit chose contre l'honneur de Dieu. Ils payent volontiers les tailles, peages, dons, & charges ordinaires, moyennāt que cela n'abolisse point le tribut qu'ils doyuent à Dieu. Ils obeissent à Cesar, tandis qu'il commande en qualité de Cesar : mais quand Cesar pāsse ses limites, quand il veut vsurper vne domination qui n'est pas siene, quand il tasche d'enuahir le throne de Dieu, quād il fait la guerre au Seigneur Souuerain de luy & du peuple, eux estimēt que ce n'est pas raison d'obeir lors à Cesar. En apres, à proprement parler, ils ne font point d'actes d'hostilité. C'est estre ennemi, quand on irrite, quand on pro-
uoque

uoque autrui, quand de gayeté de cœur on dresse & cōmence les parties de la guerre. Eux ont esté agacez, assaillis par armes descouuertes & par trahisons: la mort les enuironant de toutes parts ils prennent les armes, & parent aux coups qu'on leur tire. Vous n'avez pas paix avec les ennemis quād vous voulez: car si vous posez les armes, si vous cessez de guerroyer ils ne se desarmeront pas pourtant pour se reposer du premier coup. Mais quant à ceux-ci, desirez la paix & vous l'avez: cessez de frapper, ils quittent la place & les armes: cessez d'assaillir Dieu, ils ne voudront plus combattre. Voulez vous leur tirer les armes des poings? abstenez vous seulement de les frapper. Puis qu'ils ne iettent pas les coups ains les reçoüyēt, rengainez l'espee, ils ietteront incontinent le bouclier à terre: ce qui est cause que bien souuent ils sont surprins par embusches & perfidie, cōme les exemples de nostre temps le monstrent assez. Or comme on n'appellera pas fugitif le seruiteur qui met la main au deuant de l'espee dont son Seigneur le veut frapper, qui se tire arriere & se cache pour euitier la main de son maistre lequel est en furie, qui ferme la porte de sa chambre sur foy, iusques à ce que la cholere soit refroidie: moins encores doit on estimer seditieux ceux là qui (tenans nom & place de seruiteurs & suiets) ferment les portes d'une ville à leur Prince transporté de courroux, estans prests de faire ce qu'il leur commande-

ra, apres s'estre repenti & auoir reprins son bon sens.

1. Sam. 21.

22.

2. Sam.

25. 28.

I L faut mettre en ce rang Dauid chef de l'armee d'Israel sous Saul roy furieux. Dauid opprimé de calomnies & faux blâmes, aguetté de toutes parts, se retire & conserue es montagnes inaccessibles, & s'appreste pour opposer les murailles de Ceila à la fureur du Roy. Mesmes il attire à son parti tous ceux qu'il peut, non pas pour oster la vie à Saul, comme il est bien aparû puis apres, ains pour conseruer la siene. Voila pourquoy Jonathan fils de Saül ne fait difficulté de traiter alliance avec Dauid, & la renouueller de fois à autre: ce qui est appelé l'Alliance de l'Eternel. Et Abigail dit en termes expres, que Dauid est assailli à tort, & qu'il fait la guerre de Dieu. Il faut aussi mettre en

1. Macha.

6. 60, &c.

ce rang les Machabees qui ayans beau moyen de faire la guerre, reçoquent la paix du Roy Demetrius & d'autres, qu'Antiochus leur auoit offerte auparauant: pource que la Religion leur demeuroit sauue. Nous auons souuenance que ceux qui de nostre temps ont combatu pour la vraye Religion contre l'Antechrist, en Alemaigne & en France, ont posé les armes si tost qu'on leur a permis de seruir purement à Dieu, & souuent ayans autant de moyens de s'auancer, & continuer la guerre à leur auantage, comme eurent Dauid & les Machabees, quand les Philistins contraignirent
Saul

Saul de quitter Dauid pour penser ailleurs, & que les ennemis voisins qu'Antiochus voyoit fondre sur ses bras l'empeschoyent de poursuivre les Machabees. Voila donc les marques qui distinguent & separēt assez ceux dont nous parlons d'auecques les rebelles.

M A I S voici encores vn autre tesmoignage bien euident de leur bon droit, c'est qu'ils se soustrayent tellement, que si tost que la cause de ce despart est leuee, & si quelque extreme necessité ne les empesche, ils retournent à leur premier estat. Lors il faut dire qu'ils ne se sont pas soustraits arriere du Roy ni arriere de la Republique:ains qu'ils auoyent quitté Ioram, Antiochus, & en somme la tyrannie & puissance illegitime d'un seul, ou de plusieurs particuliers, qui n'auoyent autorité ni droit de commander comme ils commandoyent. Les docteurs de Sorbonne nous ont aprins cela maintesfois, dequoy nous alleguerons ici quelques exemples. Enuiron l'an mil trois cens, le Pape Boniface huitiesme se vouloit approprier les Regales appartenantes au Roy de France. Philippe le Bel, lors Roy, le tança bien rudement, & luy escriuit des lettres bien aspres, de telle teneur, P H I L I P P E , par la grace de Dieu Roy des François, à Boniface soy disant Souuerain Euesque, peu ou du tout point de salut. Soit auertie ta grande folie & esgaree temerité qu'aux choses temporelles nous n'auons

*Annales
de France.
Registres
de la chābre des
comptes à
Paris.*

que Dieu pour superieur, & que les vacquans de quelconques Eglises & prebendes nous appartient de droit royal, & que c'est à nous d'en percevoir les fruits, & nous defendre au tranchant de l'espee contre tous ceux qui nous en voudroient empescher la possession: estimans fols & sans ceruelle ceux qui pensent autrement. En ce tempslà tous reconoissoient le Pape pour vicaire de Dieu en terre, & chef de l'Eglise vniuerselle: tellement que (comme on dit) l'erreur commun estoit au lieu de loy. Ce neantmoins, la Sorbonne estant assemblee & enquisse, fit respõse, que sans danger ni coulpe de Schisme, le Roy & le royaume pouuoit s'exempter de ce que le Pape demandoit & le luy refuser tout à plat: pource que ce n'est point la separation, mais la cause qui fait le Schisme. Et que s'il y auoit Schisme, ce seroit seulement se separer de Boniface, non point de l'Eglise ni du Pape, & qu'il n'y auoit offense de demeurer ainsi, iusques à tant que quelque homme de biẽ seroit esleu Pape. Chascun fait en quelle perplexité tomberoyent les cõsciencies de tout vn royaume, qui se tiendroyent pour separees de l'Eglise, si ceste distinction n'estoit vraye. Je demande maintenãt, s'il n'est pas encores plus loisible d'vser de ceste distinction, quand vn Roy enuahira les droits de Dieu & opprimerà de dure seruitude les ames rachetees par le sang de Iesus Christ? Adiouſtons vn autre exemple. L'an mil quatre cens & huit, comme
le Pape

le Pape Benoist treziesme greuaſt l'Egliſe Gal-
 licane par tributs & exactions, le Clergé con-
 uoqué par le Roy Charles ſixieſme , arreſta,
 Que le Roy & les habitans du royaume ne de-
 uoyēt point obeir à Benoist, qui eſtoit vn he-
 retique, ſchiſmatique, & du tout indigne de ſa
 dignité: ce que les Eſtats du royaume aprou-
 uerent , & le Parlement de Paris le conferma
 par arreſt. Le meſme Clergé ordonna auſſi
 que ceux qui auoyent eſté excommuniez par
 ce Pape, comme deſerteurs & ennemis de l'E-
 gliſe, ſeroient promptement absous, iugeant
 nulle toute ceſte excommunication:choſe qui
 a eſté non ſeulement pratiquée en Frâce, mais
 ailleurs auſſi, comme les hiſtoires en font foy.
 Ce qui ſert pour faire toucher au doigt & voir
 à l'œil , que ſi celuy qui tient lieu de Prince ſe
 gouuerne mal, on peut ſe ſouſtraire de luy ſans
 eſtre coupable de reuolte:& que ce ſont cho-
 ſes directement contraires de quitter vn Pape
 qui ne vaut rien, & l'Egliſe: vn Roy meſchant
 & le royaume. Pour reuenir à ceux de Lobna,
 ils ſemblent auoir ſuiui l'expedient ſuſmen-
 tionné : car apres le reſtabliſſement du ſerui-
 ce de Dieu , nous voyons qu'ils ſont mis au
 nombre des ſuiets du Roy Ezechias. Et ſi ce-
 ſte diſtinction à lieu quand vn Pape eniambe
 ſur les droits de quelque Prince qui le reco-
 noit ſon ſouuerain, eſt-elle pas beaucoup plus
 receuable, ſi le Prince qui eſt vaſſal en ceſt eſ-
 gard, s'efforce de raurir & ſ'aproprier les droits

de Dieu? Concluons donc pour la fin de ce propos que tout le peuple, par l'autorité de ceux qui ont les droits entre les mains, ou par plusieurs d'eux, peuuent & doyuent reprimer le Prince qui commande choses contre Dieu. Item, que tous, ou du moins les principaux des prouinces & villes, sous l'autorité des principaux Magistrats, establis premierement de Dieu, puis du Prince, peuuent selon le droit empeschier que l'idolatrie n'entre en l'enclos de leurs murailles, & y maintenir la vraye Religion: dauantage peuuent estendre les confins de l'Eglise, qui n'est qu'une: à faute dequoy, s'ils le peuuent faire ils sont criminels de lese Maiesté diuine.

*Asavoir si
les particu-
liers qui
sont per-
sonnes pri-
uees peu-
uent resister
par ar-
mes.
L. sent. 7.
§. i. d.
quod cu-
iusque v-
niuers.*

IL reste maintenant, que nous parlions des particuliers, qui sont personnes priuees. Premierement, les particuliers ou personnes priuees ne sont point tenus de prendre les armes contre le Prince qui les voudroit contraindre d'estre idolatres. L'alliance entre Dieu & tout le peuple, qui promet estre peuple de Dieu, ne les astraint point à cela: car tout ainsi que ce qui est deu à tout le corps vniuersel, n'est point deu aux particuliers: aussi ce que doit le corps n'est pas deu par les particuliers. En apres, leur deuoir ne les y oblige point: car chascun est tenu de seruir Dieu en la vocation à laquelle il est appelé. Or les particuliers n'ont point de puissance, ils n'ont point de charge publique, ils n'ont

n'ont domination quelconque, ni aucun droit de desgainer l'espee. Et pourtant, comme Dieu n'a point mis le glaive en la main des particuliers, aussi ne requiert il pas d'eux qu'ils le facent trancher. Il leur est dit, Remets ton *Matt. 26:* espee au fourreau. Au contraire, l'Apostre dit ^{52.} des Magistrats, Ils ne portent pas le glaive *Rom. 13. 4* sans cause. Si les particuliers le desgainent, ils sont coupables: si les Magistrats sont paresseux à le desgainer, quand il en est temps, ils commettent vne grand' faute. Mais vous me direz, Dieu a-il pas fait alliance avec les particuliers aussi bien qu'avec le general? avec les plus petis autant qu'avec les Magistrats? A quel propos a-il ordonné la Circoncision & le Baptisme? que veut dire ceste frequente repetition de l'alliance en tant de passages de l'Escripture sainte? Tout cela est vray, mais la consideration en est diuerse en toutes sortes. Car tout ainsi que tous les suiets d'un bon Prince, en quelque degré qu'ils soyent, sont tenus luy obeir: mais quelques vns d'entre eux ont un deuoir particulier en cela, comme les Magistrats qui doyuent procurer que les autres obeissent: semblablement tous hommes sont tenus de seruir à Dieu, mais les vns avec leur plus haut estat ont aussi receu plus grande charge, tellement qu'ils sont comptables de la faute des autres, s'ils ne veillent soigneusement. Les Rois, les

F.ij.

communautez du peuple, les Magistrats à qui tout le corps a mis le glaive en main, doyuent prendre garde que l'Eglise soit maintenue: les particuliers doyuent seulement donner ordre d'estre membres de ceste Eglise. Les Rois, Estats du peuple, & Magistrats sont obligez d'empescher que le Temple du Seigneur ne soit pollué ou ruiné, & le doyuent garantir de toute corruption & iniure au dedans & au dehors. Les particuliers doyuent procurer que leurs corps, temples de Dieu, soyent nets, afin que le saint Esprit y habite. Car si aucun viole le Temple de Dieu (vous estes ce temple, dit l'Apostre) Dieu le destruira. A ceux est baillé le glaive, lequel ils portent au costé: à ceux est recommandé le glaive de l'esprit seulemēt, asavoir la Parole du Seigneur, duquel Saint Paul arme tous Chrestiens contre les assaux du Diable.

1. Cor. 3.
17. & 6.
19.

Ephes. 6.
17.

Q V E feront donc les particuliers, si le Roy les veut contraindre de servir aux idoles? Si les Magistrats, entre les mains desquels le peuple a consigné son autorité, ou, si les Magistrats des lieux ou demeurent ces particuliers, s'opposent à cela, qu'eux obeissent à leurs conducteurs, & employent tous leurs moyens, comme servans à Dieu, pour aider les saintes & louables entreprises de ceux qui s'opposent legitimement au mal. Entre autres ils ont les exemples des Centeniers & gensdarmes qui ont alaigremēt obei aux Princes

ces de Iuda, lesquels incitez par Ioiadas, purgerent l'Eglise de toute profanation, & garantirent le royaume de la tyrannie d'Athalia. Mais si les principaux & les Magistrats applaudissent à vn Roy furieux, ou s'ils ne luy résistent point, il faut prester l'oreille au Conseil de Iesus Christ, c'est à sauoir se retirer ailleurs. Ils ont l'exemple des fideles meslez Matt.10, 23. parmi les dix lignees d'Israel, lesquels voyans le seruice du vray Dieu aboli par Ieroboam, & 2.Chron. 11.13, & 15.9. que personne n'en faisoit semblant, se retirent en Iuda, où la Religion estoit demeurée en sa pureté. S'ils n'ont moyen de s'enfuir ailleurs, qu'ils renoncent plustost leur vie que Dieu: qu'ils soyent plustost crucifiez, que de crucifier Iesus Christ, comme en parle l'Apostre. Ne Heb.6.6. Matt.10. 28. craignez point (dit nostre Seigneur) ceux qui peuuent seulement tuer les corps. Luy mesmes, ses Apostres, & infinis Martyrs Chrétiens, nous ont enseigné cela par leur exemple.

Ne sera-il donc permis à aucun particulier de résister avec les armes? Que dirons-nous de Moïse, qui emmena Israel, malgré le Exod. 12. &c. Roy Pharaon? Et de Ehu, qui au bout de dix huit ans, & lors que le royaume sembloit appartenir par droit de prescription à celuy qui Iuges 3. 16. s'en estoit emparé, tua Eglon Roy de Moab, 2.Rois 9. & deliura Israel du ioug des Moabites? Et de Iehu, qui mit à mort son Seigneur le Roy Io-

ram, extermina la race d'Achab, racla tous les prestres de Baal? Ceux là estoient-ils pas particuliers? Je respon, que si on les considere en eux-mesmes, on les pourroit nommer particuliers, dautant qu'ils n'auoyent point de vocation ordinaire. Mais puis que nous sauons qu'ils ont esté extraordinairement appelez, & que Dieu luy mesme leur a (s'il faut ainsi parler) mis son espee en la main, tant s'en faut que nous les estimions particuliers ou personnes priuees, que mesmes nous les esleuerons beaucoup plus que les Magistrats ordinaires en quelque degré qu'ils puissent estre. La vocation de Moyse est aprouuee par l'expresse Parole de Dieu & par miracles trespseuidens. Il est dit de Ehuah que Dieu l'a suscité pour tuer le tyran & deliurer Israel. Quant à Iehu, il fut oinct par le commandement du Prophete Elizee, afin d'exterminer la race d'Achab, outre ce que les principaux le saluerent Roy, auant qu'il executast aucune chose. On en peut autant dire de tous autres dont les exemples sont proposez en l'Escripture sainte. Mais dautant que Dieu ne parle point de sa bouche, ni extraordinairement par des Prophetes, c'est en ceci que nous deuons estre bien retenus & sur nos gardes. Car si quelqu'un pensant estre inspiré du saint Esprit, s'attribue l'autorité susmentionnee, ie le prie de se bien sonder & voir s'il n'est point enflé d'arrogance,

rogance, prendre garde qu'il ne soit Dieu à foy-mesme, & ne concevoir de sa teste telle opinion de foy. Qu'il ne conçoive donc point de vanité, s'il ne veut enfanter mensonge. Que le peuple aise de son costé, qu'en desirant guerroyer sous l'enseigne de Iesus Christ il n'aille se rendre à sa confusion en l'armée de quelque Theudas Galileen ou de Barcozba, comme il en a prins aux payfans & aux Anabaptistes de Munstre en Allemagne, en l'an mil cinq cens vingt cinq. Je ne veux pas dire pourtant, que ce mesme Dieu qui pour chastier nos pechez nous enuoye en ces derniers temps des Pharaons & des Achabs, ne puisse quelquesfois susciter extraordinairement des liberateurs à son peuple. Certainement sa iustice & sa misericorde demeurent fermes & immuables en tout temps. Or si ces miracles visibles n'aparoissent pas comme autresfois, il faut pour le moins que par les effects nous sentions que Dieu besongne miraculeusement en nos cœurs: c'est que nous ayons vn esprit vuide de toute ambition, vn vray & ardent zele, droite science & conscience, de peur qu'estans guidez d'erreur ou d'ambition, nous ne seruions aux idoles ou à nous-mesmes plustost qu'au vray Dieu.

A v resté, pour oster tout scrupule, il faut necessairement respondre à ceux qui estiment ou veulent qu'on pense qu'ils sont en

F.iiij.

Si les armes prises pour la Religion sont utiles.

Exod. 20.
25.
Dent. 27.
5.
1. Rois 6.
7.

ceste opinion que l'Eglise ne doit estre defendue par les armes. Ils disent dōc que non sans grand mystere Dieu auoit defendu en sa Loy de polir l'autel avec ferrement. Item, qu'au bastiment du temple de Salomon, lon n'entendit aucun bruit de scie ni de marteau de fer: dont ils recueillent que l'Eglise, qui est le temple vis du Seigneur, ne doit point estre reformee par armes. Voire, comme si les pierres de l'autel & du temple auoyent esté coupees & tirees sans instrument de fer hors de leurs perrieres, ce que le texte de l'Escripture esclaircit assez. Mais si nous opposons à ceste belle allegorie ce qui est escrit au quatriesme chapitre du liure de Nehemie, qu'une partie du peuple portoit le mortier, l'autre portoit les armes: & quelques vns tenoyent d'une main l'espee, & de l'autre portoyent des materiaux aux ouuriers pour rebastir le Temple, afin d'empescher par tel moyen que les ennemis ne troublassent l'œuvre. Ils ne vouloyent pas bastir à coups d'espee, mais ils vouloyent empescher avec les armes la ruine de leur ouurage. Nous disons aussi que l'Eglise ne s'avance ni ne s'edifie point par les armes materielles, mais que par icelles armes elle est garantie de la violēce des ennemis qui ne peuvent souffrir qu'elle se avance. Brief qu'il y a eu vn nombre infini de bons Rois & Princes, comme les histoires en font foy, qui par les armes ont maintenu le service de Dieu contre les Payens.

O N replique incontinent à cela , que telles armes ont esté aprouuees sous la Loy: mais que depuis la grace apportee par Iesus Christ, qui n'a point voulu entrer en Ierusalem sur quelque braue cheval, ains monté sur vn asne, il semble que ceste procedure ait prins fin. Je respon premierement, que tous sont d'accord avec moy que Iesus Christ en tout le temps qu'il a conuersé au monde n'a point fait office de iuge ni de Roy , ains de ree & d'homme priué & simple particulier: tellement que c'est vne allegation hors de propos de dire qu'il n'a point manié les armes. Mais ie demanderois volontiers à tels repliqueurs , s'ils pensent qu'à la venue de Iesus Christ les Magistrats ayent perdu le droit du glauiue ? S'ils le disent, Sainct Paul les desment, lequel dit que le Magistrat ne porte point le glauiue sans cause, & ne refuse pas leur assistance & main forte contre la violence de ceux qui auoyent machiné sa mort. Et s'ils s'accordent au dire de l'Apostre, pourquoy les Magistrats porteront ils le glauiue, sinon afin de seruir à Dieü qui les en a armez, pour garder les bons & punir les mauuais ? Sauroyent-ils faire meilleur seruice que de garantir son Eglise de la violence des meschans , & deliurer la bergerie de Iesus Christ du glauiue des meurtriers ? Je leur demande encores, s'ils estiment que tout port d'armes soit defendu aux Chrestiens ? S'ils le disent, Pourquoy donc Iesus Christ accorde-

*Rom. 13. 4**Act. 23.*

17.

Matth. 8. il au Centenier sa requeste? pourquoy luy rend
9. 13. il vn si excellent tesmoignage? Pourquoy
Luc 3. 14. Iean Baptiste commande-il aux gensdarmes
 de se contenter de leurs gages sans faire aucune
 extorsion, & ne leur conseille point de quitter
Act. 10. ceste vocation? Pourquoy saint Pierre
44. 48. baptise-il Corneille le Centenier, qui fut les
 premices des Gentils? d'où vient qu'il ne le
 exhorte en sorte que ce soit de laisser sa charge? Or si
 porter les armes & faire la guerre est vne chose
 licite, en sauroit-on trouuer vne plus iuste que
 celle qui est entreprinse par le commandement du
 Superieur pour la defense del'Eglise & pour la
 conseruation des fideles? Y a-il plus grande
 tyrannie que celle qui se exerce contre l'ame? Sauroit-on
 imaginer guerre plus louable que celle qui reprime
 vne telle tyrannie? Pour le dernier point, ie
 saurois volontiers de telles gens, s'il est defendu
 aux Chrestiens de faire guerre en sorte ni pour
 quelque occasion que ce soit? S'ils disent que
 cela est defendu: d'où vient donc que les
 gensdarmes, Capitaines & Centeniers, qui
 n'ont autre chose à faire qu'à manier les
 armes, sont receus en l'Eglise? Pourquoy les
 Anciens docteurs & historiographes font-ils
 tant honorable mention de certaines legions
 composees entierement de Chrestiens, entre
 autres de celle de Malte, tant renommee pour
 la victoire qu'elle obtint, & de celle de
 Thebes, de laquelle saint Maurice estoit
 general,

neral, qui souffrit mort avec toutes ses trou-
pes pour la confession du nom de Iesus
Christ? Et s'il est permis de guerroyer (com-
me, peut-estre, ils le confesseront) pour gar-
der les limites d'une Prouince & repousser
l'ennemi: est-ce pas chose plus raisonnable
de prendre les armes pour conseruer les gens
de bien, reprimer les meschans, & garder les
limites de l'Eglise, qui est le Royaume de Je-
sus Christ? S'il estoit autrement, à quel propos
sainct Iean eust-il predict que la putain de Ba- *Apoc. 17.*
bylone sera finalement exterminée par les dix ^{16.}
Rois qu'elle aura enforcellez? Outreplus, si
nous prenons autre resolution, que dirons
nous des guerres de Constantin contre Ma-
xentius & Licinius, celebrees par tant de ha-
rangues publiques & aprouuees par le tesmoi-
gnage d'infinis hommes doctes? Quelle opi-
nion faudra-il auoir des voyages faits par les
Princes Chrestiens contre les Turcs & Sara-
fins pour conquerir la terre Saincte, & qui
n'ont eu ou n'ont deu auoir autre but sinon
d'empescher que les ennemis ne ruinaissent le
Temple du Seigneur, ou ne retardassent le pa-
racheuement d'iceluy?

COMBIEN donc que l'Eglise ne s'auance
point par les armes, toutesfois on la peut ius-
tement conseruer par le moyen des armes.
Je di dauantage, que ceux qui meurent en vne
guerre si saincte ne sont pas moins martyrs de

Iesus Christ que leurs freres qui ont esté executez à mort pour la Religion. Qui plus est, ceux qui meurent en guerre semblent auoir cela de plus, que de leur franche volonté & sachans assez en quel hazard ils se vont mettre, neantmoins s'exposent courageusement aux coups, au lieu que les autres se sont simplement offerts à la mort qu'il leur conuenoit souffrir. Les Turcs s'efforcent d'auancer leur opinion par le moyen des armes: & s'ils subiuignent vn pays, ils y introduisent par force les impietez de Mahumet, lequel en son Alcoran a si fort recommandé les armes, qu'il n'a pas honte de dire que c'est le droit chemin de paradis, encores que les Turcs ne contraignent personne. Mais celuy est beaucoup plus grand aduersaire de Christ & de la vraye Religion, avec tous les Rois qu'il a enchantez, qui opposent le feu à la lumiere de l'Euangile, les tortures à la parole de Dieu, les armées equippees au glaive de l'Esprit, contraignans par gehennes & supplices, entant qu'en eux est, toutes personnes d'estre idolatres: & qui au reste n'ont point de honte de maintenir & auancer leur foy par perfidie, & leurs traditions par continuelles trahisons. Au contraire, les bons Princes & Magistrats se defendent, qui enuironnent & munissent de tout leur pouuoir la vigne de Christ, ia plantée, ou à planter es lieux où elle n'a encores esté, de peur que les sangliers n'y fassent quelque rauage: ils font
cela,

cela, di-ie, en couurant sous leur bouclier & gardant par leur espee ceux qui par la predication de l'Euangile ont esté conuertis à la vraye Religion, & en fortifiant de toute leur adresse par ruelins, fossez & rempars le temple de Dieu basti de pierres viues,iusques à ce qu'il soit paruenu à sa iuste hauteur, maugré les assaux furieux des ennemis. Nous auons entendu le propos iusques ici, afin de ne laisser aucun scrupule à personne sur la question proposée. Donques, les Estats,tous officiers d'un Royaume,ou la pluspart,ou chascun d'eux, & tous autres establis en charge par tout le peuple, sachent que s'ils n'arrestent en ses limites le Roy qui corrompt la Loy de Dieu, ou qui empesche le reestablissement d'icelle, offensent griefuement le Seigneur avec lequel ils ont traité alliance. Ceux d'une ville ou d'une Prouince, faisans portion de Royaume, sachent qu'ils attirent sur eux le iugement de Dieu, s'ils ne chassent l'impieté hors de leurs murailles & confins, si le Roy l'y veut introduire,ou s'ils different de conseruer en toutes sortes la pure doctrine, encores que pour un temps il faille se retirer ailleurs. Finalement, les particuliers doiuent estre auertis que rien ne les sauroit excuser, s'ils obeissent à celuy qui leur commande d'offenser Dieu : & qu'au reste ils n'ont aucun droit & ne peuuent de leur autorité priuee prendre les armes, s'il n'appert trespuidemment qu'ils ayent voca-

tion extraordinaire. Or nous estimons auoir
suffisamment confirmé tout ce que dessus par
tesmoignages de l'Escriture sainte.

TROISIÈME QUES- TION,

A SA VOIR S'IL EST LOI-
sible de resister à vn Prince qui opprime
ou ruine vn Estat public, & iusques où
ceste resistance s'estend. Item à qui,
comment, & de quel droit
cela est permis.

POVR CE qu'il nous faut ici disputer de
la legitime autorité du Prince, ie tien
pour certain que ceste question ne face mal
au cœur des tyrans & mauuais Princes. Car ce
n'est de merueilles si ceux qui pensent que
tout ce qu'ils veulent leur soit permis, ne peu-
uent en sorte que ce soit donner audience à
raison ni à loy quelconque. Mais i'espere que
les bons Princes auront ce discours pour a-
greable, veu qu'ils fauent que tout Magistrat,
tant haut esleué puisse-il estre n'est autre cho-
se qu'une loy animee & parlante. Et si lon
gratte la rongne aux mauuais, les bons ne s'en
tourmenteront pas, veu que l'estrille ne les
touche point. Les tyrans & les Rois sont direc-
tement

Ettement opposez & contraires , comme sont les meschans & iustes Princes: au moyen de quoy , tant s'en faut que ce qui est dit contre les tyrans denigre en rien les Rois, qu'au contraire plus les tyrans sont avilis , plus la gloire des Rois apparoist magnifique : & blasmer les vns c'est louer les autres. Quant aux tyrans, qu'ils disent & pensent ce que bon leur semblera, ie ne m'en donne point de peine: car ce n'est pas à eux ains contre eux que i'escris. Pour le regard des Rois, ie me persuade qu'ils consentiront à ce qui est proposé, veu qu'ils doiuent hair les tyrans & meschans dominateurs autant que les bergers , les Medecins & les Prophetes hayssent les loups , les empoisonneurs & les faux docteurs. Car il faut necessairement que la raison engendreés Rois vne haine contre les tyrans non moins ardante que celle que nature a imprimee és chiens contre les loups: veu que les vns vivent de rapt , & les autres sont nez & empeschés pour repailler toutes rapines. Peut-estre que les flatteurs des tyrans fronceront le sourcil , au lieu que ce leur seroit chose trop mieux seante de le baisser & de rougir de honte. Je sçay que les amis & fideles seruiteurs des Rois aprouueront & feront accueil à ce discours , & ne craindront de maintenir ce qui y est contenu. Selon donc que le lecteur se trouuera esmeu de

ioye ou de despit en lisant, qu'il sache que ce sont les marques de la haine ou de la faueur qu'il porte aux tyrans. Entrons maintenant en matiere.

*Le peuple
fait les
Rois.*

Nous auons monstré ci deuant, que c'est Dieu qui institue les Rois, qui les eslit, qui leur donne les Royaumes. Maintenant nous disons, que c'est le peuple qui establit les Rois, qui leur met les sceptres és mains, & qui par ses suffrages aprouue leur election. Dieu a voulu que cela se fist ainsi, afin que les Rois reconnussent que c'est du peuple; apres Dieu, qu'ils tiennent toute leur souveraineté & puissance: & pourtant que cela les induisist de rapporter toute leur sollicitude & adresse au profit du peuple, sans estre si outrecuidez de pëser qu'il y ait quelque naturel excellët & extraordinaire en eux à raison dequoy ils ayent esté esleuez par dessus les autres, comme si c'estoyët quelques troupeaux de moutons ou haras de bestes à corne: mais qu'ils se souuinssent & conussent estre de mesme paste & condition que les autres, esleuez de terre par les voix & comme sur les espaules du peuple iusques en leur thronne, pour porter puis apres la pluspart des charges de la Republique.

QUELQUES centaines d'annees auant que le peuple d'Israel demandast vn Roy, Dieu auoit fait la loy du gouuernement royal, contenue au dixhuitiesme chapitre du Deuteronomie. Quand tu viendras (ce dit Moyse) en la terre

terre que le Seigneur ton Dieu te donne, & que tu la possederas, tu diras, l'establi ray vn Roy sur moy comme les peuples circonuoifins. Lors tu constitueras pour Roy celuy que le Seigneur ton Dieu aura choisi du milieu de tes freres, &c. Vous voyez ici que l'election du Roy est attribuee à Dieu, l'establissement au peuple. Or quand c'est venu à la pratique de ceste Loy, voici comme lon y a procedé. Les Anciens d'Israel, qui representoyent tout le corps du peuple (sous ce nom d'Anciens sont compris les Capitaines, les Centeniers, Cinq-^{1. Sam. 8. 5} quanteniers, Dixeniers, Iuges, Preuosts, mais principalement les chefs des lignees) viennent trouuer Samuel en Rama, & ne pouuans plus souffrir d'estre gouuernez par les fils de Samuel, qui se portoyent mal en leurs charges, estimans aussi auoir trouué vn expediét pour faire la guerre avec plus d'auantage à l'auenir, ils demandent vn Roy à Samuel, lequel inter-^{1. Sam. 9. 16.} rogue la bouche du Seigneur qui declaire auoir esleu Saul pour gouuerner le peuple. Ain si donc Samuel oinct Saul, & tout ce que dessus appartient à l'election du Roy faite à l'instance du peuple. Or peut cela sembler suffire, si Samuel eust amené au peuple le Roy esleu de Dieu, & les eust admonnestez tous d'estre bons & obeissans suiets. Neantmoins, à ce que le Roy sache qu'il est establi par le peuple, Samuel assigne les Estats à Maspha, où estans assemblez, comme si la chose eust esté entiere,

G. j.

& comme n'y ayant rien de fait, brief comme
 1. Sam. 10. si l'election de Saul n'estoit encores conue, &
 17. &c. qu'il n'en fust aparu chose aucune, le sort est
 ietté qui tombe sur la lignee de Beniamin,
 puis sur la famille de Metri, & finalement sur
 Saul, né de ceste famille, qui estoit celuy mes-
 me que Dieu auoit esleu. Alors du consente-
 ment de tout le peuple, Saul, dit l'histoire, fut
 1. Sam. 11. nommé Roy. Finalement, afin que Saul ou au-
 14. tre n'attribue tout ce que dessus au sort, apres
 que Saul eut fait quelque preuue de sa valeur
 en deliurât ceux de Iabes assiegez par les Am-
 monites: quelques vns du peuple pressans cest
 afaire, il fut derechef confirmé Roy deuant le
 Seigneur en Galgal par tous les États d'Israel.
 Vous voyez que celuy que Dieu auoit esleu,
 que le sort auoit séparé de tous les autres, est
 establi Roy par les suffrages du peuple.

1. Sam. 16. E T quant à Dauid? Par le commandement
 de Dieu, & d'une façon plus euidente que de-
 uant, apres la reiection de Saul, Samuel oignit
 pour Roy d'Israel Dauid esleu par le Seigneur.
 Quoy fait l'Esprit de Dieu abandonne incon-
 tinent Saul, & besongne d'une façon speciale
 en Dauid. Mais Dauid ne regna pas pourtant,
 ains fut contraint se sauuer és deserts & ro-
 chers, se trouuant souuentefois comme à vn
 pas pres de sa ruine, & n'est Roy regnant que
 apres la mort de Saul: car lors par les suffrages
 de tout le peuple de Iuda, il fut premierement
 esleu Roy de Iuda, & sept ans apres du con-
 sen-

sentement de tout Israel, il fut sacré Roy d'Israel en Hebron. Ainsi donc il est oinct premierement par le Prophete, selon le commandement de Dieu, en signe qu'il estoit esleu, *2. Sam. 2.* secondement, par le commandemēt du peuple, lors qu'il fut establi Roy : & ce afin que les Rois se souuient tousiours que c'est de par Dieu, mais par le peuple & à cause du peuple qu'ils sont esleuez en leurs thrones : & qu'on ne dise point (cōme lon fait coustumierement) qu'ils ne tiennent le Royaume que de Dieu & de l'espee, mais qu'on y adioust que ç'a esté le peuple qui premierement leur a ceint ceste espee-là. Nous voyons le mesme ordre obserué en Salomō, encores qu'il fust fils de Roy. Dieu auoit esleu Salomō, pour estre assis sur le throne de son Royaume, & par paroles expressees auoit promis à Dauid de luy assister comme vn pere à son fils. *2. Sam. 7. 13.* Dauid auoit de sa propre bouche designé Salomon pour successeur à la couronne, en presence de quelques vns des principaux de sa Cour. Mais ce ne fut pas assez. Et pourtāt Dauid assemble en Ierusalē les Princes d'Israel, les Chefs des lignees, les Capitaines des gardes & officiers ordinaires du Roy, les Milleniers & Centeniers de toutes les villes, *1. Rois 5. 1. Chron. 28. 5.* les officiers du Domaine Royal, ses fils, les grāds seigneurs & personnes notables du royaume pour resoudre & donner arrest de ceste election. En ceste cōpagnie apres l'inuocatiō du nom de Dieu, Salomon proclamé Roy par *1. Rois 1. 32. 1. Chron. 28. 1. & 29. 22, 24.*

2. Rois 10

2. Chron.

16, 36, &

22.1, &

26.1, &

36.1.

2. Sam.

16.18.

Pse. 132.

11.12.

toute l'assemblée d'Israel, est sacré Roy, & assis (dit le texte) sur le throne d'Israel. Alors & non plustost, les Princes, les Seigneurs, ses freres mesmes luy font hommage & prestent serment de fidelité. Et afin que lon ne die que cela a esté fait seulement pour vuider le different qui eust peu naistre à cause de la succession entre les freres, enfans de Dauid, nous li-
sons que les autres Rois suiuanz ont esté ainsi establis en leur charge. Il est dit qu'apres la mort de Salomon le peuple s'assembla pour
creer Roy son fils Roboam. Apres qu'Amazias eut esté tué, Ozias son fils vnique fut esleu
Roy par tout le peuple. Ochozias apres Io-
ram, & Ioacham fils de Iosias, apres le trespas de son pere, la pieté duquel sembloit assez re-
querir cela sans autre solennité, toutesfois, luy & les autres furent esleuez au siege Royal par
le peuple. Il faut rapporter à cela ce que Chusai disoit à Absalom, Je suiuray (dit-il) le Roy
que le Seigneur, ce peuple, & tous les hommes
d'Israel auront esleu : c'est à dire le Roy esta-
bli legitimement & selon l'ordre acoustumé.
Parquoy, encores que Dieu eust promis à son
peuple vne lampe perpetuelle, c'est à dire vn
Roy & continuel successeur de la race de Da-
uid, & que la succession des Rois de ce peuple
eust esté aprouee par la parole de Dieu mes-
mes: neantmoins, puis que nous voyōs les Rois
n'auoir point regné que premierement le peu-
ple ne les eust ordonnez & installez avec les
cerc-

ceremonies requises: on peut recueillir de là, que ce Royaume d'Israel estoit hereditaire, si lon considere Dauid, mais qu'il est du tout electif, si on regarde les personnes. Or à quel propos tout cela, s'il constoit de l'election, comme c'est chose tout euidente, sinon à ce que les Rois se souuenans d'auoir esté esleuez en leur dignité par le peuple, se souuinissent tout le temps de leur vie de leur deuoir enuers celuy à qui ils estoient obligez de toute ceste grandeur.

N o v s lisons que les Rois Payens ont aussi esté establis par le peuple: a sauoir que suruenant quelque trouble dans le pays, ou estant besoin de faire la guerre au loin, quelqu'un, que le peuple auoit en singuliere reputation à cause de sa vaillance & preudhommie, du consentement de tous estoit choisi pour estre Roy. *Herodote* *lin. 1.* Ciceron dit qu'entre les Medes Deioces *Cic. au 1. des Off.* se meslant d'appointer les debats de quelques voisins & amis particuliers fut esleu Iuge, & Roy finalement, comme aussi les premiers Rois entre les Romains. Tellement qu'apres la mort de Romulus, pource que l'entreregne & le gouuernement des cent Senateurs ne plaist *Tite Live* *au 1. lin.* soit gueres aux Quirites, il fut accordé que de là en auant les Rois seroyent esleus par les suffrages du peuple & par approbation du Senat. Tarquinius Superbus a esté estimé tyran, pource que n'ayant esté créé du peuple, ni du Senat, il occupoit la Royauté en vertu de ses

moyens. Ce qui fut cause l'ong temps apres que Iules Cesar, qui auoit enuahy l'Estat par violence, neantmoins pour endormir le monde sous quelque couleur d'equite, vouloit que l'on creust qu'il auoit esté establi Empereur par le peuple & par le Senat. Auguste son adopté, iamaïs ne se porta pour heritier de l'Empire, encores qu'il fust declairé tel par testament: ains declaira qu'il le tenoit du peuple & du Senat, comme firent aussi Caligula, Tibere & Claudius. Quât à Neron, qui enuahit l'Empire par force & par meschanceté, sans aucune apparence de droit, il fut condamné par le Senat.

EN somme, puis qu'il n'y eut iamaïs homme, qui nasquist avec la couronne sur la teste, & le sceptre en la main, que nul ne peut estre Roy de par soy ni regner sans peuple: & qu'au contraire le peuple puisse estre peuple sans Roy, & ait esté long temps auant qu'auoir des Rois, c'est chose tresasseuree, que tous Rois ont esté premierement establis par le peuple. Et combië que les fils & descēdants des Rois, en suiuant les vertus de leurs peres, semblent auoir rendu les royaumes hereditaires à leurs races, & qu'en quelques royaumes & pays le droit libre de l'election semble estre aucunement amorti: si est-ce qu'en tous royaumes bien dressez ceste coustume est tousiours demeuree, que les fils n'ont point succedé à leurs peres, que premierement le peuple ne les eust establis de nouueau, ni n'estoyent reconus Rois en qualité d'heritiers des defuncts, ains

aprouuez & nommez Rois lors feulemēt qu'ils auoyent esté inueftis du Royaume, & reccu le fceptre & le diademe par les mains de ceux qui representoyent la Maiefté du peuple. On void les marques trefeuidètes de cela és Royaumes Chreftiës que lon estime hereditaires auourd'huy. Car les Rois de Frâce, d'Efpagne, d'Angleterre, & les autres font couftumieremēt facrez & cōme mis en poffeffion de leur charge, par les Eftats, Pairs, Seigneurs du Royaume, & officiers de la couronne, qui representēt tout le corps du peuple: ne plus ne moins que les Empereurs d'Alemagne font nommez par les Electeurs, & les Rois de Pologne par les Vay-uodes ou Palatins du Royaume, où l'election maintient encores fon droit. Aufſi les villes du Royaume ne font hōneur Royal nī magnificence d'entree aux Rois, qu'apres leur facre & couronnement: & anciennemēt lon ne cōtoit le tēps de leur regne finō depuis le iour de leur facre, ce qui s'eſt eſtroitemēt obſerué en Frâce.

MAIS de peur que l'ordre cōtinué de quel *Voyez les* ques ſucceſſiōs ne nous deçoiue, ſachons que *Annales* les Eſtats de ces Royaumes, ont ſouuēt preferé *de N. Gilles.* le couſin au fils, & le puisné à l'aiſné. Cōme en Frâce, Louys fut preferé à ſon frere Robert, Côte d'Eureux: itē Henri à Robert neucu de Capet. Qui plus eſt, par l'autorité du peuple au meſme royaume, du viuant des legitimes heritiers a eſté trāſporté d'une race en autre, cōme de celle de Merouce en celle de Charlemagne, & de celle de Charlem. en celle de Hue Capet:

ce qui est auenu és autres Royaumes , comme les plus asseurees histoires en font foy. Mais pour ne nous eslongner du royaume de France, qui a tousiours esté estimé le patron des autres , & où la succession semble auoir obtenu plus de credit, nous lisons que Pharamond fut esleu l'an C G C C X I X : Pepin , l'an D C C L I : Charles le Grand , & Carloman fils de Pepin l'an D C C L X V I I I , sans auoir esgard à leur pere. Carloman mort l'an D C C L X X I , son frere Charles ne fut pas incontinent possesseur de sa moitié , comme il auient ordinairement en la succession des heritages , ains par l'ordonnance du peuple & des Estats du Royaume. L'an D C C C X I I , Louys le Debonnaire, quoy que fils de Charles le Grād ou Charlemagne, fut esleu. Et au testament de Chârlémagne inseré en l'histoire escrite par Naclere, Charlemagne prie le peuple d'eslire par l'assemblee des Estats du Royaume celuy de ses petis fils que le peuple voudra, & commāde aux oncles d'acquiescer à l'ordonnance du peuple. Au moyen dequoy Charles le Chauue petit fils de Louys le Debonnaire & de Iudith, se declare estre Roy esleu , comme Aimonius historien François le recite. Pour conclurre en vn mot, tous Rois ont esté esleus du commencement : & ceux qui auourd'hui semblent auoir par succession la courōne & puissance Royale, doiuent premierement & auant toutes choses estre establis par le peuple. Brief, combien que le

le

le peuple soit coustumier en certains pays de eslire pour Rois ceux de quelque race, laquelle a fait des seruices notables: si disons nous qu'il eslit le tronc, non pas le reietton qui en procede, sans estre tellement obligé à ceste race qu'il ne puisse, au cas qu'elle degengere, en choisir vne autre. Ceux qui sont issus de ceste race ne naissent pas Rois, ains sont creéz tels: ni ne sont pas appelez Rois, ains Princes du sang.

O R puis que le peuple eslit & establit les Rois, il s'ensuit que le corps du peuple est par dessus le Roy. Car c'est chose euidente que celui qui est establi par vn autre, est estimé moindre que celui qui l'a establi: que celui qui a receu autorité d'autrui, soit moindre que son auteur. Putiphar Egyptien establit Ioseph sur toute sa maison: Nebuchadnezar, Daniel sur la Prouince de Babylone, Darius, six vingts gouuerneurs sur le Royaume. On dit que les maistres establisent leurs seruiteurs, les Rois leurs officiers. Ainsi aussi le peuple establit le Roy comme administrateur de l'Estat public. Les bons Rois n'ont point desdaigné cetitre, les mauuais mesmes l'ont affecté, tellemēt que par l'espace de quelques siecles, nul Empereur Romain, si ce n'a esté quelque tyran tout formé, comme Neron, Domitian, Caligula, n'a voulu estre appellé Seigneur. Car aussi ne faut il pas dire qu'à l'appetit d'une centaine d'hommes plus ineptes & pires bien souuent que le reste, tous les autres ayent esté creéz: ains plustost ces cent ont esté faits pour les autres, Et

*Le corps
du peuple
par desus
le Roy.*

*Gen. 39. 4.
Dan. 2.
48, & 6. 1*

la raison requiert, que celuy soit par dessus l'autre qui a esté fait pour luy. Ainsi c'est pour l'amour de la nauire que le maistre d'icelle y establit vn pilote, qui manie le gouuernail de peur qu'elle ne sorte de sa route, ou se brise contre vn escueil. Le pilote faisant sa charge est obeï des matelots, & de celuy mesmes qui est Seigneur du vaisseau: cependant le pilote en est seruiteur, comme vn des moindres, d'auec lesquels il ne differe sinon en ce qu'il est grand seruiteur, & les autres sont petis. En vne Republique coustumierement cōparee à vne nauire, le Roy tient place de pilote, le peuple est Seigneur du vaisseau, obeïssant à son pilote, tandis qu'il a soin du salut du public, encores que ce pilote ne soit ni ne doïue estre estimé autre chose que seruiteur du public, comme quelque iuge ou chef de guerre, & ne differe d'auec les autres officiers, sinon qu'il est tenu porter plus grandes charges, & s'exposer à beaucoup plus de dangers. Pour ceste cause aussi tout ce que le Roy acquiert par les armes, soit qu'il se empare des places frontieres en guerroyant l'ennemi, ou par iustice & confiscation, il l'acquiert au Royaume, non pas à soy, a sauoir au peuple, de qui le Royaume est cōposé: ne plus ne moins que le seruiteur à son maistre: & ne peut-on contracter ni s'obliger à luy que par l'autorité du peuple.

DA V A N T A G E il y a infinis peuples qui vivent sans Roy: mais on ne sauroit imaginer

vn Roy sans peuple. Et ceux qui ont esté esleuez en la dignité royale, n'y ont pas esté auancez pour estre hommes plus beaux, ou mieux formez que les autres, ou pour estre d'un naturel plus excellent, pour gouverner les autres, comme vn berger garderoit son troupeau de bestail. Au cōtraire, & le Roy & les suiets sont d'une mesme masse, en telle sorte que le peuple a esleué en ce degré les Rois, afin qu'ils tinssent de luy & possédassent comme par emprunt toute leur autorité & puissance. L'ancienne coutume des François représente cela merueilleusement bien: car ils esleuoient sur vn bouclier & saluoient Roy celuy qu'ils auoyent esleu. Au reste, pourquoy dit-on, ie vous prie, que les Rois ont vne infinité d'yeux, vn millio d'orcilles, les mains longues extremement, & les pieds vistes au possible? Est-ce qu'ils soyent semblables à la nauire Argos, à Geryon, à Midas, ou à d'autres tant châtez par les poetes? Nullement. Mais cela est dit, d'autant que tout le peuple, à qui l'affaire touche, preste au Roy, pour le bien de l'Estat, ses sens, ses moyens & facultez. Que le peuple s'eslongne du Roy, il trebuschera incontinent tout à plat, encor qu' auparauant il seblast ouir trescler, auoir vne veüe bien aigue, & estre le plus vigoureux & disposé du monde: luy qui triophoit en toute magnificence, en vn instant sera comme la boue des rues: brief au lieu qu'il chascun l'adoroit, il sera cōtraint de deuenir pedante, & fouetter les petis enfans en vne escole, comme il auint au

ieune Denis tyran de Sicile, confiné à Corinthe. Abâtez seulement la base de ce geant & Colosse, il faut que tout le corps donne du nez à terre & aille par esclats & menus morceaux. Veu d'ôc que le Roy est establi en ce degré par le peuple & pour l'amour du peuple, & ne peut subsister sâs le peuple: qui est-ce qui trouuera estrange, si nous concluons que le peuple est par dessus le Roy?

Tout le peuple est représenté ordinairement par les Officiers de la Couronne, & extraordinairement, ou d'auen au par les Estats du royaume. O R, ce que nous disons de tout le peuple vniuersellement, doit estre aussi entendu, comme dit a esté en la seconde Question, de ceux qui en tout royaume ou ville représentent legitimement le corps du peuple, & qui ordinairement sont appelez les Officiers du royaume ou de la Couronne, & non du Roy. Quant aux officiers du Roy, c'est luy qui les pose & depose à son plaisir: mesmes apres sa mort ils ne sont plus rien, & sont estimez cōme morts. Au contraire, les Officiers du royaume, reçoivent leur autorité du peuple, en l'assemblee generale des Estats: au moins souloyent-ils la recevoir ainsi anciennemēt, & ne peuuent estre deposez que par icelle. Ainsi donc les vns dependent du Roy, les autres du royaume: ceux là du souverain Officier du royaume, qui est le Roy mesme, ceux-ci de la souveraineté du peuple, de laquelle souveraineté & le Roy & tous ses Officiers, & tous les Officiers du royaume doyuent dependre. La charge des vns est d'auoir soin de la personne du Roy, de ceux-ci, que

que la Republique ne reçoive dōmage quelconque: ceux-là doyent assister & servir le Roy, comme tous serviteurs domestiques sont obligez envers leurs maistres: ceux-ci, de conserver les droits & priuileges du peuple, & d'empescher soigneusement que le Prince n'obmette ou commette quelque chose au dōmage du public. Brief les vns sont serviteurs & domestiques du Roy, & receus en leurs estats pour obeir à sa personne: les autres au contraire sont comme Asseffeurs du Roy en l'administration de iustice, participans de l'autorité & puissance royale, estans tenus de mettre la main au maniemment des affaires de l'Estat, ne plus ne moins que le Roy, lequel toutesfois est comme President au milieu d'eux, & tient seulement le premier degré. Or comme tout le corps du peuple est par dessus le Roy, semblablement ceux-ci considerez ensemble & comme en vn corps sont par dessus le Roy, encores que cōsiderez vn par vn ils soyent tous au dessous de luy.

L O N peut assez conoistre iusques où s'est *Genes. 23.*
estendue la puissance des premiers Rois, de ce & 34.
qu'Ephron Roy des Hethiens, n'ose octroyer droit de sepulture à Abraham, sans le consentement du peuple: & Hemor Heuien Roy de Sichem n'a osé entreprendre de traiter alliance avec Abraham, sans le mesme consentement: pource que c'estoit la coustume de rapporter à l'assemblée du peuple les affaires plus impor-

tans. Cela se pouuoit aisément pratiquer en tels Royaumes, qui pour lors estoient presque confinez dans l'enceinte d'une ville. Mais depuis que les Rois commencerent à estendre leurs limites, & qu'il fut impossible au peuple de s'assembler tout en un lieu, à cause du trop grand nombre qui eust apporté confusion, on establît des Officiers du Royaume, qui conserueroient d'ordinaire les droits du peuple: en telle sorte toutesfois, qu'au besoin on assembleroit extraordinairement tout le peuple, ou du moins quelque abrégé, c'est à dire les principaux du corps d'iceluy. Nous voyons cest ordre dressé au Royaume d'Israel, qui (au iugement de la plupart des sages Politiques) estoit tresbien établi. Le Roy auoit ses eſchansons, escuyers trenchans, valets de chambre, & maistres d'hostel. Le Royaume auoit ses officiers, aſauoir septante & un anciens, & les chefs choisis de toutes les lignees, lesquels auoyent l'œil sur le public en temps de paix & de guerre. Outreplus le Royaume auoit en chascque ville des Magistrats qui y entretenoyent le bon ordre, cōme les susnommez par tout le Royaume. Si quelquesfois il falloit deliberer d'affaires de conséquence, les uns s'assembloyent avec les autres, & sans cela lon ne pouuoit resoudre de chose aucune qui cōcernast le public. Dauid assemble ces officiers du Royaume, quand il desire inuestir Salomō de la dignité Royale, quand il veut faire examiner & aprouuer la police par luy remise sus, & lors qu'il est question de rame-

*Officiers
du Roy,
me en Is-
rael.*

1. Chron.

29. 1.

1. Chron.

13. 1.

1. Sam. 14.

45.

ner l'arche de l'Alliâce. Et pource qu'ils representēt tout le peuple, il est dit en l'histoire que tout le peuple s'assembla. Ce sont les mesmes officiers qui garētissent de mort Ionathan, cōdamné par sentēce du Roy, dōt il appert qu'il y auoit appel du Roy au peuple. Apres que le Royaume fut diuisé par l'orgueil de Roboam, le conseil de Ierusalem cōposé de Septante vn anciens, semble auoir telle autorité qu'il pouuoit iuger le Roy, cōme le Roy pouuoit iuger vn chascun d'eux. En ce cōseil presidoit le Duc ou chef de la maison de Iuda, c'est à dire quelque personnage notable choisi de la lignee de Iuda, comme en la ville de Ierusalem y auoit vn gouuerneur de la lignee de Beniamin.

2. Chron.
19. 1.
Nehem.
11. 9.

Tout cela se conoistra encores micux par exēples. Ieremie enuoyé de Dieu pour annoncer aux Iuifs la ruine de Ierusalē, à cause de cela est condamné, premierement par les Sacrificateurs & Prophetes, c'est à dire par iugemēt Ecclesiastique: en apres par tout le peuple de la ville, c'est à dire par les iuges ordinaires de Ierusalē, qui estoient les Milleniers & Cēteniers. Finalement la cause ayant esté conue par les Princes de Iuda, asauoir par les Septâte vn anciens assemblez & assis pres la porte neufue du tēple, il est absous. En ceste mesme assemblee & audience lon condamne en termes expres le fait du Roy Iehoiakim qui quelque temps auparauant auoit fait tuer le Prophete Vrie, lequel predisoit aussi la ruine de Ierusalem. Nous

Ierem. 26.
9, 17.

lisons en vn autre endroit, que Sedechias eut en telle reuerence l'autorité de ce cōseil, qu'au lieu d'entreprendre de faire tirer Ieremie de la basse fosse en laquelle les Septante vn anciens l'auoyent ferré, il n'osa pas mesme le faire charger en quelque autre endroit moins rigoureux. Eux le conseillans de consentir à la mort du Prophete, sa respōse fut qu'iceluy estoit en leurs mains, & que luy de sa part ne leur pouuoit contredire en rien. Ce mesme Roy craignāt qu'ils ne fissent enqueste des propos qu'il auoit tenus à Ieremie, pour puis après leur en rendre compte, forge vne excuse mensongere. Il appert de là qu'en ce royaume de Iuda les officiers de la Couronne estoient par dessus le Roy: en ce royaume (di-ie) establi & ordonné non point par Platon ni par Aristote, ains par le Seigneur Dieu mesme auteur de tout ordre, & souuerain modérateur de tout estat & gouvernement public.

Ester l.

T E L S estoient au royaume de Perse les sept Mages ou Sages, qui auoyent comme pareille dignité que le Roy, & qu'on appelloit les oreilles & les yeux des Rois, lesquels acquiesçoient aussi au iugement de ces Sages. Au royaume de Sparte il y auoit les Ephores, auxquels on appelloit des sentēces donnees par le Roy, & qui iugeoyent aussi les Rois mesmes, ce dit Aristote. En Egypte, le peuple eslissoit & bailloit des officiers au Roy, seulemēt afin de l'empescher qu'il ne fist chose aucune contre les loix.

*Aus. liu.
des Polit.
ch. II. &
au 3. liu.
ch. 7.*

loix. Or comme Aristote appelle ordinairement legitimes, les Rois qui ont tels officiers pour adjoins: aussi ne fait-il difficulté de dire, que si ces officiers defaillent, il n'y a plus là de Monarchie, ains vne tyrannie du tout barbare, ou vne domination fort aprochante de tyrannie. En la République Romaine tels estoient les Senateurs & Magistrats creéz par le peuple, le Tribun de ceux qu'on appelloit Celeres, le Preteur ou Preuost de la ville, & les autres, tellement qu'il y auoit appel du Roy au peuple: comme Seneque le monstre par témoignage extrait des liures de la République de Cicéron, & l'histoire d'Horatius condamné par les iuges Royaux, pour auoir tué sa sœur, & absous par le peuple, le verifie assez. Du temps des Empereurs, il y auoit le Senat, les Consuls, les Preteurs, les grands Preuosts de l'Empire, les Gouverneurs des Prouinces attribuees au peuple & au Senat, lesquels estoient tous appelez Magistrats & Officiers du peuple Romain. Et pourtant lors que par arrest du Senat l'Empereur Maximin fut iugé ennemi de la République, & que Maximus & *Herod.* Albinus eurent esté creéz Empereurs par le *lin. 8.* Senat, les gens de guerre iurerent qu'ils obciroyent fidelement au peuple Romain, au Senat & à l'Empereur.

Q V A N T aux Empires & Estats publics d'aujourd'huy (exceptez ceux de Turquie, de Moscovie, & autres tels, qui sont plustost
H.j.

grands brigandages qu'Empires) il n'y en a pas vn qui ne soit ou qui n'ait esté iadis gouuerné en la façon que nous auons descrite. Et si par la faute & lascheté des principaux Officiers il est auenu que les successeurs ont receu l'Estat en autre estat qu'il ne falloit, ceux qui sont pour le present és charges publiques sont neantmoins tenus, entant qu'en eux est, de ramener toutes choses à leur ancien estat. En l'Empire d'Alemagne, qui est conserué par election, il y a les Electeurs & Princes Laics & Ecclesiastiques, les Comtes, Barons, villes Imperiales avec leurs deputez: & comme tous ceux-là en leur endroit veillent pour le bien du public, semblablement ils representent és iournees la Maiesté de l'Empire, estans obligez d'auiser alors que par les haines ou autres affections particulieres de l'Empereur, l'Estat ne soit aucunement interessé. Pour ceste cause l'Empire a son Chancelier comme l'Empereur a le sien: l'un & l'autre a ses Officiers, ses finances, ses thresoriers distinguez les vns des autres. Et c'est chose si notoire que l'Empire est preferé à l'Empereur, que tous disent communément que l'Empereur fait hommage à l'Empire. Semblablement au Royaume de Pologne, il y a pour officiers de la couronne les Euesques, les Palatins, les Castellans, la Noblesse, les deputez des villes & Prouinces assemblez extraordinairement, deuant lesquels

quels & non ailleurs se font les nouuelles ordonnances & les resolutions touchant la guerre. Quant à l'ordinaire, il y a les Conseillers du Royaume, le Chancelier d'Estat, &c. combien que cependant le Roy ait ses maistres d'hostel, valets de chambre, seruiteurs & domestiques. Or si quelqu'un demandoit en Pologne, sauoir qui est le plus grand, ou le Roy, ou tout le peuple du Royaume, représenté par les Seigneurs & Magistrats: il feroit tout autant comme de s'enquerir en la ville de Venise, si le Duc est par dessus la Seigneurie.

M A I S que dirons-nous des Royaumes que lon dit estre successifs & hereditaires? Il en est tout de mesmes entierement. Le Royaume de France, preferé autresfois & n'y a pas long temps à tous les autres, à cause de l'excellence de ses loix & de la maiesté de ses Estats, estoit ainsi reiglé anciennement. Or combien que ceux qui y ont charge pour le public ne facent pas leur deuoir comme il seroit à desirer, il ne s'ensuit pas qu'ils n'y soyent tenus. Le Roy a son grand maistre, ses valets de chambre, veneurs, escuyers, eschançons & autres, dont les estats dependoyent iadis tellement de la personne du Roy, qu'apres la mort de leur maistre ils estoient estimez comme morts. Et de fait apres l'enterrement du Roy, le grand Maistre en presence de tous les officiers

H.jj.

& seruiteurs de la maison du Roy, rompt son
 baston & dit, nostre maistre est mort, que
 chascun se pouruoye. D'autre costé le Royau-
 me a ses officiers, cest asauoir le Maire du pa-
 lais, qui depuis a esté appellé Connestable, les
 Mareschaux, l'Amiral, le Chancellier ou grand
 Referendaire, les Secretaires, Thresoriers &
 autres, lesquels autresfois estoient creéz en
 l'assemblée des trois Estats du Clerge, de la
 Noblesse & du peuple. Depuis que le Parle-
 ment de Paris a esté fait sedentaire, ils ne sont
 estimez establis en charge qu'au preallable ils
 n'ayent esté receus & aprouuez du Parlement,
 & ne peuuent estre desmis que du consente-
 ment & autorité d'iceluy. Or tous ces Offi-
 ciers. là prestent serment au Royaume, c'est à
 dire à tout le peuple, premierement: puis au
 Roy, qui est le protecteur du Royaume, ce qui
 aparoit par le formulaire du serment. Sur
 tout, le Connestable, receuant l'espee du Roy
 (comme il conste par les paroles que le Roy
 prononce) ceint ceste espee pour maintenir &
 defendre la Republique. Outreplus, le Royau-
 me de France a ses Pairs (ainsi nommez, ou
 pource qu'ils sont compagnons du Roy, ou
 pource qu'ils sont peres de la Republique) à
 l'esgard des Prouinces du Royaume, entre les
 mains desquels le Roy preste serment le iour
 de son sacre, comme si tout le peuple du Roy-
 aume estoit là present: ce qui monstre que ces
 douze Pairs sont par dessus le Roy. Eux d'autre

Aimoinus
au 5. liure
chap. 26.

§. filius fa
mil. Instit.
quib. mod.
ius patriæ.
pot. solui-
tur.

tre costé iurent qu'ils conserueront, non pas le Roy, mais la couronne, aideront la Republique de leur conseil, pour cest effect se trouueront en temps de paix & de guerre, au conseil du Prince, comme il appert clairement par le formulaire de leur Pairrie. Et pourtant, ils ont tel droit que les Pairs de la Cour, qui selon le droit des Lombards, non seulement estoient assesseurs du Seigneur feodal au iugement des causes, ains aussi souuent conoissoient & iugeoyent les differens suruenus entre ce Seigneur & quelque sien vassal. Nous voyons aussi ces Pairs de France auoir souuēt vuidé les proces suruenus entre le Roy & ses suiets : tellement mesmes que quand Charles vi. voulut prononcer sentence contre le Duc de Bretagne eux s'y opposerent, alleguans que la vuidange de ce fait apartenoit aux Pairs, non pas au Roy qui ne pouuoit en rien deroguer à leur autorité. C'est pourquoy, encores aujourd'huy le Parlement de Paris, appellé la Cour des Pairs, estant en quelque sorte constitué Iuge entre le Roy & le peuple, voire entre le Roy & vn simple particulier, est tenu & comme obligé de maintenir le moindre du Royaume contre le Procureur du Roy, s'il entreprend quelque chose contre le droit. Dauantage si le Roy ordonne quelque chose en son conseil, s'il traite quelque accord avec les Princes ses voisins, s'il faut commencer la guerre, ou faire la paix, comme il la salut faire

*René
Chuppin
au 3. liure
du domai
ne de
France.*

il y a quelques années avec l'Empereur Charles cinquième, le Parlement y doit entreposer son autorité, & faut que lon couche en ses registres tout ce qui concerne le public: & rien n'est ferme que premierement il n'ait esté aprouvé du Parlement. Et afin que les Conseillers de ce Parlement ne craignissent le Roy, anciennement ils ne paruenoyent à tel estat que par nomination de tout le corps de la Cour, ni ne pouuoient estre desinis pour cause legitime, que par l'autorité du mesme corps. Qui plus est, si les lettres du Roy ne sont soussignées par vn Secretaire du Royaume, aujourd'huy nommé Secretaire d'Estat, & si les lettres patentes ne sont sceelées par le Chancelier, qui a puissance de les canceller, elles n'ont aucune vertu. Il y a aussi des Ducs, Marquis, Comtes, Vicomtes, Barons, Seneschaux, Chastellains: & és villes des Maires, Baillifs, Lieutenans, Capitouls, Consuls, Syndiques, Escheuins, & autres qui ont en charge speciale quelque estendue de pays, ou vne ville, pour conseruer le peuple de leur ressort. Vray est qu'aujourd'huy quelques vnes de ces dignitez sont deuenues hereditaires. Voila quant à ce qui est ordinaire.

Assemblée des trois Estats. O V L T R E tout cela, anciennement tous les ans, & depuis moins souuent, asauoir quand quelque necessité le requeroit, les trois

trois Estats estoient assemblez , où toutes les Prouinces & villes de quelque nom , asauoir les Roturiers, les Nobles, les Ecclesiastiques de chascune d'icelles enuoyoyent leurs deputez : & là deliberoit & arrestoit-on publiquement de ce qui concernoit l'Estat public.

T O V S I O V R S l'autorité de ceste assemblee a esté telle , que ce qui y estoit arresté , soit qu'il falust traiter paix , ou faire guerre , ou creer vn regent au Royaume , ou imposer nouveau tribut , estoit tenu ferme & inuiolable : qui plus est , par l'autorité de telle assemblee les Rois conuaincus de paillardises , ou de nonchalance trop grande en leur charge , ou de tyrannie , estoient rendus moines , voire mesmes les races entieres estoient priuees de la succession du Royaume , ne plus ne moins que premierement par l'autorité du peuple elles auoyent esté appellees à l'administration d'iceluy Royaume. Ceux que le consentement des Estats auoit esleuez estoient abatus par le dissentement d'iceluy : ceux qui en ensuiuant les vertus de leurs peres auoyent esté appelez à ceste dignité , comme si c'eust esté leur heritage , en estoient chassez & desheritez par leur ingratitude , & pource qu'en forlignant ils se rendoyent incapables & indignes de tel honneur.

H.iiij.

Cela monstre que la succession a esté toleree pour euitier les pratiques, brigues, mescontentemens, retraites des personnes reiettees, entre regnes & autres incommoditez de l'election. Mais d'autre part, quand la succession apportoit d'autres maux plus pernicieux sans comparaison, quand la tyrannie enuahissoit le Royaume, & qu'un tyran s'emparoit du thron Royal: alors les Estats du royaume, legitimement assemblez au nom de tout le peuple ont tousiours maintenu leur autorité soit pour chasser le tyran ou Roy fai-neant en le renuoyant chez ses parens, soit pour establir un bon Roy en sa place. Les anciens François auoyent aprins cela des Gaulois, comme Cesar le monstre en ses liures. Car Ambiorix, Roy des Eburons ou Liegeons, confesse que lors les Royaumes de la Gaule estoient tels, que le peuple legitimement assemble n'auoit pas moins de puissance sur le Roy que le Roy sur le peuple. Ce qui apparoit aussi en Vercingetorix, lequel rend raison de son fait deuant l'assemblee du peuple.

*Cesar au
8. & 7. li.
de la guer
re Gauloi-
se.*

Es Royaumes d'Espagne, principalement d'Aragon, de Valence & de Cathalogne, il en est tout de mesmes. Car la Iustice d'Aragon, qu'on appelle, a la souueraineté par deuers foy. Et pourtant les Seigneurs qui representent le peuple s'auancent iusques là tant au sacre du Roy, qu'en l'assemblee des Estats qui se fait de trois en trois ans, de dire en termes expres

pres au Roy ce qui sensuit: *Nos qui valemus tanto como vos , y podemos mas que vos , vos elegimos Rei con estas é y estas condiciones , entra vos y nos un que manda mas que vos.* C'est à dire, Nous qui valons autant que vous , & qui pouuons plus que vous , vous eslisons Roy à telles & telles conditions : & y en a vn entre vous & nous , qui commande par dessus vous. Souuentesfois ceste Iustice d'Aragon abolit ce que le Roy a demandé, defend ce qu'il a enioint: & n'oseroit-on imposer tribut quelconque en ce Royaume-là, sans l'autorité de ceste Iustice. Es Royaumes d'Escoffe & d'Angleterre , la souueraineté est riere le Parlement, qui se tient tous les ans. Ils appellent Parlemēt l'assemblée des Estats du Royaume, en laquelle les Euesques, Comtes , Barons, les deputez des villes & Prouinces disent tous leur auis, & resoluent d'un commun accord des affaires d'estat. L'autorité de ceste assemblée est si sainte , que le Roy n'oseroit abroguer ce qu'elle a vne fois arresté. C'est elle qui appelle & installe en leurs charges tous les Officiers du Royaume & les Conseillers du conseil ordinaire du Roy ou de la Roine. En somme , les autres Royaumes Chrestiens, de Hongrie, de Boheme, de Dannemarch, de Suede & autres, ont leurs officiers collateraux des Rois : & les histoires avec les exemples que nous en auons de nostre temps monstrent assez que ces Officiers ont maintesfois fait valoir leur autori-

ré, iufques à degrader & chaffer les Rois mefmes.

IL ne faut eftimer pourtant que cela rongne trop les ailes à la puiffance Royale, & que ce foit autant comme de vouloir oster la teſte aux Rois. Nous croyõs que Dieu eſt tout puiffant, & n'eſtimons pas que rien diminue de ceſte puiffance, encores qu'il ne puiſſe pecher: ni ne diſons point que ſon Empire ſoit moins à priſer, dautant qu'il ne peut branſler ni eſtre abatu. Auſſi ne faut-il iuger vn Roy eſtre trop rauallé, ſilon dit que pour empeschẽr qu'il ne tombe en faute, à quoy il eſt enclin, il eſt ſouſtenu par d'autres, & ſi par la prudẽce de quelques conſeillers il conſerue longuemẽt en ſon entier le Royaume, qu'il euſt peu perdre par ſa nonchalance & indiscretion. Direz-vous qu'un homme ſoit moins ſain, pource qu'il eſt enuironné de medecins qui luy conſeillent de fuir l'intemperance, qui luy defendent de mãger viandes nuifibles à ſon eſtomach, & qui meſmes le purgent ſouuentesfois encores qu'il n'en ſoit pas d'auis & qu'il leur reſiſte? Qui ſeront ſes meilleurs amis, ou ces medecins là qui ont ſoin de ſa ſanté, ou les flatteurs, qui luy preſentent à tous coups ce qui ne peut luy apporter finalement autre choſe que la mort? Il faut donc noter touſiours ceſte diſtinction. Les vns ſont amis du Roy, les autres de François qui eſt R y. Les amis de François ſont ceux qui luy ſeruent: les amis du Roy, ſont les Offi-

Officiers & seruiteurs du Royaume. Car puis que le Roy a ce nom à cause du Royaume, & que c'est le peuple qui donne estre & cōsistence au Royaume, lequel estant perdu ou ruiné, il faut que le Roy cesse d'estre Roy, ou ne soit pas tant Roy qu'autresfois: certainement ceux qui ont le bien & profit du Royaume en recommandatiō sont vrais amis du Roy, & ceux qui ne tiennent compte de ce bien, ou qui le renuersent, sont vrais ennemis du Roy. Et comme on ne sauroit separer le Royaume d'avec le peuple, ni le Roy du Royaume: aussi ne peut-on desioindre les amis du Roy d'avec les amis du peuple & du Royaume. Je diray davantage, que ceux qui aimēt de vraye affection François, l'aiment mieux voir Roy que suiet. Or puis qu'ils ne sauroyēt le voir tel sans Royaume, il faut consequemment qu'en aimant François, ils aiment aussi le Royaume. Mais ceux qui veulēt estre estimez plus amis de François que du Royaume & du peuple, doyuent estre estimez flatteurs & les plus dangereux ennemis que lon sauroit trouuer. S'ils luy sont vrais amis, faudra-il pas que le Roy deuiene plus puissant & asseuré en son Estat? suiuant le dire de Theopōpus Roy de Sparte, apres que les Ephores ou cōtroleurs des Rois eurent esté instituez, que plus y aura de gens cōmis de par le peuple pour veiller sur les affaires du Royaume, & plus ils auront de credit, plus l'Estat sera ferme & heureux.

*Auoir si
la prescri-
ption du
têps peut
abolir le
droit du
peuple.*

M A I S, à l'auanture, quelqu'un repliquera, Tu nous proposes ici des Pairs, des Seigneurs, des Officiers de la Couronne. Au contraire, de ma part, ie ne voy plus que des masques & des robes à l'antique, comme s'il falloit se presenter sur vn eschafaud: ie n'apperçoy pour le present presque aucunes traces de l'ancienne liberté & autorité. Qui pis est, on apperçoit vne grãd' partie de tels Officiers n'auoir soin que de leurs affaires particulieres, faire les bouffons & flatteurs autour des Rois, se iouër à la pelotte du peuple: à peine en trouuera-on vn qui ait compassion des pauures suiets escorchez & rongez iusques aux os, ne qui leur tende la main. Si quelques vns ont ou sont estimez auoir ceste volonté, on les condamne comme rebelles & seditieux, ils sont contrains fuir au haut & loin, pour y viure avec grande incommodité. Que peut-on respondre à cela? La chose passe ainsi. L'audace des Rois, l'ignorance en partie, & par fois la meschante conscience des principaux en vn Royaume, a esté presque tousiours telle par tout le monde, qu'il semble que la licence dont plusieurs Rois se targuent aujourd'huy, & qui les rend insupportables, a comme acquis droit par prescription de long temps: & que le peuple a taiblement quitté son autorité, ou l'a perdue du tout, faute des'en aider. C'est ce qui auient ordinairement, que personne ne se soucie des choses dont & grands & petis deuoyent estre soigneux

gneux iufques au bout : que nul n'eftime vn afaire luy eftre recommandé, encores qu'il ait efté commis & recommandé à tous. Mais nonobftant tout cela, vne telle prefcription & preuarication ne preiudicie nullement au peuple. On dit en commun langage, qu'il n'y a point de prefcription contre le fifque, moins encor cōtre tout le peuple qui eft par deffus le Roy, & en faueur duquel le fifque a ce priuilege. Car autrement, pourquoy le Prince eft-il feulemēt adminiftrateur ; & le peuple vray propriétaire du fifque ? comme nous le prouuerōs ci apres. Dauantage, eft-ce pas vne chofe refolue, que par violence & feruitude, tant longue puiſſe-elle auoir efté, lon ne fauroit obtenir prefcription contre la liberté ?

Si lon obiecte, que les Rois ont efté inthronifez par le peuple qui viuoit il y a cinq ou fix cens ans, & non par celuy qui eft auourd'huy: ie rēſpō que le peuple ne meurt iamais, encores que les Rois s'en aillent hors du monde les vns apres les autres. Car comme le cours continuel de l'eau donne au fleue vne duree perpetuelle: auffi la reuolution de naiſſance & de mort rend le peuple immortel. Et pourtant, comme nous auons auourd'huy le meſme Rhin, Seine & Tybre, que nous auons il y a mil ans: auffi eft-ce touſiours vn meſme peuple celuy d'Alemagne, de Frāce, d'Italie, ſi d'auanture quelques peuplades ne ſe ſont meſlees parmi: & ne peut le cours du temps, ni le chan-

*L. propo-
nebatur.
76. D. de
indicijs. L.
qui res
ſuas. 98. §.
ult. de ſo-
lut. L. in-
ter ſtipul.
83. §. Sa-
crant. D.
de verb.
oblig.*

*Ulpian. de
reg. iuris.
L. 54.*

gemēt des indiuidus, muer en sorte quelcōque le droit de ces peuples. Dauantage, s'ils disent que le Roy tient le Royaume de son pere, non point du peuple: ce pere le tiendra de l'ayeul, & ainsi l'un de l'autre en mōtant cōtre mont. Or ie demande si l'ayeul a peu donner à son successeur autre & plus grand droit que le sien qu'il auoit? S'il ne l'a peu (comme de fait il n'a peu) void-on pas tout ouuertement, que ce que le successeur s'est apropié de plus, il le possède en aussi bōne conscience qu'un brigand posséderoit le bien qu'il auroit volé aux passans? Au cōtraire, le peuple a-il pas son droit entier de perpetuelle euiction. Encores donc que par quelque tēps les Officiers d'un Royaume ayēt perdu leur rāg, cela ne peut preiudicier au peuple. Mais tout au rebours, cōme lō ne voudroit donner audiāce à un esclau, qui pour auoir tenu longuemēt prisonnier son propre maistre, nō seulement se vāteroit d'estre frāc, mais aussi s'attribueroit puissance de vie & de mort sur sō maistre: ni ne receuroit-on pourvallables les excuses d'un qui par l'espace de trēte ans n'auroit fait autre chose que brigāder, ou qui seroit fils d'un brigād, s'il vouloit se iustifier par telle prescriptiō de temps, au cōtraire plus il auroit passé d'annees à faire ce meschāt train, plus seroit-il rigoureusement chastié: semblablement le Prince est du tout insupportable, qui pour auoir succédé à un tyrā, ou tenu long tēps esclau le peuple duquel il a receu la couronne, ou

vio-

violenté les Officiers du Royaume, pense que tout ce qui luy plait luy soit loisible & permis de droit. Le tēps ne retranche riē des droits du peuple: mais il agraue les outrages du Roy. Mais que fera-ce, si mesmes les Officiers de la couronne se sont entēdus avec le Prince? si trahissā la cause ils ont eux-mesmes mis la main sur le collet du peuple, l'ont lié & garrotté, & mis en la puissance du tyran? S'ensuiura-il par telle preuaricatiō & trahison, que l'autorité du peuple soit deuolue au Roy? Cela oste-il quelque point de liberté au peuple, ou rēd-il plus grāde la licence du Roy? Que le peuple s'en prene à soy-mesmes, direz vous, qui s'est fūc à la desloyale loyauté de telles gēs. Mais ie respō, que ces Officiers sont les protecteurs qui doyuent tenir la main à ce que le salut & la liberté du peuple demeurēt en leur entier. Et pourtāt, ne plus ni moins que si vn Auocat auoit accordé moyēnant certaine somme d'argēt, de vēdre à partie aduerse le droit de celuy pour qui il plaide, ne pourroit toutesfois pour cela réuerfer iustice, ni d'vne cause mauuaise en soy en faire vne bōne, encores qu'il y donnast quelque couleur: aussi ceste cōspiratiō des grāds, faite pour ruiner les petis ne peut riē retrācher des droits du peuple. Cepēdāt, tels grāds encourēt la punitiō q̄ la loy decerne cōtre les preuaricateurs: & quāt au peuple, la loy luy permet de choisir vn autre auocat, & de nouueau poursuiure sō droit cōme si la chose estoit en son entier. Car si le

peuple Romain a condamné les capitaines & chefs d'armée pour auoir capitulé à leur désauantage avec les ennemis, quoy que la nécessité les y amenaist, & qu'ils fussent sur le point de tout perdre, & n'a voulu demeurer obligé à garder telle capitulation: moins encores vn peuple libre sera-il tenu souffrir le ioug qui luy a esté mis sus par ceux qui le pouuoient secouër, & qui l'y ont laissé mettre volontairement & pour leur profit particulier, sans y estre forcez ni menassez.

*Pour quel
le fin les
Rois ont
esté creex.*

O R puis que les Rois ont esté establis par le peuple, & qu'on leur a donné quelques adioints pour les contenir en deuoir, lesquels adioints cōsiderez vn par vn sont par deffous, & tous ensemble en vn corps sont par dessus le Roy: il nous faut voir consequemment, pourquoy premierement ils ont esté establis, & quel est principalement leur deuoir. On estime vne chose iuste & bonne, quand elle paruient à la fin pourquoy elle est ordonnee. En premier lieu, chascun est d'accord que les hommes, aimans de nature la liberté, hayssans la seruitude, nais plustost pour commander que pour obeir, n'ont volontairement accepté d'estre gouuernez par autrui, que pour quelque grand profit qu'ils en esperoyent, & que pour obeir aux loix d'un tiers ils ont par maniere de dire, renoncé à ce que nature leur conseille. Car, comme dit *Æsope*, le cheual qui parauant couroit à son abandon, n'eust iamais receu

receu le mors en bouche ni le cheuaucheur sur son dos, s'il n'eust esperé de venir à bout du taureau. N'estimons donc pas, que les Rois ayent esté esleus, pour appliquer à leur particulier vsage les biens acquis à grand trauail par les suiets: car chascun aime & embrasse ce qui est sien. Ils n'ont receu la puissance du public pour la faire seruir à leurs plaisirs: car ordinairement les petis hayssent ou portent enuie aux grands. Disons donc, qu'ils sont en ceste charge pour maintenir par iustice, & par la force des armes le public & le particulier de tous outrages & dommages. Pour ceste cause, dit S. Augustin, ceux là sont appelez Maistres & Seigneurs qui pouruoyent au bien d'autrui, comme le mari à la femme, les peres aux enfans: ceux sont appelez suiets à qui lon aide. Vray est que ceux qui maistrisent ainsi, pour dire ce qui en est, seruent à ceux à qui lon dit qu'ils commandent: car, comme dit le mesme docteur, ils ne commandent pas par conuoitise de dominer, ains par deuoir de procurer le bien de ceux qui leur sont assuiettis: ils ne dominent point par orgueil, ains gouvernent par vne charité & singuliere affection qu'ils ont de pouruoir à ce qui est necessaire.

SENEQUE en l'Epistre xc i. Du temps du siecle d'or, dit-il, les sages gouvernoient les Royaumes. Ils se gardoyent de violence, & preseruoyent les petis de la main des grands. Ils conseilloyent & desconseilloyent, mon-

*Au 19. li.
ure de la
Cité de
Dieu,
chap. 19.*

strans ce qui estoit vtile & dommageable. Par leur prudence ils donnoient ordre que leurs suiets n'auoyent faute de rien. Leur vaillance repoussoit les dangers, & par bienfaits ils enrichissoient & agrandissoient leurs suiets. Leur deuoir gisoit à bien gouverner & non pas à faire leurs monstres. Il n'y auoit personne qui ne conust estre impossible de leur faire teste, veu que d'eux chascun receuoit tout son pouuoir & moyen, &c. Ainsi donc estre Empereur & Roy n'est autre chose que donner conseil: le seul but de la domination c'est le profit du peuple. Les Empereurs & Rois n'ont qu'une chose à faire, c'est de procurer le bien du peuple. La dignité Royale, à proprement parler, n'est point vn titre d'honneur, ains est vn fardeau pesant: ce n'est point vne descharge, vacation, ni licence, ains vne charge, vocation & seruitude publique, laquelle on honnore, pource qu'en ces premiers temps-là, & durant ce siecle d'or, personne n'eust voulu goustier de telles fascheries, si elles n'eussent esté assainsonnées de quelque honneur. Tellement qu'il n'y a riē plus vray que ce que souloit dire quelqu'un alors, Si chascun sauoit de quelles difficultez est enuelpé le bandeau Royal, on ne daigneroit pas le recueillir, encores qu'on le vist à ses pieds.

A v reste, lors que ces mots, M I E N & T I E N entrèrent au monde, que differens suruindrent entre les citoyens touchant la propriété

priété des biens, & guerres entre les peuples voisins à cause de leurs limites, le peuple s'aui-
sa de recourir vers quelqu'un qui peust &
sceust empescher que les pources ne fussent fou-
lez par les riches, & que ceux du pays ne souf-
frissent par la violence des estrangers. Or com-
me les procès & guerres croissoient, on esli-
soit celuy qui estoit le mieux estimé de tous
pour sa vaillance & prudence. Voila donc
pourquoy les Rois furent creéz iadis, c'est a-
savoir pour administrer iustice au pays, mener
leurs suiets à la guerre, & non seulement bri-
der les courses des ennemis, empescher le four-
ragement & degast de la campagne, mais aus-
si beaucoup plus pour chasser tous vices & mes-
chancetez bien loin de leurs suiets. Cela se
peut prouver par toutes les histoires sacrees
& profanes. Quant au peuple de Dieu, du cō-
mencemēt il n'auoit autre Roy que Dieu mes-
me, lequel habitoit au milieu du peuple, & ré-
doit responce d'entre les Cherubins, designoit
extraordinairement les iuges & chefs de guerres
au moyen de quoy le peuple n'estimoit point
auoir besoin de lieutenans, estant honoré
de la presence continuelle de son Souuerain
Roy. Or quand le peuple de Dieu commen-
ça à se facher de l'iniustice des fils de Sa-
muel, sur la vieillesse duquel il ne s'osoit
plus gueres asseurer, il demanda vn Roy, à
l'exemple des autres peuples, disant à Sa-
muel, Donne nous vn Roy qui nous iuge, i. Sam. 8.
5. & 20.

tel que les autres peuples en ont. Là est touché le premier & principal poinct de la charge du Roy. Vn peu apres, tous les deux sont specifiez. Nous aurons, disent-ils, sur nous vn Roy comme les autres nations. Nostre Roy nous iugera, il sortira deuant nous & menera nos armées. Faire iustice est tousiours mis en premier lieu, d'autant que c'est vne chose ordinaire & perpetuelle: mais la guerre n'est sinon extraordinaire, & en cas, ainsi qu'on parle. A cause dequoy Aristote, dit que du temps des Heros tous les Rois estoient iuges & capitaines. Quant aux Rois des Lacedemoniens ils n'auoyent autorité souueraine sinon en l'armée, encore estoit-ce moyennant la scytale, où estoit contenu le mandement des Ephores. Semblablement, comme les Medes par vne licence effrenée fussent en perpetuelles querelles les vns contre les autres, finalement ils esleurent pour iuge vn nommé Deioces, lequel auparauant s'estoit bien porté en quelques arbitrages particuliers: tost apres ils le creèrent Roy, & luy baillerent des archers & satellites, afin qu'il peust aisément reprimer les plus puissans. Cicéron dit qu'ancienement tous les Rois auoyent esté establis pour administrer iustice, & que leur institution & celle des loix auoit vn mesme esgard, a sauoir que le droit fust esgalement rendu à tous: ce qui se peut verifier par la propriété des mots, presques en toutes langues. Les Rois sont appellez

Es Polit.
3. li. ch. 11.

Herodot.
lib. 1.

lez *Reges* par les Latins, pource qu'ils regif-
 foyent ou gouuernoyent les limites ou bor-
 nes du public ou des particuliers. Les noms de
 Empereurs, Ducs, Princes, qui se rapportent à
 la conduite de la guerre & aux combats és pre-
 miers: item ce qu'en ont dit les Grecs qui les
 ont nommez *Basiles*, *Archa*, *Hegemones*, c'est à
 dire, apuis du peuple, chefs, conducteurs. Les
 Alemans & autres peuples vsent de noms si-
 gnifians & qui monstrent qu'estre Roy &
 Prince n'est pas faire monstre avec grande ma-
 gnificence, ains c'est vne charge tresgrande &
 continuelle. Mais en somme, quand le poete
 Homere appelle les Rois Iuges des villes, & en Au 1. li-
 ure de l'I-
 liade.
 descriuant Agamemnon, il le nomme sage,
 fort, & vaillant: comme aussi Ouide dit d'E- Au 6. li-
 ure de la
 Metamor-
 phose.
 richtheus, qu'on n'eust sceu dire laquelle des
 deux vertus reluisoit dauantage en luy, ou la
 iustice ou la promesse: en quoy ces deux poe-
 tes semblent auoir exactement compris le
 deuoir des Rois & Princes.

VOILA quant aux Rois des nations pro-
 fanes, à l'exemple desquelles les Iuifs ont de-
 mandé & establi des Rois. La Roine de Saba 2. Chron.
 9.8.
 dit aussi à Salomon que Dieu l'a institué Roy,
 pour faire iustice & iugement. Et Salomon Sapient. 9.
 7.
 mesme parlant à Dieu, Seigneur, dit-il, tu
 m'as esleu pour regner sur ton peuple, & pour
 iuger tes fils & tes filles. Pour ceste cause aussi,
 les bons Rois, comme Dauid, Iosaphat & au-
 tres, ne pouuans vaquer en propre personne à

la vuidange de tous les proces & differens de leurs suiets (encores qu'és causes d'importance ils s'en reseruassent tousiouts le dernier iugement, comme on le void en l'histoire de
2. Sam. 15. Samuel) n'ont eu chose quelconque en plus
2. grande recommandation que d'establir de
1. Chron. bons & sauans iuges en tous lieux, & auoir
23. 4. & soin special de l'administration de iustice, s'e-
26. 29. stimans armez du glaiue plus pour chastier les
2. Chron. suiets qui se porteroient meschamment, que
19. 1. pour repousser les ennemis. Brief, comme dit
Rom. 13. l'Apostre, le Prince est seruiteur ordonné de Dieu pour le bien & profit du peuple, estant armé du glaiue pour garantir les bons de la violence des meschans, & quand il s'acquitte de cela, tous luy doiuent honneur & obeissance.

P v i s donc que les Rois sont ordonnez de Dieu & establis par le peuple, pour procurer le bien de ceux qui leur sont assuiettis, & ce bien ou profit se fait voir principalement en deux choses, a sauoir en l'administration de iustice aux suiets & adresse aux armes pour repousser les ennemis: certainement il faut inferer & conclurre de là que le Prince qui ne sert qu'à son profit ou à ses plaisirs, qui mesprise & renuerse tous droits & deuoirs, qui traite plus cruellement son peuple que ne feroit vn ennemi du tout desesperé, peut estre proprement appellé Tyran: & que les Royaumes ain-
 si gou-

si gouuernez, quoy que de longue & large estendue, ne sont autre chose que grands brigandages.

IL nous faut ici entrer vn peu plus auant: *Asavoir si le Roy est par dessus la Loy.* car on demande si le Roy qui preside en l'administration de iustice a puissance de resoudre des affaires selon sa volonté? Faut-il que le Roy soit suiet à la loy, ou si la loy depend de luy? La loy disoit vn ancien est respectee de ceux qui autrement ne se soucient de la vertu, *S. August. au 4. liu. de la Cité de Dieu, ch. 4. & 6.* attendu qu'elle guide la force és affaires de guerre, & donne vigueur & lustre à la iustice & equité. Pausanias Spartiate respondra en vn mot que c'est chose conuenable aux loix de commander, & aux hommes de s'assuiettir aux loix. Agésilas Roy de Sparte afferme que tout chef de guerre est tenu de faire ce que les loix luy commandent. Mais il sera bon de reprendre ce propos vn peu de plus haut. Lors que le peuple commença à chercher iustice pour appointer ses differens, s'il rencontroit quelque particulier homme de bien qui l'en resoluist, il se contentoit de cela. Or pource que c'estoit chose mal aisee, & de difficile rencontre, & que souuent les sentences des Rois prises pour loix & fermes ordonnances se trouuoient contraires les vnes aux autres: alors les plus sages & quelques Magistrats inuenterent les loix, qui parlent à tous d'vne mesme bouche,

Cela fait, on enioignit expressement aux Rois d'estre gardiens, administrateurs & conserveurs des loix. Par fois aussi, d'autant que la Loy n'auoit peu preuoir toutes les particularitez des faits pour en resoudre nettement, il estoit permis aux Rois de suppleer à ce defaut, par la mesme equité naturelle dont les loix auoyent esté puisees. Et de peur qu'ils ne fissent violence à la Loy, le peuple leur bailla de fois à autre pour adioints les Conseillers & Officiers desquels a esté faite mention ci-dessus. Pourtant il n'y a rien qui exempte les Rois de l'obeissance qu'ils doiuent à la Loy, laquelle ils doiuent reconnoistre pour leur dame & maistresse, estimans qu'il n'y a rien qui leur conuiene plus mal que ceste impuissance effeminée, de laquelle fait mention le poete Iuuenal, en ces mots, *Je le veux, ie le commande, ma volonté serue de loy & de raison.* Et encores que ils obeissent à la loy, si ne lairront-ils pour cela d'estre ce qu'ils doiuent estre. Car puis que la Loy est comme l'instrument donné de Dieu pour bien gouverner & mener à heureuse fin la société des hommes: les Rois qui estiment se faire deshonneur en obeissant à la Loy, meritent d'estre monstrez au doigt, & sont autant dignes de mocquerie que l'arpenteur qui penseroit se deshonnorer en prenant vne reigle, vn compas, vne toise & autres instrumens dont les gens entendus au mesurage des terres ont acoustumé d'vser: ou
que

que le pilote qui aimeroit mieux prendre vne route à sa fantasie, que la dresser selon son aiguille & charte marine. Qui doute que ce ne soit chose plus vtile & honnesté d'obeir à la Loy, qu'au Roy qui n'est qu'un homme? La Loy est l'ame du bon Roy, elle luy donne mouuement, sentiment & vie. Le Roy est l'instrument & comme le corps par lequel la Loy desploye ses forces, exerce sa charge, & exprime ses conceptions. Or c'est chose trop plus raisonnable d'obeir à l'ame qu'au corps. La Loy est la raison & sagesse de plusieurs sages recueillie en peu de mots. Or plusieurs voyent plus clair & plus profond qu'un seul. C'est donc bien le plus seur de suivre la Loy que l'homme, tant aigu puisse-il estre. La Loy est vne raison ou intelligence deliure de tout trouble, non sujette à s'esmouuoir par cholere, ambition, haine, ou acception de personnes: les prieres ni les menaces ne la sauroyent fleschir. Au contraire l'homme, quoy que participât de raison, se laisse abatre & emporter souuent, par courroux, appetit de vengeance & autres passions qui le brouillent de telle sorte qu'il n'est plus à soy, pource que estant composé de raison & de concupiscence desreiglee, il ne se peut faire que par fois la concupiscence ne demeure maistrresse.

S V I V A N T cela nous voyons Valentinian, autrement bon Empereur, permettre

à tous ceux de l'Empire d'auoir deux femmes à la fois, pource que luy estoit transporté de ceste impure affection. Pource que Cambyse fils de Cyrus estoit amoureux de sa propre sœur, il voulut que les mariages des freres avec leurs sœurs fussent aprouuez & tenus pour bons. Chabades Roy des Peres abolit le chastiment des adulteres. Il faudra attendre tous les iours de telles loix, si nous voulons que la Loy soit suiette au Roy.

P O V R reuenir à nostre propos, la Loy est vne intelligence, ou plustost vn amas de plusieurs entendemens : & l'entendement est (si i'ose ainsi parler) vne parcelle de la diuinité: tellement que qui obeit à la Loy, semble obeir à Dieu & le receuoir comme iuge des choses dont est question. Mais au contraire, dautant que l'homme composé de cest entendement diuin, & d'une sensualité brutale, souuent il n'est pas maistre de soy-mesme, il s'abestit & se priue de son sens: estant en cest estat il n'est plus homme, mais beste: & qui aime mieux obeir au Roy qu'à la Loy, vn tel semble preferer le commandement d'une beste à celuy de Dieu. Et pourtant, quoy qu'Aristote fust precepteur d'Alexandre, si confesse-il que lon ne sauroit comparer la diuinité à chose aucune de ce monde plus proprement qu'à l'ancienne Loy de la

*Au liure
du monde,
& au 3.
des Polit.
chap. 7.*

de la société humaine bien reiglee. Qui donne ceste Loy pour gouuernante aux Estats publics, il y introduit Dieu mesme: & qui s'en remet au Roy, il s'en fie à vne beste. A quoy aussi les Prophetes semblent auoir eu esgard, qui en quelques endroits depeignent ces grands Empires sous la figure de bestes rauissantes.

M A I S au reste, celuy-là est-il pas vne vraye beste, qui aime mieux auoir pour guide vn aueugle & insensé qu'un homme voyant des yeux du corps & de l'ame? C'est pourquoy, dit Aristote, estant auenu qu'anciennement les Rois commandoyent de puissance absolue, ne proposans pour Loy sinon leur volonté, quelque temps apres entre les peuples mieux policez, on les rendit Rois legitimes en les obligeant à garder & obseruer les loix: & quant à ceste puissance absolue elle demeura chez ceux qui commandoyent aux peuples Barbares. Il dit puis apres que ceste puissance absolue est cousine germaine de tyrannie, & l'eust appelée tout à fait tyrannie, n'eust esté que ces bestes de Barbares s'estoyent volontairement assuiettis à icelle.

M A I S on repliquera que ce n'est pas chose conuenable à la maiesté des Rois d'auoir leur volonté bridee par les loix. Je di au

contraire, qu'il n'y a rien plus royal que de réprimer sa conuoitise par le bien des loix. C'est grâd pitié de ne pouuoir faire ce que lon veut: mais c'est beaucoup plus grand mal de vouloir ce qu'on ne doit vouloir : & c'est le malheur des malheurs de faire ce que les loix defendēt. I'oy, ce m'est auis, vn certain Durionius, Tribun du peuple, s'opposant à la loy faite contre les excès qui auoyent la vogue à Rome, & disant, Messieurs, on vous a bridez, vous estes liez & garrottez du rude cordeau de seruitude. C'est fait de vostre liberté, puis qu'estes astraits à vne loy qui vous commande d'estre moderez. A quel propos, d'alleguer que nous sommes libres, s'il ne nous est pas permis de viure dissoluement & à nostre plaisir? C'est la complainte de plusieurs Rois d'aujourd'huy, & de leurs mignons & flatteurs. La Maieité Royale est morte, si lon ne nous laisse renuerser le Royaume de fond en comble. C'est fait des Rois si lon observe les loix. A l'auanture est-ce chose miserable de viure, s'il n'est permis à celuy qui aura le cerueau troublé de se faire mourir incontinent. Car que font autre chose les Rois qui violent les loix, sans lesquelles les Empires, & les societez des brigands mesmes n'ont iamais peu subsister? Reiettons donc les detestables mēsonges de ces iangleurs de Cour, qui appellent les Rois dieux, & tiennent leurs paroles pour autant d'oracles: qui
pis

pis est , sont si effrontez que de persuader aux Rois, que rien n'est iuste de soy-mesme , ains prend la forme de iustice ou d'iniustice , selon qu'il plait au Roy en ordonner : comme s'il estoit quelque Dieu qui ne peust errer ni pecher aucunement. Certainement tout ce que Dieu veut est iuste, en cest esgard que c'est Dieu qui le veut. Mais il faut que ce que le Roy veut soit iuste, auant qu'il le vueille. Car il n'est pas iuste , pource que le Roy l'a ordonné : mais le Roy est iuste, qui ordonne que lon tiene pour iuste, ce qui est iuste de soy-mesme. Nous ne dirons donc pas ce qu'Anaxarchus disoit à Alexandre fort angoissé de la mort de son ami *Plutarque en la vie d'Alexandre.* Clitus, lequel il auoit tué de sa propre main : assavoir que Themis & Iustice sont assises aux costez du Roy , ne plus ne moins qu'aupres de Iupiter, pour confermer incontinent tout ce qui luy semblera bon. Au contraire nous disons que Themis & Iustice president sur les Royaumes , pour chastier rudement les Rois qui violeront ou interesseront la Maiesté des loix. Nous n'aprouerons nullement ce que disoit Thrasymachus Chalcedonië, que le profit & le plaisir des Princes est la reigle & definition de toutes loix : au contraire, que le droit borne le profit des Princes , & que les loix repriment leurs plaisirs. Au lieu de trouuer bon ce que ceste vilaine disoit à Caracalla , que ce qu'il vouloit luy estoit permis, nous mainten-

drons que rien ne doit estre loisible sinon ce que les loix permettent. Et reietans ceste detestable sentence de Caracalla, qui disoit que les Empereurs donnent la loy & ne la reçoivent point, nous dirons, qu'en tous Royaumes bien establis le Roy reçoit du peuple les loix lesquelles il doit soigneusement considerer & maintenir : & que s'il entreprend rien que ce soit au preiudice d'icelles, cela est iniuste.

CE que dessus peut estre verifié par exemples. Avant qu'il y eust Roy en Israel, Dieu luy auoit prescript par Moïse vne Ordonnance Sacree & Ciuile, pour l'auoir continuellement deuant les yeux. Or apres que Saul eust esté esleu & establi par le peuple, Samuel la luy baille toute esrite, pour la garder soigneusement, & les autres Rois suiuaus ne sont point receus que premierement ils n'ayent iuré d'observer ceste ordonnance. La ceremonie estoit telle qu'avec la couronne imposee sur la teste du Roy, on luy bailloit le liure du tesmoignage, que les vns entendent estre le droit du peuple du Royaume, les autres la Loy de Dieu, selon laquelle il deuoit gouverner le peuple. Cyrus se reconnoissant conseruateur des loix, leur promet assistance contre tout homme qui s'efforcera de les enfreindre: & à son couronnement s'oblige à l'observation d'icelles: combien que quelque temps les flatteurs cornassent aux oreilles de son fils Cambyse,

1. Sam. 10.

25.

1. Chron.

11. 3.

2. Rois 11.

17.

Xenoph.

au 8. liu.

byſes, que tout luy eſtoit loifible. Les Rois de Sparte, appelez Rois legitimes par Ariſtote, tous les mois renouuelloyent leur ſerment, promettans éſ mains des Ephores procureurs *Xenophō* du Royaume, qu'ils regneroyent ſelon les loix *au liu. de* que Lycurgus auoit dreſſées au pays. A l'oc- *la Repub.* caſion Archidamus fils de Zeuxidamus, enquis *des Lace-* qui eſtoyēt les gouuerneurs de la ville de Spar- *demoniēs.* te? Les loix, & les Magiſtrats deuēment eſtablis, dit-il. Et de peur que les loix ne vinſſent en meſpris, ces peuples ſe vantoyent de les auoir receues du ciel, & qu'elles auoyent eſté inſpirees de Dieu, afin que chaſcun au lieu de ſ'eſtimer iugé par les hommes, creuſt que Dieu meſme le iugeoit. Les Rois d'Egypte ne faiſoyent rien que ſelon la teneur des loix, confeſſans haut & clair que leur felicité dependoit de l'obeiſſance qu'ils rendoyent aux loix. Ro- *Dionys.* mulus dreſſant le Royaume de Rome, accorde *Halicar.* avec le Senat en ces termes, que le peuple face *Lib.I.* les loix, & luy donne ordre de les faire obſeruer & en ſoit le conſeruateur. Antiochus, troi- *Fulgoſe* ſieſme du nom, Roy d'Asie, eſcriuit à toutes *au 5. liu.* les villes de ſon Royaume, *ch.6.* Que ſi éſ lettres à elles enuoyees en ſon nom ſe trouuoit choſe repugnanté aux loix, lon creuſt que le Roy n'auoit rien ordonné de cela, & pourtant que les villes ne rédiſſent aucune obeiſſance à telles lettres.

O R combien que quelques Iuriſconſultes diſent que par arreſt du Senat, l'Empereur

Auguste fut exempté de l'obeissance des loix: si est-ce que Theodose & tous les autres bons & raisonnables Empereurs ont declairé qu'ils estoient obligez aux loix, afin que ce qui auoit esté extorqué par violence, ne fust receu pour droit escrit. Quant à Auguste, puis que la Republique Romaine auoit esté acablee par les armes & par la violence d'iceluy, elle ne pouuoit rien dire librement, sinon qu'elle auoit perdu sa liberté. Et dautant qu'elle n'osoit pas appeller Auguste tyran, le Senat dit qu'il est exempt de l'obeissance des loix, qui est autant comme de dire que cest Empereur viuroit desreiglément & desordonnément. Le mesme droit que dessus a tousiours eu vigueur en tous les Royaumes & Estats publics bien policez dela Chrestienté. Car ni l'Empereur, ni les Rois de France, d'Espagne, d'Angleterre, de Pologne, de Hongrie, ni les vrais Princes, l'Archeduc d'Austriche, le Duc de Brabant, les Contes de Flandres & de Hollande, ni les autres Princes, ne sont receus au gouuernement de leurs estats, que premierement ils n'ayent promis aux Electeurs, Pairs, Palatins, Seigneurs, Barons & Gouverneurs, qu'ils rendrôt le droit à chascun selon les loix du pays, voire si estroittement, qu'ils ne sauroient changer les priuileges des Prouinces, ni pas mesme les droits municipaux des villes, sans l'auis & consentement d'icelles villes & prouinces. S'ils le font, ils ne sont pas moins criminels de lese
Maisté

Maiesté des Loix, que le peuple le feroit en leur endroit, s'il refusoit leur obeir quand ils commandent selon les Loix. En somme, les Princes legitimes reçoivent les loix de la main du peuple, & quant à la couronne & au sceptre, marques d'honneur & de puissance, cela les avertit de maintenir les loix, & de tirer leur gloire principalement de la conseruation d'icelles.

Q u o y doncques? Ne sera-il pas loisible au Prince de faire nouvelles loix & abolir les anciennes? Puis que c'est afaire au Roy d'auser non seulement que rien ne se face contre les loix & en fraude d'icelles, mais aussi que rien n'y defaille, ou qu'il n'y ait quelque chose de trop, briefque la vieillesse & le laps du temps ne les abolissent & enseuelissent: s'il faut abregger, adiouster ou oster ceci & cela des loix, son deuoir est d'assembler les Estats, & en demander leur auis & resolution, sans entreprendre de rien publier, que premierement le tout n'ait esté deuëment examiné & aprouvé par iceux. Apres que la Loy aura esté faite & publice, il n'est plus question de s'en desdire, il faut que le Prince s'y assuiettisse & range le premier. Car puis que les exemples ont beaucoup plus d'efficace que les paroles, le Prince est tenu d'obeir à la loy qu'il a faite, autrement c'est à tort & cõtre toute equité qu'il requiert de ses suiets vne obeissance aux loix lesquelles il mesprise au lieu de les garder, comme il y est

*A saoir si
le Prince
peut faire
nouuelles
Loix.*

tenu. Car la difference qui est entre les Rois & les suiets ne doit pas consister en impunité, ains en equité & iustice. Et pourtant combien qu'Auguste fust estimé exempt des loix par arrest du Senat, toutesfois voulant reprendre vne ieune homme surprins en adultere, & iceluy reprochant à Auguste que luy-mesmes auoit violé la loy Iulia qui condamne les adulteres, Auguste reconut sa femme, & de regret qu'il en eut s'abstint de manger. Tant c'est vne chose conuenable à nature d'enseigner par exemple ce que vous enseignez de parole! Le Legislateur Solon souloit comparer les loix à la monnoye, pource qu'elles maintiennent la societé humaine, comme la monnoye conserue le trafic: ce qui est dit assez proprement. Donc si les Rois ne peuvent descrier ni abaisser le prix d'une bonne monnoye, sans le consentement de la Republique, encores moins de puissance aura-il de faire & desfaire des loix sans lesquelles les suiets ni les Princes ne peuvent habiter seurement en quelque lieu que ce soit, ains sont contraincts de demeurer dans les forêts & cauernes, ainsi que les bestes brutes.

*Demoſt.
en la harangue
cōtre Timocrates.*

*Iunoc. 3.
ad Regem
Tarrac. in
cap. quando
de iurando.*

Pourtant aussi, le cas auenant que l'Empereur estime que pour le bien de l'Empire d'Allemagne il soit besoin d'establir quelque loy, premierement il en demande l'auis aux Estats. S'ils l'approuuent, les Princes, Barons & deputez des villes signent cela, & lors la loy est ra-

est ratifiée. Au reste, il promet par serment solennel de garder les loix qui sont desia faites, & de n'en faire point de nouvelles que par le consentement de tous. Il y a vne loy au royaume de Pologne, laquelle a esté renouuclée l'an mil quatre cens cinquante quatre, & l'an mil cinq cens trente huiët. Par icelle est dit que lon ne fera aucunes ordonnances nouvelles, que par le consentement du public, ni ailleurs qu'en l'assemblée des Estats. Quant au Royaume de France, où lon estime que les Rois ont plus d'autorité qu'ailleurs, anciennement les loix y estoient dressées en l'assemblée des trois Estats ou au Parlement ambulatorioire. Mais depuis que ce Parlement a esté fait sedentaire, les edits des Rois ne sont receus si le Parlement ne les aprouue: au contraire les arrests de ce Parlement, sans autre loy, ont ordinairement vigueur & efficace de loy.

E's Royaumes d'Angleterre, d'Espagne, d'Hongrie, & és autres, il y a mesmes priuileges qu'anciennement. Car si les Royaumes dependent de l'observation des loix, & les loix de la volonté d'un seul homme, est-ce pas chose asseurée que iamais l'Estat d'un Empire ou Royaume ne sera bien asseuré? Faudra-il pas si le Roy est insensé par interualles ou tout à fait, comme cela est auenu, que tout le Royau-

me bransle & s'en aille finalement en pieces? Mais si les loix sont par dessus les Rois, comme nous l'auons desia monsté, & si les Rois doiuent autant d'obeissance aux loix que les seruiteurs à leurs maistres: se trouuera-il homme qui n'aime trop mieux s'affuiettir à la Loy qu'au Roy, qui vueille obeir au Roy violant la Loy, Et qui refuse de secourir la Loy contre vne telle violence?

*Asauoir si
le Prince
a puissance
de vie
& de
mort sur
ses suiets.*

P V I S que le Prince n'est pas seigneur des loix, il faut voir iusques où s'estend la seigneurie és autres choses. Les flatteurs de Cour tiennent pour reigle notable, Que les Princes ont puissance de vie & de mort sur leurs suiets, comme les maistres l'auoyent anciennement sur leurs esclaves. Par tels mensonges ils ont tellement enforcé les Princes, que plusieurs qui n'vsent pas tant à la rigueur de ce droit imaginaire, pensent neantmoins cela leur estre loisible, & que ce qu'ils s'en deportent est d'autant qu'en cela ils quittent quelque chose de leur droit. Mais nous disons au contraire, que le Prince n'est que ministre & executeur de la Loy, & ne peut desgainer l'espee sinon contre ceux que la Loy condamne a estre frappez. S'il fait autrement, il n'est plus Roy, mais tyran: il n'est plus iuge, ains brigand: & ne le faut plus appeller conseruateur, mais violateur de la Loy. Il faut ici considerer premierement le fondement assuré de toute ceste dispute, nostre

estre resolution ayant esté, que les Rois sont ordonnez pour le bien commun de tous. Cela presuppposé, tout le different est vuidé. Car quelle apparence y a-il de dire que le Roy soit allé chercher des suiets pour les esgorger puis apres si tost que quelque mouche le piqueroit, & qu'il feroit mourir les premiers rencôtrez, quand sa cholere luy monteroit en teste, brief qui porteroit la mort au bout de la langue, comme en parle le Sage. Il ne faut pas en iuger ainsi. On ne trouuera homme qui de son bon gré aille remettre sa vie és mains d'un autre pour en faire des choux & des pastez, comme dit le Prouerbe. A peine vn ami, vn frere voudra-il se fier de sa vie à son ami ou à son frere: encores moins à vn estranger tant habile homme puisse-il estre, veu mesmes que nous voyôs l'enuie, la haine, la fureur auoir tellement trāsporté Athanas & Ajax, que l'un tua ses enfans, l'autre pensant auoir esgorgé ses compagnons & se voyant deceu, tourna la pointe de sa rage & de son espee contre soy-mesme. Or estant ainsi que chascun est aussi desirieux de la conseruation de sa vie, qu'amoureux d'icelle, quelle assurance aurez vous, si la pointe d'un cousteau retenu d'un petit filet pend continuellement à plomb sur vostre teste? Prendrez vous plaisir à banquetter ou à rire, enuironné de telles affaires? Mais sauriez vous choisir vn filet plus delié, que de mettre vostre vie & salut entre les mains d'un hom-

me qui se change de iour en iour, d'heure en heure, & de moment en moment, brief qui mille fois en vn iour secouë le mors de la raison selon les diuerfes passions qui le transportent. Y a-il esperance ou vtilité, tant grande la puisse-on imaginer, qui fuffise pour contrebalancer ceste peur, ce peril & ce dommage? Concluons donc que les Rois ne peuuent tirer le glauiue sinon contre les coupables condamnez par la voix de la loy.

*Asauoir si
le Roy
peut absou
dre ceux
que la loy
condāne.*

M A I S puis que la cause de la vie est vne chose fauorable, parauanture on demandera si le Roy ne peut pas au moins absoudre ceux que la loy condamne? Je di que non. Autrement ceste misericorde cruelle entretiendrait les voleurs, brigands, assassins, rauisseurs, empoisonneurs, magiciens & autres pestes du genre humain, comme ont fait les tyrans en maints lieux, & nous en voyons qui le font encores auionrd'huy. Et pourtant le seul bien de la loy enfrainte seroit la retraite de toutes sortes de meschans. Celuy qui a receu des loix le glauiue pour chastier le peché, armeroit le peché contre les loix, & introduiroit en la bergerie le loup qu'il en doit chasser. Mais pour ce que par fois il peut auenir des choses, esquel les la loy muette a besoin d'une loy parlante, & faut que le Roy esclairecisse l'intention de la loy, asauoir quand quelqu'un a failli plustost contre les mots que contre le sens d'icelle: de peur qu'en prenant le cas (qui s'efforce lors) à

la ri-

la rigueur du droit, & commettre iniustice en pensant faire tout autrement, le Roy prenant en main les balances de la raison, qui est l'ame de la loy, pourra donner l'interpretatio convenable, dautant que ce qui est prins de l'intention de la loy doit estre estimé autant que la loy mesme. Toutesfois de peur que quelque passion ne s'empare du siege de la raison, le Roy ne se doit ingerer de rien faire en cela sans l'avis de gens sages, ce que nous lisons avoir esté ordinairement pratiqué par Alexandre Seucure Empereur Romain. Par ainsi le Roy punira rigoureusement le meurtrier: & cependant pardonnera à celuy qui sans y penser auroit laissé échapper de ses mains vne coignée de laquelle vn passant auroit esté assené & tué. Il fera mourir le voleur, & absoudra celuy qui aura tué le voleur, en son corps défendant. Brief en toutes autres occurrences il distinguera, comme establi arbitre & estant neutre, le cas d'avanture d'avec le guet à pens, la bonne foy d'avec la rigueur du droit, sans jamais favoriser à male foy ni à trahison. Faisant autrement il ne sauroit acquerir à la verité le nom de Prince debonnaire. Pour certain, le berger est beaucoup plus misericordieux qui tue le loup que celuy qui le laisse aller: le Roy est trop plus debonnaire qui liure le coupable au bourreau, que celuy qui le deliure.

K.iiij.

Si lon execute à mort le coupable , par ce moyen plusieurs innocens sont garantis de la mort : Si on le laisse viure , dautant que ceste impunité rend & luy & d'autres (qui esperent obtenir la mesme grace) plus audacieux à commettre tout le mal qui leur vient en pensee, lon est coupable de la mort de tous les innocens, lesquels on tue par les mains de tels meurtriers. Il y a donc de la douceur au supplice de mort de quelques vns : & de la cruauté en la grace que lon fait à d'autres. Par ainsi, comme quelquesfois il est permis au Roy d'interpreter certains mots de la Loy , de laquelle il est conseruateur : aussi en tous Royaumes bien dressez il est enioint au Conseil d'Estat, & son deuoir le porte, d'examiner l'interpretation du Roy , & reigler la clemence & seuerité d'iceluy. Si par la corruption des hommes il est auenu que ces choses ne sont obseruees reellement & de fait : si est-ce que le droit demeure tousiours en son entier, & ne reste sinon de le faire valoir.

P O U R n'ennuyer le lecteur en luy entassant beaucoup d'exemples sur vn fait si bien verifié, cela a esté ainsi pratiqué au Royaume de France. Car nous auons veu souuentefois executer à mort ceux à qui le Roy auoit donné lettres de remission, & absoudre ceux qu'il commandoit estre mis à mort. Par fois aussi des crimes perpetrez en presence du Roy mesme, sont demeurez impunis, pource qu'il n'y auoit

auoit pas dauantage de tefmoins. Cela est auenu du temps de Henri second en la personne d'un quidam estrange, accusé d'un grand forfait par le Roy mesme. Et si quelque criminel a obtenu pardon du Roy par l'intercession de quelques amis, le Chancelier ayant conu du fait peut canceler les lettres. Si le Chancelier dissimule, encores faut-il que l'impetrant se presente aux iuges, lesquels doiuent considerer soigneusement si les lettres sont subreptices, & non seulement cela, mais aussi si elles sont ciuiles & legitimes. Quant au criminel, il ne se peut aider de ses lettres que premiere-ment il ne soit comparu au parquet de la iustice, mettant les genoux en terre, ayant la tefte nue, & se rendant prisonnier, tandis qu'on pese les raisons qui ont induit le Roy à donner ceste grace. Si elles ne sont suffisantes, le criminel est puni ne plus ne moins que si le Roy ne luy auoit point pardonné. Mais si on les enterine, il doit remercier non pas le Roy, mais l'equité de la Loy qui luy a sauué la vie. Ces procedures ont esté tresbien ordonnees, partie pour empescher les Rois armez de l'autorité publique de se venger de leurs inimiziez particulieres ou de quitter de son propre mouuement les outrages faits au public: partie pour garder que les suiets n'estimassent que lon pourroit obtenir quelque chose des Rois au preiudice des loix. Si ces choses sont mal obseruees de nostre temps, toutesfois ce que

nous auons dit demeure tousiours ferme, que ce sont les loix qui ont puissance de vie & de mort sur les habitans d'un Royaume, non pas les Rois qui ne sont qu'administrateurs & conseruateurs des loix.

*Les suiets
sont freres,
& nō pas
esclaues
du Roy.*

CAR aussi les suiets ne sont pas esclaves ni serfs du Roy, comme on parle: veu que ce ne sont prisonniers de guerre, ni gens achetez au marché: ains comme tous en vn corps sont Seigneurs, aussi chascun d'eux en particulier doiuent estre tenus comme freres & parens du Roy. Et afin que lon ne trouuē cela estrange, voici ce que Dieu mesme en dit, baillant

Deut.17.

15.20.

*An traité
de regim.
ciuit.*

la leçon aux Rois, Qu'ils n'esleuent point leur cœur par dessus leurs freres, d'entre lesquels ils ont esté choisis. Bartole, Iuriconsulte renommé, & qui viuoit en vn siecle qui a porté grand nombre de tyrans, a tiré vne conclusion de ceste loy, que les suiets ne sont point esclaves des Rois, ains freres: & qu'ils doiuent estre tenus pour tels. Aussi le Roy Dauid n'a pas honte d'appeller ses suiets de ce nom. Les anciens Rois estoient appelez Abimelech, mot Hebrieu qui signifie Mon pere le Roy. Dieu tout bon & tout puissant, duquel nous sentons tous les iours la grande douceur, & peu souuent la rigueur, & s'il nous frappe, quoy que ce soit iustement, si se monstre-il benin en donnant le coup, a voulu apprendre aux Princes ses lieutenans, qu'il faut entretenir les suiets par amour, & non par seuerité.

1.Chron.

28.2.

uerité.

uerité. Mais de peur qu'ils ne se courroucent contre moy, comme si par ceci lon retrâchoit quelque chose de leur domination Royale, qu'ils pensent que leur dignité estant de plus longue duree, on la doit iuger aussi plus grande. Or la crainte seruile est vn mauuais gardiẽ d'estat perdurable, veu que les suiets hayssent celuy qu'ils craignent, & quãd on porte mauuaise affection à quelqu'un, lon ne demande que d'en estre despesché. Au contraire, estant ainsi qu'il n'y a rien plus propre pour maintenir sa grandeur, que d'estre aimé, la bienueillance est de duree asseuree & immuable. Et pourtant le Prince quitient ses suiets comme freres, peut s'asseurer de viure en repos au milieu de tous dangers: mais celuy qui les traite comme esclaves ne peut viure qu'en crainte, sa condition ressemblant à celle d'un maistre qui seroit demeuré seul au milieu d'une troupe d'esclaves dedans vne forest. Car autãt que vn homme a d'esclaves, autant a-il d'ennemis. Presques tous les tyrans, tuez par leurs suiets, ont esprouué cela estre vray: & à l'opposite les suiets des bons Rois sont autant soigneux de la vie de leurs dominateurs que de la leur propre. A cela se doit rapporter ce qu'on lit en plusieurs endroits des liures d'Aristote, & qui a esté dit par Agesicles Roy de Sparte, Que les Rois commãdent comme les peres à leurs enfans, & les tyrans, comme les maistres à leurs esclaves: ce qu'il faut interpreter en tel

*Ciceron
au 2. liu.
des Of.*

*Platon au
8. liu. de
sa Repnb.
Seneque.*

fens que nous entēdions que la puissance paternelle cōsiste en pieté, nō point en rigueur, comme dit le Jurisconsulte Martian. Car ce qui estoit pratiqué entre les premiers anciens, que le pere pouuoit vendre & tuer sans reprehension ses enfans, n'a point de lieu auourd'huy entre les Chrestiens, & entre les Payens qui ont quelque humanité ne se pratique pas mesmes à l'endroit des esclaves. Ainsi donc le pere ne peut tuer son fils, que premierement il n'ait esté oui en ses defenses, autrement il est chastiable par la Loy Cornelia: & par la Loy Pompeia le pere n'est pas moins coupable qui aura tué son fils, que le fils qui aura meurtri son pere: à l'occasion dequoy l'Empereur Adriā relegua en vne isle vn pere qui auoit tué son fils à la chasse, lequel estoit mescreu d'abuser de sa belle mere. Quāt aux serfs ou esclaves, nous sommes admonestez en l'histoire sainte de les traiter comme freres, & par les profanes, de ne leur pas faire pis qu'aux mercenaires. Le droit civil des Egyptiens & des Romains, par la constitution des Antonins, condamne autant le maistre qui aura tué son esclave que celui d'autrui. Mesmes la Loy deliure de la puissance du maistre l'esclave qui n'aura esté assisté durant sa maladie & que le maistre aura laissé auoir faim: & le serf afranchi qui aura esté indignement outragé par son protecteur luy peut intenter action de crime. Or veu qu'il y a si grande difference entre les esclaves

*L. 5. D. de
parricid.*

*L. 2. ad
leg. Corne
liam de
Sicar. ubi
Vlp. l. 1. c.
de parricid.*

*Ecclesiast.
33. 31.*

*Diod. Sic.
cil. lib. 2.
ch. 2.*

*L. 1. D. de
his qui
sunt sui,
vel ad. in
ris.*

esclaves & les enfans legitimes entre les seigneurs & les peres, & neantmoins iadis entre les Payens il n'a esté permis aux maistres de traiter cruellement leurs esclaves: ie vous prie que dirons nous de ce pere du peuple, lequel s'escriera tragiquement avec Atreus, l'engloutiraymes enfans? En quelle estime aurons nous le Prince qui prend tel plaisir au massacre de ses suiets condamnez sans avoir esté ouis, qu'il en despesche plusieurs milliers en vn iour & ne se peut saouler de sang: brief, qui à l'exemple de Caligula (surnomé le Phaëthō du monde) desire souuēt q̄ sō peuple n'ait qu'une teste, afin de la pouoir abatre d'un seul coup? sera il point permis d'implorer le secours de la Loy contre vne telle fureur, & arracher à vn tel cōme à vn tyran le glaive qu'il a receu pour garder la loy & maintenir les bons, mais par luy desgainé à les esgorger & à ruiner les loix?

Voyons consequemment, si le Roy, que nous auons dit n'auoir puissance sur la vie de ses suiets, n'est point au moins seigneur de leurs biens. Pour le iourd'huy il n'y a langage plus cōmun à la suite des Princes, que de ceux qui disent que tout est au Roy. Dont il s'ensuit qu'en prenant quelque chose de ses suiets il ne tire que ce qui est le sien, & ce qu'il leur laisse monstre le soin qu'il a de leur donner moyen de se maintenir: & ceste opinion s'est tellemēt auancee en l'entendement de quelques Princes, qu'ils n'ont point de hôte de dire que tout

*Asavoir si
tous les
biens du
peuple ap-
partienēt
au Roy.*

le trauail & le gain de leurs pauvres ſuiets leur appartient, comme ſi c'eſtoient des bœufs qui labouraſſent la terre. La choſe va ainſi par eſſect, encores que le droit y repugne entiere-ment. Or il nous faut touſiours ſouuenir, que les Rois ont eſté creez pour le profit du peuple: que ceux qui procurent le bien du peuple ſont vrais Rois, & que les autres qui n'ont ſoin que de leur particulier ſont vrais tyrans, comme auſſi l'eſtime Ariſtote. Donques, eſtant ainſi que chaſcun aime ce qui eſt ſien, & pluſieurs meſmes conuoient le bien d'autrui, eſt-il vrayſemblable que les hommes ayent cherché vn maïſtre pour luy donner de gayeté de cœur tout ce qu'ils auroient amasſé avec grâde peine & à la ſueur de leurs viſages? faut-il pas pluſtoſt eſtimer qu'ils auront choiſi ce- luy qui leur a donné occaſion de penſer qu'il trauailleroit à maintenir iuſtice au riche & au pauvre eſgalement, à rendre à chaſcun le ſien, au lieu de l'aproprier à ſoy, à conſeruer le miel des abeilles, c'eſt à dire le labour de ſes ſuiets, pluſtoſt qu'à le mäger comme feroit vn bourdon inutile, brief qui au lieu de s'emparer des biens des particuliers, empescheroit tous ennemis quelconques de s'en ſaiſir? Mais que me chaut-il, dira le payſan, ſi c'eſt l'ennemi ou le Roy qui m'emporte mon bien, veu que l'vn me mäge auſſi biē que l'autre, & que ie meurs de faim, & ſuis reduit à l'extreme extremité auſſi toſt par vn gendarme du Royaume que
par

par le plus estrange du mōde , l'vn nettoyant
 ma grange, vuidant mes tōneaux, & ruināt ma
 maison , d'aussi grande furie que l'autre? Quel
 auātage y a-il pour moy d'estre tué de la main
 d'vn soldat Barbare, ou d'vn Romain, veu que
 ie demeure tousiours mort? Pourquoi appelle
 ray-ie le Barbare mō ennemi, si toy, qui es mō
 patriotte, trempes tes mains en mon sang? A
 quel propos nommeray-ie tyrā celuy qui viē-
 dra de loin m'oster la vie & les biēs, si toy qui
 t'appelles Roy me traites en la mesme sorte? Le
 di dauantage, que comme le parricide est vn
 crime plus horrible que le meurtre, aussi le for-
 fait d'vn Roy surpasse de beaucoup celuy d'vn
 ennemi, quand tous deux font vn dommage
 pareil. Que si en eslisant les Rois le peuple ne
 leur a pas donné ses biens, ains les leur a recō-
 mandez & baillez en garde, à quel tiltre les
 Rois pourrōnt-ils s'attribuer tels biens, sinon
 qu'ils alleguent le droit des brigands? Voila
 pourquoy les Rois d'Egypte n'estoyent point
 (selon le droit) seigneurs des biēs particuliers:
 mais ils l'ont eslé de fait, dit l'histoire, apres a-
 uoir receu les heritages, asauoir quād le peuple
 changea ses terres à du fromēt. Encores pour-
 roit-on disputer de ce cōtract: & reuoquer en
 doute la validité d'iceluy. Achab Roy d'Israel
 ne pouuoit pas contraindre Naboth de ven-
 dre sa vigne: & quand Naboth l'eust voulu
 vendre, la Loy de Dieu s'y opposoit. Les
 Empereurs Romains, qui ont vne puissance

Gen. 47.

20.

1. Rois 21.

1. & c.

*L. vendi-
tor. 13. D.
de com.
pried. di-
uid.*

*Seneca
liv. 7. des
benefices,
ch. 4. 5. 6.*

*L. nanc.
36. D. de
enictio-
nib.*

dẽsmesuree, n'eut toutesfois eu dauantage de droit. Auioird'huy l'õ ne sauroit trouuer Royaume, où il ne soit loisible aux plus petis de plaider en iustice contre le Roy, en telle sorte que bien souuent le Roy perd sa cause, ce qu'a- uenant il est tenu de satisfaire à la sentence. Et à cela n'est point contraire ce que quelqu'un des plus familiers des Empereurs ont escript, Que par droit ciuil toutes choses sont au Roy, & que l'Empereur est Seigneur absolu de toutes choses. Ces mesmes docteurs exposent leur dire en ceste sorte, c'est que la domination de toutes choses appartient aux Rois & la propriété aux particuliers : tellement que les vns possèdent tout par droit de commandement, les autres par droit d'heritage. Mais c'est vne chose commune entre les Iuriscultes, que si quelqu'un peut euincer vne maison ou nauire vniuersellement. Nous sauons que c'est vn don commun entre les Iuriscultes que si quelqu'un peut vendiquer vne maison ou nauire vniuerselle, il ne s'ensuit pas pourtant qu'il puisse estendre ce droit à tous les aix de la nauire, ou à toutes les pierres du bastiment. Et pourtant le Roy peut euincer de droit le Royaume d'Alemagne, de France, de Angleterre: & toutesfois il ne chassera pas vn hõme de biẽ de sa maison, si ce n'est par violẽce manifeste, veu que ce sont choses diuerses & que le droit distingue d'estre possesseur du total, & de toutes les pieces particulierement.

MAIS

MAIS le Roy est-il pas seigneur propriétaire du Domaine public ? Il nous faut traiter ce poinct vn peu plus exactement que le precedent. En premier lieu, notons qu'autre est le Domaine du fisque, autre le Domaine du Prince: autre, di-ie, le reuenu de l'Empereur, du Roy, du Prince, autre le reuenu d'Antonin, de Héri, de Philippe. Le reuenu du Roy est celuy qu'il possède en qualité de Roy: le reuenu d'Antonin est celuy que possède en vertu de ce nom sien, ayant receu de ceux desquels il est issu, l'vn, & du peuple, l'autre. Ceste distinction se rencontre souuent és liures du droit ciuil, où nous voyons la difference mise entre le patrimoine de l'Empire & de l'Empereur, entre le thresor public & celuy de l'Empereur: & que l'vn & l'autre ont leurs procureurs à part: qu'autres sont les administrateurs des distributions sacrees & publiques, autres ceux qui manient les particulieres & priuees: tellement que celuy qui en qualité d'Empereur sera preferé en hypothecque à vn particulier, quelque fois pourra estre postposé en qualité d'Antonin. Semblablement en l'Empire d'Alemagne, autre est le reuenu de Maximilian d'Austriche, & autre le reuenu de l'Empereur Maximilian: autres sont les thresoriers de l'Empire, autres ceux de l'Empereur: comme aussi il y a difference entre les seigneuries que les Princes possèdent des maisons de leurs ancestres & celles qui sont annexees aux dignitez Electorales.

L.j.

*As. moir si
le Roy est
proprietai
re du Roy-
aume:*

*L. bene à
Zenone. C.
de quad.
presc. l. v.
nu. de
qu. est.
Mag. lib.
12. C. l. 6.
scus. D. de
iure fisci.*

Mesmes entre les Turcs, les iardins & fonds de terre patrimoniaux de Selim s'ont autres que ceux du public: les vns seruās à l'entretènement de la table du Sultan, les autres n'estans employez qu'aux affaires de l'estat de Turquie. Or il y a des Royaumes, comme France, Angleterre & autres, esquels les Rois n'ont aucū patrimoine particulier, ains seulement le public qu'ils ont receu du peuple: & pourtant la distinction susmentionnee n'y a point de lieu.

Q V A N T aux biens qui apartiennent particulièrement au Prince, cela est hors de doute qu'il en est propriétaire comme les autres particuliers sont maistres de leurs biens, & selō le droit ciuil il les peut vendre, engager, & en disposer comme bon luy semblera. Mais quāt au bien du Royaume, que lon appelle coustumièrement le Domaine, les Rois n'en peuuent estre estimez ni appelez seigneurs propriétaires en sorte & maniere que ce soit. Car quoy? Si quelqu'un pour l'amour du troupeau t'a fait berger, t'a-il baillé licence d'escorcher, de despecer, de vendre & de transporter le bestail à ton plaisir? Encores que le peuple t'ait establi gouverneur & iuge d'une ville ou de quelque prouince, t'a-il donné puissance d'aliener, vendre ou iouer ceste ville ou prouince? Et veu qu'en alienāt une prouince lon aliene aussi le peuple d'icelle, t'a-il esleué en autorité, afin que tu le separasses des autres, que tu le prostituasses & rendisses esclauē à qui bō te sembleroit?

*L. Cum
seruus. 39.
§. ult. D.
de leg. 1. l.
vniuersi.
9. & l. seq.
C. de fun
do patrim.*

roit? Dauantage, ie demãde, si la dignité Royale est vn heritage ou vne charge? Si c'est vne charge, qu'a elle de cõmun avec vne proprieté? Si c'est vn heritage, est-il pas tel, qu'au moins il demeure en propre au peuple lequel en a fait bail? Brief, si le Domaine de l'estat public est appellé douaire, & à bõ droit, & tel douaire que si on le diuise & dissipe, c'est ruiner l'estat, le Royaume & le Roy: en vertu de quelle loy sera il loisible d'aliener ce douaire? Que l'Empereur VVéceslas soit vn sot, le Roy Charles sixiesme deuiene insensé, puis vède ou dõne le Royaume de Frãce ou vne partie d'iceluy aux Anglois: q̃ Malcolm Roy d'Escoffe espuise le domaine & les finances: que s'ensuiura-il de tout cela? Ceux qui ont esleu le Roy pour repousser les assaux des ennemis de dehors, deuiendront seruiteurs d'iceux ennemis par la folie du Roy: & les riches qui ont voulu asseuer leurs biens par telle election seront exposez en proye à tout le monde: ce qu'un particulier aura osté à soy-mesmes & à ses pupilles, cõme il se pratiqua en Escoffe, pour enrichir le public il ne faudra qu'un maquereau & courratier de sales voluptez pour attraper & engloutir tout cela. Mais si cõme nous auõs desia dit maintesfois, les Rois sõt creez pour l'vsage du peuple, quel sera cest vsage, si au lieu d'iceluy, l'abus est permis? Quel biẽ peuuēt apporter tāt de maux, & quel profit peut reuenir de tant de dõmages & dāgers? Si, di-ie, en voulāt pouruoir à ma liberté

& bonne santé, ie me rends esclauue moy-mesme, ie m'affuiettis de mon bō gré, ie m'expose à la licence d'un hōme, ie me mets les fers aux pieds? Pourtāt cōme cela est empraint en nous de nature, aussi le voyons nous aprouué par long vsage presques entre toutes natiōs, qu'il n'est pas permis au Roy de desgraissier l'estat public selon que sa fantaisie le conseillera: & que celuy qui fait autrement n'est plus estimé Roy, mais tyran.

I E confesse que quād les Rois furent instituez, il falut leur assigner quelques biens, tant pour entretenir leur grādeur royale, que pour fournir aux frais de leur train & estat. L'hōnesteté, & le biē du public, sembloit requerir cela. Car le deuoir d'un Roy estoit d'establis des Iuges en tous lieux, qui ne prendroyēt point de presens, ni ne vendroyēt la iustice: itē pour prester main forte au besoin à la iustice, & auoir gens prests pour cest effect, tenir les chemins asseurez, & rēdre le commerce libre, &c. S'il y auoit apparence de guerre, mettre garnisons és villes, les fortifier, tenir armee aux champs, & auoir ses arcenaux bien munis. On dit cōmunēmēt que lon ne sauroit obtenir la paix sans guerre, ni faire la guerre sans hōmes, ni entretenir les hommes sans gages, ni recouurer deniers sans exaction & tribut. Pour supporter donc les charges d'un estat en temps de paix, lō a ordōné le Domaine qui seruiroit de tribut pour la guerre: en telle sorte que si quel-
que

que grãde necessité le requeroit, l'õ fourniroit argent extraordinaire. La fin & le but de tout cela est le profit public, tellement que qui cõuertit ce Domainé à son particulier, ne merite aucunement le nom de Roy. Car, tefmoin l'Ap-
 postre, le Prince est seruiteur de Dieu pour le biẽ du peuple: à l'occafion dequoy les tributs & peages luy sont payez. Telle est la vraye source, ce sēble, de tous les ports, passages & peages des Romains, asauoir que les marchādises de prix apportees d'Inde, d'Arabie, d'Ethiopie, fussent voicturees seurement, & garanties des courses des escumeurs de mer, tellement aussi q̃ pour leur seureté la Republique de Rome tenoit en mer vne flotte biẽ armee. En ce rang faut mettre le peage de la mer rouge, les pôts, ports, passages & autres imposts, afin que les grands chemins (appelez pour cest effect Pretorians, Consulaires, Royaux,) fussent bien entretenus & nets de voleurs & coursfaires. Ceste charge apartiẽt au commissaire deputé par le Roy, de tenir la main à la reparatiõ des pôts publics, comme il appert par l'ordonnance de Loys le Debõnaire, touchāt les douze pôts sur la riuere de Seine, & cõmandant que les bacs à passer l'eau fussent tousiours prests. Quāt aux gabelles du sel, il n'y en auoit point alors: au contraire plusieurs particuliers estoient seigneurs d'vne grãd' partie des salines: & sēbloit que ce dõt nature faisoit ainsi present aux hõmes ne se pouuoit nō plus vēdre que la clairté,

*Rom. 13.**Plin. li. 19.
cha. 4.**Archid. in
Cā. si quis
Romipe-
tas & pe-
reg. 24.
q. 3. Bal.
in c. 1. §.
conuenti-
cula. de pa-
ce iure iur.
fir. l. 2. D.
ne quid in
loco publ.
viarum.
L. Magis
puto D. de
rebus co-
rum.*

le vent, & l'eau. Vn Roy nommé Lycurgus en la petite Asie, ayant commencé a mettre imposts sur les salines, on dit qu'elles tarirent soudainement, comme si nature eust fait entendre à haute voix qu'elle ne vouloit point souffrir qu'on restraignist ainsi sa liberalité.

O R combien qu'auionrd'huy, si lon en croid (comme Iuuenal se plaingnoit de Palphurius & d'Arnullatus Courtisans de son temps) les flatteurs, tout ce que la mer a de beau & de bon apartiét au fisque: si est-ce que le premier inuenteur de ce peage à Rome, asauoir le Censeur Liuius, qui en fut surnomé Salinator, c'est adire le Saulnier, ne fit cela sinon pour accommoder la Republique qui lors estoit reduite en grãde necessité. Pour ceste mesme cause le Roy Philippe le Lōg obtint en Frãce l'impost du sel pour cinq ans seulement: & chascun fait quels troubles ceste continuatiō d'impost engēdra. Il appert aussi que les tributs estoyēt employez à l'entretienement des gens de guerre, en ce que ce sont choses pareilles de rendre vne province stipendiaire & militaire. Voila cōme Salomon exige les tributs, asauoir pour fortifier les villes, & dresser vn arcenal public: ce qu'ayāt esté fait le peuple demande puis apres à Roboam d'estre deschargé de tels tributs. Les Turcs appellēt le tribut des provinces, le Sacré Sang du peuple, & estiment que ce soit vne chose du tout meschâte d'ēployer tels deniers à autre affaire qu'à la defence du peuple. A raisō dequoy tout ce que le Roy conqueste en guerre, c'est

1. Rois 9.
& 12.

Postel. au
3. liu. de la
Rep. des
Turcs.

pour le peuple & nō pour le Roy , pource que c'est aux despēs du peuple que la guerre se fait: comme ce qu'acquiert le facteur , c'est pour sō maistre. Mesmes s'il obtiēt quelque chose par mariage qui soit purement & simplement à sa femme , c'est au Royaume que cela est acquis: d'autāt que lon presume qu'il espouse ceste fēme en qualité de Roy, & nō pas entant qu'on le nomme Philippe ou Charles. A l'opposite, tout ainsi que les Roines ont part aux biēs que leurs maris, non encores paruenus à la courōne, ont acquis durāt le mariage, elles n'ont riē à ce qui a esté acquis ayās esté crecz Rois, pour ce que cela est estimé acquis des deniers publics, & non pas de ce qui appartient particulièrement à la personne du Roy. Il en fut ainsi iugé en France entre Philippe de Valois & Ieanne de Bourgongne sa femme.

M A I S afin que l'argēt ne soit tiré de la bourse du peuple pour estre employé à vsages particuliers, l'Empereur iure qu'il n'imposera peages ni tributs quelconques que par l'autorité des estats de l'Empire. Autant en promettēt les Rois de Pologne, de Hongrie & de Danemarch. Ceux d'Angleterre aussi par l'ordonāce d'Edouard premier. Iadis les Rois de Frāce imposoyent les peages en l'assemblée des trois Estats. De là est nee la Loy de Philippe de Valois , que lō ne cottise le peuple à tribut aucū, qu'en biē grāde necessité & du consentement des Estats. Mesmes ancienement les cueil-

lettres de ces deniers estoient serrees en des coffres par chasque diocese, & estoient ces coffres en la garde de gens choisis pour cest effect, (c'estoient ceux qu'on appelle auourd'huy les Elus) afin qu'eux-mesmes payassent les soldats enrrollez és villes de leurs diocesses: ce qui se pratiquoit de mesmes és autres pays, notamment en Flandres & és provinces voisines. Auourd'huy, encores faut-il que le Parlement y consente, autrement les tributs demandez ne sortent aucun effect. Dauantage il y a certaines provinces, qui ne sont tenues à rien que du consentement des Estats du pays, comme Languedoc, Bretagne, Prouence, Dauphiné & quelques autres. Toutes les Prouinces du pays bas ont le mesme priuilege. Finalement pour empescher que le fisque n'attire tout à soy, comme la ratelle qui fait secher les autres membres du corps, en tous lieux on baille au fisque sa portion. Puis donc que c'est chose notoire que ce qui a esté assigné ordinairement ou extraordinairement aux Rois, a saoir les tributs, peages & tout le Domaine, qui comprend les entrees, ports, passages, sorties, droits de regale, tailles, escheutes, confiscations, & autres droits de mesme nature, leur ont esté assignez afin de maintenir & garantir le peuple & l'Estat du Royaume, en telle sorte que si lon coupe tels nerfs il faut que le peuple trebusche, & en demolissant ces fondemens, le Royaume tombe tout à plat: il sen-
suit

fuit que celuy qui charge le peuple aux despēs du peuple, qui se veut enrichir au dommage du public & tue ses suiets de leur propre cousteau, n'est pas Roy. Au contraire le vray Roy est procureur des affaires & administrateur des richesses du public, non point Seigneur propriétaire d'icelles, & ayant aussi peu d'autorité d'aliener ou dissiper le Domaine que le Royaume mesmes. S'il se gouverne autrement, puis qu'il importe à la Republique que chascun se aide comme il faut de ce qui est sien, à plus forte raison est-il requis pour le bien public que celuy qui le manie s'y comporte comme il faut. Et pourtant si vn prodigue est mis par autorité de iustice entre les mains de ses parens & amis, & contraint de laisser manier ses affaires par autrui: à plus forte raison, ceux qui y ont interest, & qui ont charge de ce faire, peuvent oster toute administration au gouverneur de l'Estat qui mesnage mal ou réuerse entierement les choses, si après auoir esté auerti il ne se range à son deuoir.

Et quāt à ce que nous auōs dit qu'ē toutes legitimes dominations, le Roy n'est point seigneur propriétaire du Domaine, cela est aisé à prouuer. Sans rechercher les vieux temps, desquels nous auons le pourtrait en la personne d'Ephron Roy des Hethiens, quin'ose pas vendre vn champ à Abraham, sans la volonté du *Genes. 23.* peuple. Ce droit est aujourd'huy pratiqué en tous Estats publics. Auant que l'Empereur de

*Sleid.li.i.
 & la Bul
 le doree.*

*L.I. &
 passim, c.
 de con. re.
 alien Nau
 cler. an
 chron.*

*C. intelle-
 sto. de iu-
 reur. in
 Decret.*

Alemagne soit couronné, il promet de n'alie-
 ner, vendre ni engager rien qui appartiene à
 l'Empire ni au patrimoine de l'Empire. S'il
 recouure ou acquiert quelque chose par les ar-
 mes publiques, ce sera pour l'Empire & non
 pour soy. A cause dequoy, lors que Charles
 quatriesme promit à chascun des Electeurs
 cent mille escus afin qu'ils designassent Empe-
 reur son fils VVenceslas, d'autant qu'il n'auoit
 pas l'argent contant, il leur bailla pour gages
 les gabelles, peages, tributs, certaines villes, les
 droits & deuoirs de l'Empire: dont s'ensuiuit
 vne dispute bien aspre, plusieurs soustenans
 cest engagement estre nul. De fait il eust esté
 rescindé, sans le profit qu'en tiroient ceux qui
 deuoyent s'y opposer & maintenir l'Empire.
 Il auint aussi que VVenceslas qui n'estoit ca-
 pable de gouverner fut contraint de quitter la
 couronne Imperiale, sur tout à cause qu'il s'e-
 stoit laissé tirer des mains les droits de l'Em-
 pire sur la Duché de Milan. Il y a vne loy fort
 ancienne au Royaume de Pologne, defendant
 d'aliener les terres du Royaume, & qui a esté
 renouvellee par le Roy Louys, l'an mil trois
 cens septante cinq. Au Royaume de Hongrie
 il y en a vne semblable: tellement que nous li-
 sons qu'environ l'an mil deux cens vingt & vn
 lon se plaignit au Pape Honorius de ce que le
 Roy André auoit engagé les biens du Royau-
 me. En Angleterre, de mesmes, par loy d'E-
 douard, l'an mil deux cens nonante huiet.

Sem-

Semblablement en Espagne par ordonnance *Polydor.*
 faite sous Alfonse, & renouvellee l'an mil cinq *Virgil.*
 cens soixante aux Estats de Toledé. Ces loix *In Cod.*
 ont esté ratifiées, encores que long temps au- *Hisp. par.*
 parauant la coustume eust obtenu vigueur de *§. 1. §. Con*
 loy. *stit. 9.*

O R quant au Royaume de France, auquel
 ie m'arreste vn peu plus long temps, pource
 qu'il est comme le patron des autres, ce droit
 est tousiours demeuré inuiolable. C'est vne
 des plus anciennes loix du Royaume, & vn
 droit né avec le Royaume mesmes. Que le Do
 maine ne soit aliéné: laquelle loy (quoy que
 mal obseruée) fut renouvellee. Il y a deux cas
 exceptez, l'Apennage des enfans ou des freres
 du Roy, en telle sorte que le droit de vassal
 lage demeure tousiours: item, si les affaires *Papon en*
 de la guerre requierent necessairement ceste *ses arrests,*
 alienation, toutesfois avec paction redhibi- *li. 5. tit. 10.*
 toire. Iadis ni l'vn ni l'autre n'estoit valable *Art. 4.*
 que par le commandement des trois Estats:
 auourd'huy, que le Parlement a esté ren- *§. 5. 11. &*
 du sedentaire, si le Parlement de Paris, *16. de l'e-*
 qui est la cour des Pairs, & si la Chambre *dit faire*
 des contes & du thresor ne l'ont premie- *l'an 1566.*
 rement approuué: comme portent les Edits
 des Rois Charles sixiesme & neufiesme. Cela
 est si certain, que mesmes si les anciens Rois
 de France vouloyent fonder quelque Egli
 se, encores que ce fust lors vne entreprinse
 fort fauorable, ils estoient tenus d'auoir

Amoinus
li. 4. ch. 10.
41. &c.

L. peto. 69.
§. pradiu.
D. de leg.
2.
L. d. 1329.
1360.
1374.
1401.
1483. 1522.
1531. 1549.
1560. Et
par plu-
sieurs av-
rests de la
Cour.

le consentement des Estats : tesmoin le Roy Childebit, qui n'osa fonder l'Abbaye de S. Vincent à Paris, sans le cōsentement des François & Neustrasiens. Clouis second & autres Rois ont observé le mesme. Ils ne peuvent pas mesme quitter le droit de regales ou la nominatiō des prelatz à quelque Eglise que ce soit. Si aucuns d'entre eux l'ont fait, comme Louys onzième, Philippe quatrième & Philippe surnommé Auguste l'ont fait en faueur des Eglises de Sens, d'Auxerre & de Nevers, le Parlement a declairé tout cela nul. Quand le Roy est sacré à Reims il iure d'observer ceste Loy: & s'il l'enfreint, ce qu'il fait a autant de valeur que s'il contractoit pour vendre ou acheter les pays du grād Turc ou du Sophi. De là sont nees les constitutions ou ordonnances de Philippe sixième, de Jean second, de Charles cinquième, sixième, huitième, par lesquelles ils reuoquent toutes alienations faites par leurs deuanciers. En l'assemblée des Estats de Tours, où estoit en personne le Roy Charles huitième furent rescindees plusieurs alienations faites par Louys onzième, & osta-on aux heritiers de Tancred du Chastel, son grād mignon plusieurs places qu'il luy auoit dōnees de sa propre autorité. Cela fut ratifié finalement aux derniers Estats tenus à Orleans.

VOILA quant au Domaine du Royaume. Mais afin que lon voye encores mieux que le Royaume est preferé au Roy, & qu'iceluy ne
 peut

peut de sa propre autorité diminuer la maiesté qu'il a receüe du peuple, il ne peut afranchir de sa domination vn seul suiet, ni quitter la souueraineté de la moindre portion de son Royaume. Charlemagne a quelquesfois essayé d'affuiettir le Royaume de France à l'Empire d'Alemagne: à quoy les François s'opposèrent viuement par la bouche d'un Prince de Gascongne, & en fust-on venu aux mains, si Charlemagne eust entrepris de passer outre. Semblablement, lors qu'on bailla aux Anglois vne portion du Royaume, la souueraineté estoit presquetousiours exceptee. Et si quelquesfois ils l'ont obtenue par force, comme il auint au traité de Bretigny, par lequel le Roy Iean quitta la souueraineté de Gascongne & de Poictou: mais il ne garda pas cest accord, & n'y estoit aussi non plus tenu qu'un tuteur ou curateur prisonnier (comme il estoit lors) qui pour se racheter engageroit les biens de ses pupilles. En vertu de ce mesme droit, le Parlement de Paris cassa le traité de Conflâs, par lequel le Duc Charles de Bourgongne auoit tiré des mains du Roy Amiens & autres villes voisines en Picardie. De nostre temps, le mesme Parlement a declairé nul l'accord fait à Madric entre François premier lors prisonnier, & Charles cinquiesme, touchant la Duché de Bourgongne. Mais la donation faite du Royaume de France, par Charles sixiesme à Henri d'Angleterre, en cas de mort, est vn suffisant

Paul. Æmyle, li. 3.

L'an 1195

1200.

1269.

1297.

1303. 1325

1330.

L'an 1360

L'an 1405

L'an 1525

L'an 1420

Monstrelet, ch. 225

*L. liber ho
mo. 103.
D. de
verb. obl.
l. si emptio,
34. §. 1.
D. de cōtr.
empt. l. pe-
nult. C. de
op. libert.*

tesmoignage de ce que dessus, & de l'extreme folie de Charles. Sans produire d'autres tesmoignages exemples & raisons à ce propos, en vertu de quoy le Roy pourroit-il donner ou vendre le Royaume ou vne partie d'iceluy, veu que tel bien consiste en peuple non point en murailles? Or on ne peut faire vente, troque, ni trafic de personnes libres: veu mesmes que les protecteurs ne peuuent contraindre leurs afranchis de choisir domicile ailleurs que là où bon semblera à ces afranchis. Ce qui est d'autant plus recenable en ce fait, que les suiets ne sont ni esclaves, ni serfs afranchis, ains freres: & nō seulement freres du Roy vn par vn, mais aussi que tous confiderez en vn corps sont & doiuent estre appelez Seigneurs du Royaume.

*Asavoir si
le Roy
est vsufroi-
ctier du
Royaume.*

MAIS si le Roy n'est point Seigneur propriétaire, aumoins on peut l'appeller vsufroi-ctier du Royaume & du Domaine. Je di qu'il n'en est point vsufroi-ctier. Celuy qui a l'vsufroi-ct d'une chose la peut engager. Or nous auons dit que les Rois ne peuuent engager le patrimoine du fisque ou Domaine du Royaume. L'vsufroi-ctier peut donner de son fruit à qui, comme & quand bon luy semble. Au cōtraire les dons immenses des Rois sont estimez nuls, on n'allouë pas ses despenses inutiles, on raye les superflues, & tient-on qu'il a ravi tout ce qu'il a employé ailleurs qu'au bien public. Et n'est pas moins respōsable à la loy Ciucia, que le moindre des citoyēs Romains ancienmēt:

en

en Frâce sur tout, les dons du Roy ne sont val-
lables sans le consentement de la chambre des
contes. De là sont nees les postilles de la cham-
bre ordinaire en la reddition des contes du
temps des Rois prodigues, *Trop donné: Soit re-
peté.* Ceste mesme chambre, iure solennelle-
ment de ne passer rien qui preiudicie au Roy-
aume & à l'Estat public, quelques lettres que
le Roy luy en escriue. Mais elle ne se souuiet
pas tousiours de ce serment, si bien qu'il seroit
à desirer. En apres, la loy ne se soucie pas com-
ment vn vsufriictier possede & gouuerne ses
fruits: mais au contraire elle prescrit au Roy
comment & à quel vsage il les doit employer.
Voila pourquoy les anciens Rois de France e-
stoyent tenus de faire quatre parts du reuenu
Royal. La premiere estoit employee à l'entre-
tenement des ministres de l'Eglise & à la nour-
riture des pauvres: la seconde estoit pour la ta-
ble du Roy: la troisieme pour les gages de ses
officiers & seruiteurs domestiques: la quatrief-
me pour la reparation des ponts, chasteaux
& maisons Royales. S'il y auoit quelque re-
ste on le mettoit aux coffres de l'Espargne.
Au reste, les histoires descriuent amplement
les troubles auenus enuiron l'an mil quatre
cens douze, és Estats assemblez à Paris, à cause
que Charles sixiesme auoit despensé tout
l'argent du Domaine aux menus plaisirs
de luy & de ses mignons, & que les con-
tes de la maison du Roy, qui auparauant

*Monstre
en la vie
de Char-
les 6.*

n'auoyent excédé la somme de nonante quatre mille francs, montoient en ce miserable estat du public alors à la somme de cinq cens quarante mille francs. Or comme le Domaine estoit employé aux affaires susmëtionnez, aussi les aides n'estoyent que pour la guerre, & les tailles assignees pour le payemët des gens-d'armes, & nō pour autre chose. Es autres Roy-aumes le Roy n'a pas plus d'autorité, & en plusieurs en a-il encores moins, spécialement en l'Empire d'Alemagne & en Pologne. Mais nous en auons fait la preuue sur le Royaume de France, afin que lon ne pense qu'iceluy ait quelque prerogatiue par dessus les autres, sous pretexte que lon s'y dōne beaucoup de licence sur le public.

Ex Con-
cil. Valët.
in c. i. de
his que
fiunt à
prelat. abs
que con-
fessu capit.
E n somme, comme dit a esté ci deuant, ce nom de Roy ne signifie point heritage, ni propriété, ni vsufruct, ains charge & procuration. Comme l'Euesque a esté esleu pour auoir soin du salut des ames, aussi le Roy a esté establi pour conseruer les corps & biens du peuple, entant que cela concerne le bien public: l'un est dispensateur des biens celestes, l'autre des profanes: & tel droit que l'un a és biens Episcopaux, l'autre l'a pareil & non plus grād au Domaine. Si l'Euesque aliene les biens de l'Euesché sans le consentemët du chapitre, ceste alienation n'est valable: Si le Roy aliene le Domaine sans le vouloir des Estats, cela est de nul effect. Vne portion des biens Ecclesiastiques

stiques doit estre employee à la reparation des temples, la seconde à l'entretienement des pauvres, la troisieme est pour les gens d'Eglise, & la quatrieme pour l'Euesque: nous auons veu ci dessus que le Roy doit faire quatre parts des reuenus du Domaine de son Royaume. Cela ne peut estre enfreint par l'abus que nous y voyons auiourd'huy: car encores que la pluspart des Euesques rauissent aux pauvres le bien qu'ils donnent à leurs maque-reaux, & quoy qu'ils ruinent les campagnes & les forests, la charge d'Euesque n'est changee pourtant. Combien que certains Empe-reurs se soyent attribué vne puissance absolue, si n'en est-il rien, attendu que nul ne peut estre iuge en sa propre cause. Si quelque Caracalla se vante qu'il n'aura pas faute d'argent, tandis que l'espee demeurera en sa puissance, l'Empereur Adrian promettra au contraire de administrer tellement sa charge qu'il se sou-uiendra que le bien public n'est pas à luy, ains au peuple. Voila presque la difference entre le Roy & le tyran. Encores qu'Attalus Roy de Pergame ait institué le peuple Romain heritier de son Royaume, & que Alexandre Roy d'Egypte, Ptolomee Roy de Cyrene, Prasutagus Roy des Icenians, ayent legué leurs pays au peuple Romain & à Cesar: cela ne sert de rien à ceux lesquels vsurpent vne puissance qui ne leur appartient pas. Telle violence ne peut afoiblir la vertu du droit: au contraire, plus

Florus
lin. 2.
Tacitus
lin. 14.

elle est grande, moins offense-elle ce droit. Car ce que les Romains empietoient sous couleur de iustice, ils l'eussent enuahi à force d'armes si le pretexte leur fust defailli. Nous voyōs presques de nostre temps que la Seigneurie de Venise s'est emparee du Royaume de Cypre sous couleur de ie ne say quelle imaginaire adoption, laquelle estoit vne chose faite pour rire, s'ils ne s'en fussent fait croire par le tefmoignage des armes. A ce que dessus aussi n'est point contraire la pretendue donation de Constantin au Pape Syluestre: car ceste paille du decretiste Gratian est toute vsee & dès lōg temps reduite en cendres. Encores moins y contredit la donation que Louys le Debonnaire fit au Pape Paschal de la ville de Rome & d'une partie d'Italie: car dautant qu'il donnoit ce qu'il ne possedoit pas, personne ne s'y opposa. Mais quand Charlemagne son pere voulut enclauer & assuiettir le Royaume de France à l'Empire d'Alemagne, les François s'y opposerent à bon droit: & s'il eust perseueré en ceste volonté, eux estoient resolus de l'en empescher & se defendre avec les armes. On ne peut non plus se servir du fait de Salomon, lequel nous lisons auoir baillé vingt villes à Hiram Roy de Tyr: car il ne les luy donna pas, ains ce fut pour seureté de paiement des talens d'or que Hiram luy auoit prestez: aussi les retira-il au bout du terme, comme il appert par le texte des Chroniques. Dauanta-

*Volater.
liii.3.*

*1. Rois 9.
11.*

*2. Chron.
8.2.*

ge le fond de terre estoit sterile & cultiué par le reste des Chananeens: mais Salomon ayant reprins le tout des mains de Hiram les bail-la pour habiter & cultiuer à des Israelites. Ne sert non plus d'alleguer qu'en quelques Roy-aumes le Roy & le peuple ne traitent pas cest accord en termes expres. Car, posé le cas que on n'en face aucune mention, il appert tou-tesfois par le droit naturel, que les Rois ne sont pas ordonnez ruineurs ains gouver-neurs des Républiques, qu'ils ne peuvent par conuentions quelconques alterer le droit pu-blic, & quoy qu'ils soyent Seigneurs, ne peu-uent toutesfois estre en autre rang que sont les tuteurs qui ont charge de pupilles: & que lō n'estime pas seigneur celuy qui priue l'estat de sa liberté, & le vëd cōme si c'estoit vn esclau. On ne peut aussi alleguer qu'il y a quelques Royaumes acquis par les Rois mesmes, dau-tant qu'ils n'acquierent rien par leurs forces ou richesses, ains avec les mains & moyens du public: & n'y a rien plus raisonnable que de di-re que les choses acquises des deniers & dan-gers de tout le public ne doyuent point estre alienees, sinon par le consentement des Estats qui representent le public. C'est vn droit qui a vigueur & est pratiqué mesmes entre les larrons & voleurs. Qui fait autrement, il dissipe la societé humaine. Et pourtant enco-res que les François ayent occupé par armes l'Empire d'Alcmagne & la Gaule, toutesfois

L. 2. §. ius reipub.

D. de ad-minist. rer.

ad ciuit. pert. L.

tutor 27.

D. de ad-min. tu-tor.

L. si fun-dum. §. si

tutor. D.

depositi.

Expres-sus Ex-tranag.

de re iu-dicac.

intellecto.

L. 2. & passim, C.

de interd. com. re a-lienat.

ce droit susmentionné demeure tousiours en son entier. Concluõs pour la fin, que les Rois ne sont propriétaires ni vsufructiers du Domaine, ains administrateurs seulement: & puis qu'il est ainsi, ils ne se peuuent attribuer la propriété, ni l'usage, ni le fruit des biens appartenans aux particuliers, moias encor de ceux du public qui sont en la puissance des villes & communautés.

1. Sam. 8.
7, 9. 14.

MAIS auant que passer plus outre, il nous faut icy resoudre vne difficulté. Le peuple Israélite ayant demâdé vn Roy, le Seigneur dit à Samuel, escoute la voix du peuple: cependant fay leur entêdre quel sera le droit du Roy qui regnera sur eux. Alors Samuel declare entre autres parties de ce droit, que le Roy s'emparera des champs, vignes & arbres des particuliers pour s'en accômoder & enrichir ses seruiteurs: brief qu'il rendra le peuple esclau. On ne sauroit dire combien nos Courtisans d'aujourd'huy font valoir ce texte, encores qu'au demeurant ils tiennent autât de compte de toute l'Ecriture sainte que d'une fable. En ce passage Dieu veut descouurir aux Israelites leur legereté, en ce qu'ayans leur Seigneur souverain tousiours au milieu d'eux, qui leur dônnoit des bons & sages iuges & chefs de guerre quâd on les luy demandoit, toutesfois aimoyent mieux s'assuiettir au cômmandement d'un pauvre hôme muable & mortel, qu'à la ferme domination de Dieu immortel & immuable. I
leur

leur fait donc sauoir que le Roy est esleué en vn lieu merueilleusement glissant, & veut que ils considerent que la puissance trop grande se conuertit aisément en violēce, & que le gouuernement royal deuiant bien tost tyrannique: veu que le Roy qu'il leur baillera, desgainera l'espee contre eux, abusera de son autorité, & pour toutes loix n'aura que la violence: & puis qu'ils attirent ce mal sur eux de leur franche volonté, qu'ils le sentiront, mais trop tard, & lors qu'il n'y aura plus de remede. Brief ce texte ne descrit pas le droit des Rois, ains le droit que les Rois ont accoustumé de s'attribuer: & non pas ce qu'ils doyuent faire pour biē s'acquitter de leur deuoir: mais ce qu'ils vsurpent souuentefois en tresmeschante conscience. Ce que ie viē de dire se peut aisément verifier par le dixseptiesme chapitre du Deuteronomie, où Dieu donne la Loy aux Rois. Samuel dit ici que le Roy tiendra ses suiets comme esclaves: là Dieu defend au Roy d'esleuer son cœur par dessus ses freres, c'est à dire d'estre insolent à l'endroit de ceux qu'il doit tenir aussi chers que son propre sang. Il fera des chariots, armera gens de cheual, s'emparera du bien des particuliers, dit Samuel: au contraire en Deuteronomie il est exhorté de ne faire amas de cheuaux, de n'amasser or ni argent, ni de remener le peuple en Egypte, c'est à dire en seruitude. En Samuel nous voyons depaint au vif ce mal-heureux Achab, qui se saisit mes-

M.iiij.

chamment de la vigne de Naboth: au Deuteronome, ie contemple David, qui estime faire mal de boire l'eau puissee au hazard de la vie des siens. Samuel predit que le Roy demandé par les Israelites pour conseruer les loix, se gouvernera à sa fantaisie: au contraire, Dieu commande que sa Loy soit mise par les Sacrificateurs entre les mains du Roy, pour en prendre copie luy mesme, & l'auoir continuellement deuant ses yeux. Pour ceste raison, Samuel qui estoit souuerain Sacrificateur, baille à Saul ceste loy Royale contenue au dixseptiesme du Deuteronome, descrite en vn volume: ce qu'il n'eust pas fait, si c'eust esté chose permise au Roy de la violer. En somme, c'est cōme si Samuel eust dit, vous auez demâdé vn Roy à l'exemple des autres nations, lesquelles pour la pluspart sont mastinees par des tyrans. Vous desirez vn Roy qui vous administre iustice: mais plusieurs d'entre eux estiment tout ce qu'ils veulent leur estre loisible. Cependant vous delaissez de gayeté de cœur le Seigneur Dieu, la volonté duquel est l'infailible reigle de iustice.

*Herodot.
liu. I.*

IL y a dedans Herodote vne histoire, laquelle monstre assez combiē aisément le gouvernement Royal degenerate en tyrannie, dont Samuel aduertissoit le peuple si expressément. Deioces fort renommé à cause de sa iustice est premierement esleu iuge entre les Medes: tost
après

apres, afin de pouuoir reprimer ceux qui voudroyent faire teste à iustice, on l'eslit Roy, avec autorité suffisante. Il demande des gardes, puis le Chasteau d'Ecbatane est basti à sa sollicitation pour le garantir des embusches & machinations des rebelles. Cela fait il ne pense sinon à se venger des moindres desplaisirs qu'on luy auoit faits. Finalement, personne n'ose regarder ce Roy au visage, ni rire, ni cracher en sa presence à peine de rude chastiment. Tant c'est chose perilleuse de bailler trop grande licence à vn homme qui ne se peut retenir, comme la pluspart des hommes sont de ce naturel! Ainsi donc Samuel ne veut pas dire au passage sus allegué que la puissance du Roy soit absolue: au contraire il procure que le peuple sache qu'il y a bien grand danger de attribuer trop de puissance, à la volonté desreglée d'un homme. Il n'exagere point la puissance Royale, ains veut qu'elle soit retenue en deuoir: il n'ottroye point vne licence effreneée au Roy, ains plustost conseille couuertement qu'on le retiene en bride. Il semble que la harangue de Samuel ait grandement serui aux Israclites, attendu qu'ils ont moderé la puissance de leurs Rois: ce que toutes nations deuenues sages ou à leurs despens ou aux despens & à l'exemple d'autrui, ont bien executé, comme il se verra par les discours qui s'ensuiuent.

De l'al-
liance en-
tre le Roy
& le peu-
ple.

Deut. 17.

1. Sam.

10. 25.

1. Chron.

11. 3.

2. Rois 11.

17. & 12.

2. Chron.

23. 3.

2. Rois 23.

3.

NOUS auons dit qu'en l'establisement du Roy, deux alliances auoyent esté contractees: la premiere entre Dieu, le Roy, & le peuple, dequoy a esté parlé ci dessus: la seconde entre le Roy & le peuple, dont il faut dire quelque chose maintenant. Apres que Saul fut establi Roy, la loy Royale luy fut baillee, selon laquelle il deuoit commander. Dauid traite alliance en Hebron deuant le Seigneur, c'est à dire, prenant Dieu pour tesmoin, avec tous les Anciens d'Israel, qui representoyent le corps du peuple: quoy fait il est sacré Roy. Ioas fit aussi alliance avec tout le peuple de la terre, en la maison du Seigneur, Ioiadas Souuerain Sacrificateur portant la parole: & dit l'histoire que le tesmoignage (que plusieurs exposent estre la Loy de Dieu) luy fut imposé avec la couronne. Sèblablement Iosias promet d'observer les commandemens, tesmoignages & statuts cõpris au liure de l'Alliance: & par ces mots sont entendues toutes choses appartenâtes à la conseruation de la premiere & seconde table de la Loy de Dieu. En tous les passages susmentionnez de l'Histoire sainte, il est dit qu'Alliance a esté traitée avec tout le peuple, avec toute la multitude, avec tous les anciens, avec tous les hommes de Iuda: afin que nous sachions, comme aussi cela est exprimé, que non seulement les chefs des lignees, mais aussi tous les Milleniers, Centeniers & Magistrats subalternes se trouuerent là au nom des villes, cha-

chascune desquelles traitoit avec le Roy. En ceste assemblée il estoit question de creer vn Roy : car le peuple faisoit le Roy, non pas le Roy le peuple. Et est certain que le peuple stipuloit, le Roy promettoit. Or en termes de droit celuy qui stipule est par dessus celuy qui promet. Le peuple demandoit au Roy, sauoir mon s'il vouloit pas regner iustement & selon les Loix? Il promettoit qu'Ouy. Alors le peuple respondoit & promettoit rendre fidele obeissance à celuy qui commanderoit iustement. Et pourtant le Roy promettoit purement & simplement, le peuple sous condition: laquelle defaillant d'estre accomplie, le peuple demeurait selon tout droit & raison deliure de sa promesse. En la premiere Alliance, il y a obligation à Pieté: en la seconde à Iustice: par ceste-la le Roy promet d'obeir religieusement à Dieu: par ceste-ci, de commander iustement au peuple: par l'une il s'oblige de procurer la gloire de Dieu: par l'autre le profit du peuple. En la premiere il y a ceste condition, Si tu observes ma Loy: en la seconde, Si tu gardes à chascun le droit qui luy appartient. Dieu proprement est le protecteur & vengeur de la premiere, si elle n'est accomplie: quant à la seconde, c'est legitimement à tout le peuple ou aux Estats qui le representent & doyuent maintenir, que ceste autorité de reprimer le defaillant, appartient.

C E L A a tousiours esté ainsi pratiqué en

*Xenoph.
au 8. li. de
l'instru-
ction de
Cyrus.*

tous Estats bien reiglez. Apres les sacrifices deuëment paracheuez, les Perles traitent avec Cyrus l'accord qui s'ensuit. En premier lieu veux-tu, toy Cyrus, promettre d'employer toutes tes forces pour secourir le pays, si quel- qu'un veut faire la guerre aux Perles? L'ayant promis, ils adioustent incontinent, Aussi nous Perles promettons te tenir main forte pour reprimer quiconque ne te voudra obeir quand tu garderas le pays. Xenophon appelle cest accord confederation, comme aussi Isocrates ap- pelle harangue de confederation ce qu'il a es- crit du deuoir des suiets enuers leur Prince.

*Xenoph.
au traitté
de la Re-
pub. des
Lacede-
moniens.*

L'alliance ou confederation se renouuelloit tous les mois entre les Rois & Ephores de Sparte, encores que les Rois fussent sortis de la race de Hercules. Et commès Rois pro- mettoient solennellement de regner selon les loix du pays: les Ephores iuroient aussi qu'ils entretiendroyent le Royaume en la main des Rois, tandis qu'iceux tiendroyent leur pro- messe. Semblablement au Royaume de Ro- me, il y eut alliance entre Romulus, le Senat & le peuple, telle qui s'ensuit: c'est asauoir que le peuple feroit les loix, lesquelles le Roy gar- deroit: le peuple decerneroyent la guerre, le Roy la feroit. Or combien que plusieurs Em- pereurs, plustost par violence & ambition que de droit aucun, se soyent saisis de l'Empire Ro- main, & que par vne loy surnommee Royale ils se soyent attribué vne puissance absolue:

tou-

toutesfois les fragmens qui restent de ceste loy, tant és liures qu'és inscriptions Romaines, monstrent assez qu'ils auoyent charge & autorité de gouuerner & maintenir la Republique, non pas de la renuerfer & opprimer par tyrannie. Dauantage, les bons Empereurs ont declairé qu'ils estoient obligez aux loix, & qu'ils tenoyent l'Empire du Senat, auquel ils rapportoyent les causes de consequence, estimans que ce seroit outrepasser leur deuoir de faire chose concernant le bien public, sans l'auis de ce Senat.

Si nous considerons les Empires, Royumes & Estats d'aujourdhuy, il n'y en a pas vn, où telle paction ne se face entre le Prince & les suiets. Il n'y a pas long temps qu'en l'Empire d'Alemagne le Roy des Romains estant prest à estre couronné Empereur, estoit tenu de faire hommage & prester serment à l'Empire, ne plus ne moins que le vassal à son seigneur lors qu'il est inuesti du fief. Or combien que les paroles de son serment couchées par les Papes ayent esté quelque peu chāgées, toutesfois la mesme chose demeure tousiours.

Suiuant quoy nous sauons que Charles cin- *Specul. Sa*
quiesme de la maison d'Austriche fut esleu *xonic. lib.*
Empereur sous certaines conditions, comme *3. art. 54.*
aussi ses succeffeurs: desquelles le sommaire estoit, Qu'il gardera les loix ia faites, n'en fera point de nouuelles sans l'auis des Electeurs, gouuernerá les affaires du public par l'auis de

Sleid. lin.

1. & 2.

tous les Estats, n'engagera rien de ce qui appartient à l'Empire, & autres choses qui sont recitees par le menu par les historiens. Lors que l'Empereur est couronné à Aix, l'Archeueque de Cologne luy demande en premier lieu, S'il maintiendra pas l'Eglise, s'il promet pas de administrer iustice, cōseruer l'Empire, maintenir les vesues, orphelins, & autres personnes dignes de compassion? Apres auoir fait ceste promesse solennelle deuant l'autel, les Princes & ceux qui representent l'Empire sont enquis s'ils veulent pas luy promettre le mesme. Au reste, l'Empereur n'est pas sacré, ni ne reçoit l'espee ni autres ornemens de l'Empire, que preallablement il n'y ait fait ce serment. Dont il s'ensuit que l'Empereur est obligé purement, & les Princes de l'Empire sous condition. Quiconque aura ouy parler des ceremonies obseruees depuis peu de temps en l'election & couronnement de Henri Duc d'Anjou, connoistra que le mesme est pratiqué au Royaume de Pologne: & specialement lors que la condition de maintenir les deux religions Reformee & Romaine fut mise en auant, & qu'en termes expres les Seigneurs du Royaume luy en demanderent par trois fois promesse solennelle, laquelle il fit aussi par trois fois. Le mesmes' obserue és Royaumes de Boheme, Hongrie, & autres: ce que nous ne descriuons par le menu, afin d'euiter prolixité.

OR ceste stipulation entreuient non seulement

ment és Royaumes où le droit d'Electiõ est demeuré en son entier iusques à present: mais aussi en ceux, que lon estime estre purement hereditaires. Quand le Roy de France est sacré & couronné, les Euesques de Laon & de Beauuais, Pairs Ecclesiastiques, demandent au peuple là present, s'il desire & commande que celui qui asiste lors, soit Roy? & le formulaire du sacre porte qu'il est lors esleu par le peuple. Le peuple ayant donné signe de consentir à cela, le Roy iure, qu'il conseruera tous les droits, priuileges & loix de France vniuersellement, qu'il n'alienera point le Domaine, & autres articles qui ont esté changez & tellement agencez depuis qu'ils different grandement d'auec le formulaire estant en la bibliothecque du Chapitre de Beauuais, suiuant lequel on trouue que le Roy Philippe premier du nom presta le serment: ce neantmoins ils sont assez disertement exprimez. Aussi n'est-il pas ceint de l'espee, ni oinct, ni couronné des Pairs, qui portent lors des chapeaux de fleurs sur leurs testes, & ne reçoit le sceptre & la verge de iustice ni n'est proclamé Roy que premierement le peuple ne l'ait commandé: & les Pairs ne luy prestent serment sinon apres qu'il leur a promis de garder soigneusement les loix. Icelles sont, qu'il ne dissipera point le Domaine, qu'il n'imposera de son propre mouuement peages, ports, ni tributs: ne fera paix ni guerre, ni chose aucune concernant le pu-

blic que par l'avis des Estats. Item qu'il lairra au Parlemēt, aux Estats, aux officiers du Royaume leur autorité, & tout ce qui a esté tousiours obserué au Royaume de France. Quand il entre en quelque ville ou province, il est tenu de confermer les priuileges d'icelle, & iurer qu'il maintiendra les loix & coustumes d'icelles. Cela est estroittement obserué à Thoulouse, à la Rochelle, en Dauphiné, en Prouence & en Bretagne, lesquelles villes & provinces ont des conuentions expressees avec les Rois, ce qui seroit frustratoire, si la condition couchée au contract n'estoit valable. On lit encores aujourd'huy le serment des anciens Rois de Bourgongne, en ces termes ci, Je garderay à tous Loy, iustice & protection. On pratique en Angleterre, en Escosse, en Suede, en Danemarch le mesme qu'en France: mais il n'y a endroit où lon y tiene mieux la main qu'en Espagne. Car au Royaume d'Aragon, apres plusieurs ceremonies paracheuees entre celuy qui represente la iustice d'Aragon ou la maiesté du public, esleué en vn haut siege, & le Roy qui doit estre sacré, qui promet fidelité & qui fait hommage: puis ayant leu les loix & conditions à l'accomplissement desquelles il est obligé, finalement les Seigneurs du Royaume parlent au Roy, en la sorte qui a esté descrite ci dessus, page 121. Nous qui valons autāt que vous, & qui pouuons plus que vous, vous eslisons Roy à telles & telles conditions: & y

en à vn entre vous & nous qui commande par dessus vous. Mais afin qu'il ne pense auoir iuré par maniere d'acquit ou pour obseruer la coustume ancienne, de trois en trois ans en plaine assemblée d'estats ces mesmes paroles luy sont repetees. Et si sous pretexte de sa dignité royale il vient à faire de l'insolêt, & viole les loix, ou ne tient compte de sa promesse : lors par le droit du Royaume il est estimé excommunié aussi execrablement que le fut iadis Iulian l'Apostat. Ceste excommunication est de telle efficacité, qu'au lieu de prier Dieu pour le Roy, de là en auant on fait prieres contre luy : & quant aux suiets ils sont entierement absous de leur serment & obligation, suiuant le droit qui exempte le vassal d'obeir à son Seigneur excommunié, & le deliure du serment qu'il luy a presté : ce qui aussi a esté confirmé par decret de Concile & par arrest des Estats de ce Royaume d'Aragon. Semblablement au Royaume de Castille, en plaine assemblée des Estats, le Roy prest à estre couronné, est premierement auerti de son deuoir en presence de tous : & tout à l'heure on lit des articles bien formels concernans l'vtilité publique. Le Roy iure que il les maintiendra soigneusement & fidelemēt. Cela fait, le Connestable luy preste le sermēt, puis les Princes & les deputez des villes, chacun selon son rang : ce qui est obserué es Royaumes de Portugal, de Leon, & autres, parties d'Espagne.

*In Cōcil.**Tolet. 4.**c. 74. &**in Tolet.**6. Lib. 6.**Fend. tit.**28. §. 1.*

*Voyez les
articles de
la Joyeuse
entree.*

LES principautez qui ne sont si hautes ont esté establies sur mesme droit. On lit encores aujourd'huy les conuëctions expressees des Brabançons & autres peuples du pays bas, de ceux d'Austriche, de Carinthie & d'autres avec leurs Princes, lesquelles sont toutes cōditionnelles. Mais les Brabançons specialement, pour ne laisser occasion de dispute, ont exprimé vne telle cōdition: c'est qu'en receuāt leur Duc, on lit en sa presence les anciens articles qui comprennent ce qui est requis pour le biē public, & est adiousté que si luy ne les obserue de poinct en poinct, eux pourront eslire tel autre Seigneur que bō leur semblera, ce qu'ils luy declairent en face & en termes tresexpress. Luy, ayant auoué & accepté ces articles, iure solennellement & promet deuant tous qu'il les entretiendra. Cela fut obserué en la reception de Philippe Roy d'Espagne, ce dit Louys Guichardin en sa description des pays bas. Somme, personne ne sauroit nier qu'il n'y ait contract mutuellement obligatoire entre le Roy & les suiets: dont la substance est que le peuple obeisse fidelement au Prince qui cōmandera comme il faut: & le serment est presté premierement par le Prince, puis cōfermé par le peuple.

IE demande là dessus, pourquoy quelqu'un iure, sinon pour monstrier qu'il parle de cœur & d'affection? Sauroit-on trouuer chose plus selō nature que d'observer ce que lō a prou-
uē?

ué? En apres, d'où viét que le Roy iure le premier, à l'instance & stipulation du peuple, si non pour receuoir la condition teüe ou expri-
mee? Pourquoy est apposee condition au con-
tract, sinon afin qu'à faure de l'accomplir le
contract demeure nul selon le droit? Que si
par faute de satisfaire à la condition de droit,
vn tel contract est nul: qui oséra appeller per-
iure le peuple lequel refuse obeir au Roy ne
tenant conte de la promesse qu'il pouuoit &
deuoit tenir, & violant la loy qu'il a iuree? Au
contraire, faut-il pas estimer vn tel Roy per-
fide, periure, & indigne de son rang? Car si la
loy afranchit le vassal enuers lequel son sei-
gneur aura commis felonnie, encore que pro-
prement le souuerain ne promette rien par ser-
ment à son vassal, ains le vassal à luy: si la loy
des douze tables deteste & declaire execrable
le protecteur fraudant celuy qui est en sa pro-
tection: si le droit civil permet au serf afran-
chi de tirer en iustice son patron qui luy aura
fait vne iniure atroce: si en tels cas le mesme
droit deliure l'esclaue de la puissance de son
maistre, encores que l'obligation soit naturel-
le seulement, non pas civile: n'est-il pas plus
raisonnable que le peuple soit absous du ser-
ment de fidelité presté au Roy, si le Roy qui a
le premier (comme le procureur à celuy qui le
constitue) rompu sa foy, vient à l'enfreindre?
Et quand toutes ces ceremonies & sermens
cesseroyent, si est-ce que nature mesmes mon-
N.j.

*Lib.2. sen-
dor. t. 26.
§. 24. &
t. 47.
Dionys.
Halic.
lib. 2.*

estre assez que les Rois sont establis par le peuple à ceste condition qu'ils gouverneront deuëment: qu'ils sont establis iuges, pour faire iustice, & chefs de guerre pour conduire leurs armées contre l'ennemi. Si au contraire eux mesmes fourragent & saccagent, ils deuiennent ennemis: & comme ils ne se montrent pas Rois, aussi ne doiuent-ils pas estre auouëz ni reconus tels par le peuple. Mais que sera-ce, repliquerez-vous, si le Prince ayant matté par violence quelque peuple, le cōtraint de luy iurer fidelité? Et que seroit-ce, respondray-ie, si vn brigand, vn coursaire, vn tyran, avec qui lon ne peut auoir communication quelconque, tenant le poignard sur la gorge du premier rencontré le contraint de s'obliger à luy d'une grande somme de deniers? Est-ce pas vn dire commun, qu'une promesse tirée par force n'oblige point? sur tout si lon promet quelque chose contre les bonnes mœurs & contre le droit de nature? Y a-il chose plus repugnante à nature, que de voir vn peuple se mettre les fers aux pieds & aux mains, promettre à vn Prince de presenter le gosier à la pointe de l'espee, voire de se tuer soy-mesme? Je di donc qu'il y a mutuelle obligation entre le Roy & le peuple, laquelle, quoy que ciuile, ou naturelle seulement, ou non exprimée, ou declairée en paroles expressees, ne peut estre en sorte que ce soit abolie, ni enfreinte en vertu d'aucune loy, ni rescindée par violence quelconque. Que ceste obligation est de si grande

force, que le Prince qui la viole par orgueil est tyran, & le peuple qui la rompt de fait d'avis, merite vraiment le nom de seditieux.

Iv^s Qv^{es} ici nous avons parlé du Roy, il nous reste de descrire le tyran vn peu plus exactement. Nous avons dit celuy-là estre Roy qui regit & gouuerne legitiment le Royaume à luy cōmis & escheu par succession ou par election. Il s'ensuit donc que lon doit reputer tyran, & cōme opposé au Roy, celuy qui s'est emparé du Royaume par violēce & mauuaises pratiques: ou qui gouuerne le Royaume à luy deuolu par successiō ou electiō, tout autrēmēt que le droit & l'equité ne lerequierent, & contre les loix & conuentions à l'observation desquelles il s'est estroitement obligé. Tout cela peut escheoir en vn seul & mesme homme. Le premier est communémēt appellé Tyran sans titre, l'autre Tyran par exercice. Or il se peut faire que celuy qui aura occupé par violence vn Royaume le gouuernerá iustemēt, & qu'un autre à qui il aura esté deuolu à iuste titre, le gouuerne iniustement. Mais dautant que le Royaume est plustost vn droit qu'un heritage, & vne charge qu'une possession: celuy qui s'acquitte mal de sa charge semble plus meriter le nom de tyran que celuy qui n'est entré en ceste charge par telle porte qu'il falloit. En ce sens dit-on que le Pape qui s'est insinué par mauuais moyens, s'est intrus, & que celuy qui gouuerne mal, abuse. Pythagoras disoit qu'un

Des ty^{rans}.

rans.

Arist.

c.10. lib.5:

Polit.

Bartol. in

tract. de

tyrannide.

estranget homme de bien est à preferer au citoyen voire au parent. Qu'il nous soit aussi loisible de dire, le Prince qui n'a esté legitime-ment établi est à preferer en toutes sortes, moyennant qu'il administre iustice, à celuy qui se porte iniquement, encores qu'il ait esté sacré avec toutes les ceremonies qu'on sauroit desirer. Car puis que les Rois ont esté ordonnez pour paistre, iuger, & maintenir le peuple: certainement encores aime-je mieux qu'un larron me nourrisse que d'estre mangé par le berger: j'aimé mieux qu'un voleur me face iustice, que d'estre outragé & violenté par le iuge: il m'est trop meilleur d'estre gueri par un empirique qu'empoisonné par un medecin passé docteur & habile comme sa vocation le porte: il va beaucoup mieux pour moy que mes biens soyent administrez par un tuteur à faux titre, que de les voir gourmander par un qui aura esté créé avec les solennitez acoustumees. En apres, encores que l'ambition sollicite tellement le tyran sans titre, qu'il semble bien auoir commencé par violence, si est-ce qu'on peut dire aussi que c'est pour faire son deuoir puis apres, tesmoins Cyrus, Alexandre, les Romains, qui ordinairement accordoyent aux peuples par eux subiuguez permission de se gouverner selon leurs loix & coustumes avec leurs priuileges & franchises: au contraire le tyran par exercice semble ne mettre son droit en auant que pour regner avec

Xenoph.

Plutarc.

in Alex.

in Alex.

lio, Casa-

re. Sueton.

in Casa-

re. c. 75.

avec plus grande violence, comme on en void aujourdhuy les exemples non seulement és Turcs & Moscouites, ains aussi en plusieurs Princes Chrestiens. Or si, selon le dire de S. Augustin, les Royaumes d'où iustice est bannie sont de grands brigandages : le tyran sans titre & le tyran par exercice sont pareils en ce que tous deux sont voleurs & possesseurs de mauuaise foy, attendu que le larron qui se fait d'une chose malgré le seigneur d'icelle ne est pas moins iniuste possesseur, que celuy qui administre & mesnage mal celle qui luy a esté baillé en charge. Mais la faute est trop plus grande sans comparaison; de celuy qui possède vn Estat pour le ruiner, que de l'autre qui s'en fera fait maistre pour le conseruer: brief le tyran par exercice qui se glorifie d'un vain titre & se porte iniustement, sera plus coupable que le tyran sans titre qui toutesfois gouverne iustement le royaume occupé par violence.

Mais au reste, on peut remarquer quelque difference entre les tyrans sans titre. Car il y en a qui empiètent par ambition le pays d'autruy pour agrâdir le leur, cōme ont fait Nimrod, Ninus, & les Chananeens. Encores que tels soyent appelez Rois entre leurs peuples, si est-ce qu'ils sont tyrans, attendu qu'ils les ont assuiettis sans aucun droit ni occasion. Il y en a d'autres qui estâs paruenus au gouuernement d'un Royaume electif, taschèt par fraudes, menées, corruption, par presens & autres meschâ-

*Au 4. lin.
de la Cité
de Dieu,
chap. 4.*

*Tyrans
sans titre.*

tes pratiques, de le rendre hereditaire. Comme il n'y en a que trop d'exemples. Ceux-là sont pires que les premiers, veu que la fraude doit tousiours estre plus detestee que la violence. Aussi y en a-il d'autres qui par vne meschance-
té horrible enuahissent leur propre patrie, & à l'imitation des viperes, rongent les entrailles de celle qui leur a donné la vie: cōme sont les chefs d'armees creez par le peuple, lesquels puis apres avec leurs forces se rendent maistres de l'Estat, cōme Cesar à Rome sous pre-
texte de la Dictature, & plusieurs Princes d'Italie. Dauantage, il y a des femmes qui se four-
rent au gouuernement des Royaumes que les loix du pays deferent aux masles seulement, & s'en font Roines & maistresses, comme Atha-
lia fit de Iuda: Semiramis, d'Assyrie: Agrippi-
ne, de l'Empire Romain du temps de son fils Neron: Mammea, sous Alexandre Seuer: Se-
miamire, sous Heliogabale: & quelques Bruné-
chilles du Royaume de Frâce. Ces Roines fai-
soyēt tellemēt nourrir les fils durāt le bas aage,
qu'estās deuenus grāds ils ne se soucioyent que
de se veautrer en voluptez: tellement que toute
l'authorité demeuroit és mains de ces Ro-
ines meres ou de leurs mignons, seruiteurs &
officiers. Ceux-là aussi sont tyrās sans titre, qui
abusans de la fetardise, bestise, & dissolution
des Rois autrement legitimes, lesques ils eny-
urent de delices & paillardises (comme sous les
Rois de France, spécialement sous les Mero-
uin-

uingiēs certains Maires du palais ont esté esleuez en ceste dignité par tels sales seruices) vsurpent toute l'authorité royale, & ne laissent que le nō aux Rois. Tous ces tyrās sont de telle sorte, qu'encores qu'au reste ils gouuernassent dextrement, toutesfois à cause qu'ils possèdent ceste iurisdiction à aussi iuste titre que feroit vn tyran, à bon droit les peut-on tenir pour tyrans sans titre.

Q V A N T aux tyrās d'exercice, il n'est pas si aisé de les descrire que les vrais Rois. Car d'autāt que le plaisir desreiglé conduit les vns, la vraye raison les autres: tellemēt que ceux-ci se cōtiennent en certaines bornes, mais ceux-là ne peuuēt estre retenus par loix quelcōques: on peut aisēmēt marquer le droit des Rois, mais difficilemēt les outrages & diuerses violences des tyrans. Et cōme le droit est sēblable à soy & d'une teneur, l'oblique au cōtraire est de diuerse façō: aussi la iustice est simple & se peut expliquer en peu de paroles, mais on ne sauroit definir les iniustices, à cause de leurs accidens diuers, pource que lō en obmet tousiours plus que lō n'en deschifre. Or combien qu'il y ait certaines reigles, par lesquelles ces tyrans peuuēt estre aucunemēt representez, encores que ce ne soit pas entieremēt: toutesfois il n'y en a point de plus certaine que la cōference & cōparaison des pratiques du tyrā avec les vertus & actiōs du Roy. Le tyrā abat les espics paroissās en la moissō, opprime les principaux of-

*Des tyrās
d'exerci-
ce.*

ficiers de l'Estat par fraudes & calomnies: fait courir des bruits qu'ils ont conspiré contre luy, afin d'auoir plus de pretexte de les racler du monde, telsmoins Tibere, Maximin & autres, & n'espargne pas mesmes ses freres, cousins & autres parens. Au contraire, le Roy ne reconoit pas seulement ses freres pour prochains & comme associez: mais aussi tient pour freres tous les principaux Officiers du Royaume, & n'a point honte de confesser que c'est d'eux qu'il a la couronne. Le tyran esleue des vilains & gens inconnus par dessus & contre la noblesse: afin que ces belistres tenàs tout de luy le flattent & se ployent à toutes ses passions: le Roy tient chascun en son degré, respecte & chérit les grands Seigneurs, comme amis du Royaume, desirant leur bien autant que le sien propre. Le tyran hait & tient pour suspects les hommes sauans & sages, faisant tout son possible pour abolir la vraye Science & consciences: puis estimant que sa seureté consiste en la corruption & en l'abastardissement de tous Estats, il introduit les tauernes, les brelans, les bordeaux, les farces, comme fit Cyrus pour domter les Sardiens: au contraire le bon Roy attire les gens de bien de toutes parts, & les y contraint, & pour en conseruer le nombre, il dresse les escoles & vniuersitez, entretenant par tout les pepinieres de vertu. Le tyran fait tous ses efforts de fuir ou d'abolir toutes assemblees publiques, redoute l'as-

sem-

semblee des Estats, les Parlemens, les dietes ou iournees pour traiter matieres de l'Estat, fait la lumiere ne voulant estre conu en ses actions, mesmes il tient pour suspects les deuis, propos & contenances des suiets: mais le Roy qui vit en presence de Dieu & des hommes, se glorifie au grand nombre qu'il a de fideles conseillers, estimant qu'il ne faut rien faire sans leur conseil: & tant s'en faut qu'il redoute les Estats & assemblees publiques, ains les reueure & honore grandement. Le tyran fait iouster les suiets ensemble, seme, entretient & porte les factions en vn Estat, ruine l'une à l'aide de l'autre, puis desfait la suruiuante, tirant profit de ceste diuision, comme les desloyaux chirurgiens qui font durer l'vlcere: brieſ à l'exemple de ce vilain Vitellius, n'ont pas honte de dire que l'ennemi mort, sur tout le suiet mesme, sent bon: à l'opposite le bon Roy conserue la paix entre les suiets, comme fait le pere entre ses enfans, suffoque les semences de noises, & guerit vistemment la cicatrice, ne pouvant mesme se contenir de pleurer si on luy rapporte que iustice ait esté faite de quelques rebelles. En somme, ceux que le bon Roy maintient & defend contre leurs ennemis, le tyran, ennemi iuré, les contraint de tourner la pointe de leurs especs dedans leurs propres entrailles. Le tyran remplit les garnisons de soldats estrangers, bastit des citadelles contre ses suiets, desarme le peuple & ne luy laisse forteref-

*Arist. an
s. des Po-
lit. ch. 11.*

se quelconque, est acompagné de gardes composées d'estrangers ou de gens de sac & de corde, donne gages du public à des espions & rapporteurs qui vont courans ça & là par les prouinces. Au contraire, le Roy se maintient plus contre ses ennemis à l'aide de la bien-vucillance du peuple que par la force des murailles, estime auoir autant de gardes qu'il a de suiets, pense aux moyens de n'estre contraint d'auoir gens autour de sa personne plustost qu'autrement, bastit des forteresses pour brider les ennemis, non pas le peuple, sur lequel il se repose. Voila qui fait que si le tyran a vn million de garde-corps & de satellites pour escarter la foule de gens, iceux ne chassent pas pourtant la peur, la desfiance, & les grands troubles de la conscience mal asseuree: & quoy qu'il fortifie sa citadelle, si est-ce que le tyran des tyrans, asauoir la peur s'empare de la grande forteresse des tyrans, asauoir de l'ame, & y tient continuelle garnison. Si le Roy se trouue parmi vne grosse tourbe de peuple il n'est pourtant troublé, ni plein de solitude en sa solitude: car sa conscience l'asseure, & estant acompagné du peuple, il se pourmeine hardiment par les rues, places & lieux les plus hantez. S'il n'y a point de dissensions ciuiles, le tyran fait la guerre hors du pays, fortifie des places à la façon de Pharaon & de Polytrates, qui ne vouloyent laisser en repos les Iuifs & Samiens, ains les empescher par tel moyen de pen-

Liv. lib. 2.

Dionys.

Halie lib.

5.

Proverb.

14.28.

*Bartol. au
traicté de
la tyrannie.*

penſer à autre choſe : pourtant ſe prepare-il toujours à la guerre, du moins il en fait le ſemblant, vſe de menaces, & attire pluſtoſt le mal qu'il ne deſtourne. Iamais le Roy ne fait la guerre que par contrainte & pour la conſervation du public: il ne peſche iamais avec vn hamçon d'or, ni n'entreprend de leuer les armes s'il void que ſon pays en doïue recevoir plus de dommage que de profit. Le tyran ne fait qu'inventer les moyens d'eſpuifer les richesses de ſes ſuiets, afin qu'eſtans occupez à chercher les moyens de gagner leur vie ils ne penſent plus à recouvrer leur liberté, & pourtant il amasſe tout en ſes coffres : au contraire le Roy tenant pour choſe certaine que ſes finances ſont és bourses des particuliers, les leur met comme en depoſt entre les mains, & penſe avoir vn tresgrand theſor quand ſes ſuiets ſont bien riches. Le tyran oſte à pluſieurs pour donner à deux ou trois mignōs, il eſpuife tout le monde pour ietter en la gorge de ces garnemens, il ruine le public pour baſtir ſa maiſon: il tire le ſang du peuple iuſques au dernier ſouſpir & le fait boire incontinent à certaine troupe de flatteurs : mais le Roy retranche de ſon ordinaire & de ſes commoditez pour en aſſiſter au peuple, il baſtit & fait choſes magnifiques pour le public, brief il nourrit & ſouſtient de ſon ſang le peuple qui luy eſt cōmis. Si le tyran laiſſe quelquesfois engraiſſer le peuple, comme firent Tibere, Neron, Com-

modus & les autres, c'est afin de luy arracher les boyaux bien tost, & les luy faire manger: au contraire, si le Roy ouure par fois la veine, s'il en fait sortir le sang c'est pour le bien du peuple, non pas pour viure dissolumēt & à sa fantaisie. Et pourtant comme l'Escripture sainte compare l'un au berger, aussi dit-elle que l'autre ressemble au lion rugissant, auquel neantmoins le renard est souuētes fois acouplé. Car le tyran est coupable en effect de la plus grāde iniustice que lon sauroit penser, ce dit Cicerō: & toutesfois il se manie de telle sorte que lors qu'il trompe le plus meschamment c'est à ceste heure-là qu'il semble estre homme de biē. Pourtant fait-il le religieux & deuotieux, artifice le plus subtil de tous ceux que les tyrans sauroyent pratiquer, dit Aristote. Il compose ainsi sa contenance, afin que le peuple craigne de rien machiner contre celuy qu'il pense estre aimé de Dieu, auquel il semble porter si grande reuerence. Il feint aussi d'estre extrememēt affectionné au bien public: mais ce n'est pas tant pour desir qu'il ait au profit de ses suiets, que de crainte qu'il a qu'eux ne luy courent sus. Outreplus il affecte fort d'estre estimé iuste & loyal en quelques affaires, mais de petite importance, pour pouuoir tromper & faire outrage plus aisément en choses grandes: ne plus ne moins que les brigands viuent de malefices & forfaits, qui ne sauroyent subsister sans auoir entre eux quelque petite parcelle de

*Àu 5. liu.
des Polit.
chap. II.*

de iustice. Outreplus il fait du debonnaire, mais en telle sorte qu'il pardonne à certains meschans, au supplice desquels il eust mesmes acquis le nom de Prince clement. Pour le dire en vn mot, ce que le Roy est, le tyrā veut sēbler l'estre, & sachant que la vertu attire & esmeut merueilleusement les hommes, aussi conoit-il qu'il les faut piper par quelque beau masque de vertu: mais comment que ce soit qu'il se cōtreface, tousiours la queue du renard se montre: & quoy qu'il face du chiē couchant, neātmoins à sa queue & à son rugissement on decouure que c'est vn lion.

A v reste, comme vn Royaume bien dres-

*Tom. A-
quin. in se
cūa. secūda.
q. 12. art.
11.*

fé contient en soy toutes les commoditez des autres gōuernemens: aussi au contraire la tyrannie contient les incommoditez & vices de toutes les confusions du monde. L'estat Royal est conforme à l'Aristocratique en ce que les plus sages & suffisans sont appellez au conseil: la tyrannie & l'oligarchie s'accordēt en ce que leur conseil est composé des plus meschans & corrompus. Et comme au conseil Royal il y a vne multitude de Rois, en cestuy-ci au contraire il y a vne troupe de tyrans. La monarchie emprunte du gouvernement populaire l'assemblée de tous les Estats, où lon enuoye pour deputez les plus capables des villes & provinces pour y deliberer touchant les matieres d'Estat: la tyrannie a cela de l'ochlocratie, que si elle ne peut empescher la conuocation des

Estats, elle procure par mencees & meschantes pratiques que les plus grands ennemis de l'ordre & de la reformation de l'estat y soyent enuoyez: ce que nous sauons auoir esté fait de nostre temps. Voila comme le tyran prend la contenance du Roy, & la tyrannie celle du Royaume: subsistant selon qu'elle peut plus dextrement iouer son personnage: mais en telle sorte, qu'à peine se trouuera-il tyrannie, dit Aristote, qui ait duré cent ans. En somme, le Roy n'a esgard qu'à l'vtilité publique, & le tyran ne se soucie que de son particulier. Mais au reste, estant ainsi, comme les hommes sont faits, que lon ne sauroit trouuer vn Roy qui en tous afaires ait tousiours esgard à l'vtilité publique, & qui d'autre part puisse longuement subsister sans en monstrier quelque soin: nous dirons que là où l'vtilité publique est preferee au particulier, il y a là & Roy & Royaume: & que le tyran & la tyrannie sont en vogue par tout où le bien particulier est preferé au public. Voila quant aux tyrans d'exercice, en l'examen desquels nous n'auons point prins pied sur leur vie trauaillee & diffamee de toutes sortes de vilenies & meschâcetez, desquelles on a acoustumé de dire qu'elles font l'homme meschant voirement, considéré en qualité d'homme, & non en qualité de Prince. Si le lecteur n'est assez satisfait de ceste description, outre les plus expresses images des Tyrans qu'il trouuera dedans les histoires, il en

*Bartol. au
traicté de
la Tyrannie,
et du
gouuer. de
la Re-
publ.*

il en peut contempler en ce temps d'autres vi-
uans, respirans & acomplis de toutes parties
requises en vrais suposts de tyrannie, non seu-
lement en vn endroit du monde, mais en plu-
sieurs: dequoy aussi Aristote se plaignoit fort
de son temps. Finalement nous sommes par-
uenus comme par tels degrez au sommet &
point de la question.

Nous auons veu comme les Rois sont e- *A qui il*
sleus de Dieu ou par testes ou par races, puis *apartient*
installez par le peuple: itē quel est le deuoir du *de repri-*
Roy & des officiers du Royaume, iusques où *mer les*
s'estend la puissance, la charge & le deuoir des *tyrans*
vns & des autres: quelles & combien saintes *sans titre.*
sont les conuentions qui entreuient en l'e-
stablissement d'un Roy, les conditions tacites
ou expressement ramentues qui y entreuient:
finalement qui sont les tyrans sans titre & de
exercice. Il s'ensuit maintenant, puis que c'est
chose hors de doute qu'il faut obeir au legiti-
me Roy, faisant son deuoir enuers Dieu & le
peuple, cōme à Dieu mesme s'il commandoit
en sa propre maiesté: que nous traitions afa-
uoir si lon peut resister au tyran, qui sont ceux
à qui telle besongne appartient, & quelle pro-
cedure ils doyent tenir pour y proceder selō
droit & raison. Premièrement il faut parler de
celuy qu'on appelle cōmunemēt tyrā sans titre.
Posé dōc le cas que quelque Ninus n'ayant esté
outragé ni offensé coure sus à vn peuple sur
lequel il ne sauroit rien pretendre: que Cesar

Otto Fri-
 sug. Chrö.
 lib. 5. c. 7.
 Aimoi.
 liu. 4. c. 1.
 Greg.
 Tur. lib.
 4. c. 51. lib.
 5. c. 39. lib.
 8. c. 29.

opprime la patrie & la republique Romaine: que Popiel s'efforce par trahisons & meurtres execrables rendre hereditaire vn Royaume de Pologne electif: que quelque Brunechilde tire à soy & à son Protade tout le gouuernement de France: ou qu'Ebroin faisant son profit de la bastise de Theodoric, mette la main entiere-
 rement aux affaires, & opprime le peuple: quelle resolution prendrons-nous là dessus selõ le droit? Premièrement le droit naturel nous enseigne & commande de maintenir & garder nostre vie & liberté, sans laquelle la vie n'est pas vie, contre toute iniure & violence. Nature à empraint ceste affection aux chiens contre les loups, aux taureaux contre les lions, aux pigeons contre les esperuiers, aux poulets contre les milans, & encores dauantage à l'hõme contre l'homme mesmes, s'il deuient loup. Et pourtant celuy qui dispute s'il faut se defendre ou non, abolit nature entant qu'en luy est. A cela faut conioindre le droit des Gens, lequel distingue les possessions & seigneuries, plante les bornes, marque les confins, lesquels chascun est tenu de defendre contre tout hõme qui les veut enuahir. Pourtant sera-il autãt loisible de resister à Alexandre le Grãd, si sans aucun droit, & n'estant offensé de personne il assaut quelque nation avec vne puissante flotte, qu'à Diomedes le coursaire qui escumeroit la mer dedans vn brigantin: car ce que dessus presuppose, Alexandre n'est pas meilleur que Diome-

Diomedes, & n'a autre auantage, siñ qu'il fourrage à son plaisir sans pouuoir estre reprimé? Brief on peut aussi bien faire teste à Alexâdre saccageât vne province ou renuersant les murailles d'vne ville, qu'à vn brigand qui voudroit raur le manteau, ou vn voleur qui romproit la muraille d'vn logis pour y desrober. Il y a encores outre cela le droit ciuil, lequel reigle les societez des hommes par certaines loix, tellement que les vnes sont gouuernees d'vne sorte, les autres d'vne autre, ou par vn, ou par quelque petit nombre, ou par toute vne communauté: aucunes deboutent les femmes du gouuernement, d'autres les y admettēt celles-ci essisent les Rois descendans de certaine race, celles-là les prennent tels que bon leur semble: & ainsi consequemment des autres diuerses façõs de faire pratiquées entre les peuples. Si quelqu'un s'essaye d'abolir ce droit par fraude ou violence, tous sommes tenus de luy resister, veu qu'il viole la société à qui il doit tout ce qu'il a, & qu'il veut ruiner la patrie, à la cõseruation de laquelle nous sommes obligez par nature, par les loix, & par promesse solennelle: tellement que si nous deuenõs lasches en tel afaire, à la verité lon nous peut appeller proditeurs de la patrie, deserteurs de la société humaine, & contempteurs de toutes loix.

Or comme les droits de nature & des Gés, & les loix ciuiles nous commandent de prendre les armes contre tels tyrans: on peut dire

O.j.

*L. ult. D.
ad leg. Jul.
maiestatis.*

*Bartol. au
traité des
Guelph.
& Gibel.*

aussi qu'il n'y a raison aucune qui nous puisse persuader le contraire. Il n'entreuient sermēt, conuention, ni obligation publique ou particuliere qui nous doye retenir: par ainsi, cas auenant qu'une tyrannie se voulust fourrer en vn Estat, il est permis au moindre du peuple de repousser telle vsurpation. La loy Iulia qui condamne à mort ceux qui se souleuent contre la patrie ou contre le Prince n'a point ici de lieu: car celuy-là n'est pas Prince qui sans aucun titre legitime s'empare de l'Estat ou des pays d'autrui: ni n'est rebelle celuy qui defend sa patrie avec les armes au poing. Au contraire, c'est à cela qu'il faut rapporter le serment que tous les ieunes hommes Atheniēs fouloyent prester au temple d'Aglaura: Je combattray pour la Religion, pour les loix, pour les autels & foyers, ou seul ou avec plusieurs, & employeray tous mes moyens pour laisser à la posterité la patrie en aussi bon Estat pour le moins que ie l'ay receüe. Les loix faites contre les seditieux ne peuuent nō plus estre ici alleguees à propos. Celuy est seditieux qui entreprend de defendre le peuple contre l'ordre & discipline publique. Or celuy qui reprime le destructeur de la patrie & de la discipline publique n'esmeut point de sedition, ains au contraire l'abolit. Au contraire c'est ici qu'est receuable la Loy des Tyrannicides, laquelle honnore les viuans par grandes recompenses, & les morts par epitaphes & statues,

tues, comme Harmodius & Aristogiton en la ville d'Athenes, Brutus & Cassius en Grece, Aratus de Sycione aussi. A tels par decret public furent dressees des statues, pour auoir deliuré leurs pays de la tyrannie de Pisistratus, de César & de Nicocles. Ce que les anciens ont tât aprouué, que Xerxes mesmes s'estant rendu maistre de la ville d'Athenes, fit emporter au Royaume de Perse les statues d'Harmodius & d'Aristogiton: depuis Seleucus les fit rapporter en leur premiere place, & comme elles fussent arriuees au port de Rhodes, ceux de la ville firent vn banquet solennel aux commissaires, & durant iceluy mirent reposer ces statues sur les oreillers de leurs dieux. Mais la Loy des deserteurs & traistres fait entierement contre ceux qui ne sont souciez de leur patrie oppresse, les condamnant à mesme supplice que les soldats de cœur failli, qui pour ne se trouuer aux coups contrefont les malades ou iettēt bas leurs armes & s'enfuyent. Il faut dōc que tous en general & chascū en particulier crient apres ce mal comme au feu, qu'ils y courent avec crochets & autres engins propres, qu'ils y portent de l'eau. Il ne faut point attendre que le capitaine du guet soit esueillé, ni que le preuost de la ville sorte en rue: que chascun puisse del'eau, & monte sur le toit, car il faut estaindre le feu. Car si tardis que les Gaulois eschellent d'emblee

Plin. lib.

Alexand.

d'Alexandrie au li.

6. cha. 4.

Xiphilin

en la vie

d'Auguste

Plut. in

Arato.

Valer.

Max. li. 2.

chap. ult.

L. 3. & l.

omne deli

clū. 5. ult.

D. de re

milit.

le Capitole, les soldats sont assopis de travail, les guettes dorment, les chiens n'abayent point: il faut que les oyes facent la sentinelle & crient alarme. Les soldats & guettes seront degradez, declairez infames, & mis à mort pour souuenance à iamais de tel fait: au contraire les oyes seront tousiours nourries au Capitole, & prises perpetuellement.

CE que dessus se doit entendre de la tyrannie qui est à faire, comme on parle, c'est à dire tandis que le tyran conspire, machine, & dresse ses mines & pratiques. Mais s'il s'est vne fois tellement emparé de l'estat, que le peuple subiugué luy preste le serment & promette obeissance: que la Republique abatue, luy resigne sa puissance: & que le Royaume cōsente par quelque ordre, que ses loix soyent changees: certainement pource qu'alors il a obtenu le titre qu'il n'auoit pas auparauant, & semble estre possesseur de droit aussi bien que de fait, encores que le peuple ait receu le ioug maugré soy, si est-ce qu'il doit ployer & acquiescer paisiblement à la volonté de Dieu, qui transporte les nations d'une nation à l'autre. Autrement, il n'y aura Royaume, de la iurisdiction duquel on ne puisse disputer: mais au reste cela sera receuable, pource que celuy qui a acquis & obtenu le titre de Roy, estant auant cela tyran sans titre, gouuerne comme il faut ses suiets, sans exercer sur eux aucune tyrannie. Ainsi donc, comme le peuple de Iudee resista legiti-

legitamment sous l'aueu & autorité du Roy Ezechias à Sennacherib Assyrien qui vouloit ^{2. Rois 14,} empieter la Palestine: au contraire Sedecias & ^{Ch 25.} tous ses suiets sont condamnéz, de ce qu'apres ^{Ierem. 37.} auoir fait hommage à Nebuchadnezar ils se souleuent contre luy qui ne leur en auoit donné quelconque occasion. Car apres que la foy a esté donnée il n'est plus temps de se repentir: & comme és batailles chascun doit faire preuue de sa vaillâce, mais si lon est prisonnier il faut tenir promesse: aussi est-il requis que le peuple maintienne ses droits par tous moyens possibles: mais s'il auient qu'il ait esté reduit à ce poinct que de s'affuiettir au vouloir d'autrui, c'est raison qu'il supporte doucement la domination du victorieux. Ainsi Pompee, Caton, Ciceron & autres faisoient deuoir de bons patriotes, lors qu'ils prindrent les armes contre Cesar qui abolissoit le gouuernement de l'Estat: & ne sauroit-on excuser ceux qui par leur lascheté ont esté cause que les conseils de Pompee & des siens n'ont pas heureusement succédé. Auguste mesme reprima (ce dit-on) vn quidā qui disoit mille maux de Caton, soustenant qu'iceluy s'estoit porté en homme de bien, & tres-affectionné à la grandeur de sa patrie, en ce qu'il s'estoit opposé au changement que lon vouloit faire en l'Estat, veu que cela ne se pouuoit executer sans troubler grands & petis & mettre tout en combustion. Au reste, lon ne sauroit iuste-

*Xiphilin
en la vie
d'Augu-
ste*

ment reprendre Brutus , Cassius , Casca & autres , qui ont tué Cesar , attendu que la tyrannie estoit encores en flagrant delict , comme on parle. Aussi par decret public leur dressa-on des statues de bronze en la ville d'Athenes , aupres de celles de Harmodius & d'Aristogiton , lors qu'ils se retirerent de Rome , apres auoir despesché Cesar , la mort duquel Auguste & Marc Antoine vouloyent venger. Mais Cinna doit estre tenu pour vn vray seditioneux , qui conspira contre Auguste , apres l'emolagation de la loy Royale , par laquelle le peuple consignoit toute sa puissance entre les mains d'Auguste. Semblablement, lors que les Carlouingiens taschoyent d'oster la couronne de France aux Merouingiens , & que les Capueingiens vouloyent aussi supplanter les Carlouingiens , on leur pouuoit resister sans aucune note de sedition : mais quand par le conseil public & par l'autorité des Estats le Royaume a esté transporté des vns aux autres , il n'a plus esté loisible de s'y opposer. Le mesme faut-il dire , si vne femme s'empare du gouvernement à elle defendu par la loy Salique , & si quelque vn fait deuenir hereditaire aux siens vn Royaume purement electif , si ces loix publiques n'ont esté abrogees par l'autorité des Estats qui representent le corps du peuple. Et ne faut point regarder en cela laquelle des deux factions est plus grande , plus puissante ou plus illustre. Tousiours le nombre est plus grand de

de ceux qui sont transportez de passion, que de ceux que la raison gouuerne:& pourtant la tyrannie a tousiours plus de seruiteurs que la Republique. Rome est, ce dit Pompee, là où est le Senat: & le Senat se trouue là où se trouuent la reuerence des loix, l'amour de liberté, le desir de conseruer la patrie. Par quoy, encores que Brennus semble s'estre saisi de Rome, Rome est à Veies cependant avec Camillus qui se prepare pour deliurer Rome de seruitude. Il faut donc que les chevaliers & soldats Romains s'en aillent à Veies, pour aider Camillus en toutes sortes à eux possibles. Combien que Themistocles laisse Athenes, & monte sur la mer avec tous les gens de bien de la ville, s'enfermans en vne flotte de deux cens galeres, pas vn d'eux n'est pourtant forclos ni banni d'Athenes: ains plustost, comme respōd *Plutar. en la vie de Themist.* Themistocles, Ces deux cens galeres nous seruent autant que la plus grande ville de toute la Grece: pource qu'elles sont armees afin de defendre tous ceux qui veulent maintenir le public en son entier. Et pour venir à d'autres exemples, il ne s'ensuiura pas que l'Eglise de Dieu soit incontinent en vn lieu où sera l'arche de l'Alliance: car les Philisthins peuuent emporter ceste arche iusques dedans le temple de leur idole. Si tost que lon verra les enseignes & legions Romaines, il ne s'ensuiura pas que ce soit l'armee de la Republique: mais ce-

O.iiij.

ste armee est là où sont assemblez ceux qui maintiennent la liberté du pays contre la tyrannie, qui afranchissent le peuple de servitude, qui repriment l'audace des femmes, qui font iustice des flatteurs abusans de la bestise du Prince pour fouler ses suiets en toute sorte, & qui font demeurer l'ambition dedans quelques limites. Ce que dessus soit dit touchant les tyrans sans titre.

*Des tyrās
d'exercice,
& quel
droit on a
sur eux.* MAIS quant aux tyrans d'exercice, soit que premierement ils soyent paruenus de droit ou par force au gouuernement de l'Estat, il nous faut dextrement manier ceste question. En premier lieu, souuenons nous que tous Princes sont nez hommes: tellement que lon ne sauroit separer la raison d'auec la passion en eux, non plus que l'ame ne peut estre separee du corps tandis que l'homme vit. Il ne faut donc pas pretendre d'auoir des Princes esquels il n'y ait rien à redire: pluostost estimons que tout va bien pour nous, si ceux qui nous gouernent sont moyennement bons. Et pourtant, encores que le Prince ne tiene pas mesure en quelques affaires, si quelquesfois il n'obtempere à la raison, s'il luy auient d'estre lasche à maintenir le bien public, ou de ne faire pas briefue iustice, ou de ne repousser vaillamment les ennemis: il ne sera pas incontinent tyran pour cela. Certainement, puis que c'est vn homme de mesme chair & sang que les autres, qui commande à des hommes non point

point à des bœufs, & que ce n'est point vn Dieu qui preside visiblement entre les hommes mortels: comme vn Prince feroit extrêmement orgueilleux qui voudroit abuser de ses suiets comme si c'estoyent bestes brutes: aussi le peuple se monstreroit par trop desraisonnable qui d'un Prince feroit vn Dieu, & chercheroit quelque deité en vne nature si fresle qu'est la nature humaine. Mais si le Prince de propos deliberé ruine l'Estat, s'il renuerse audacieusement tous droits & deuoirs, s'il ne se foucie aucunement de garder sa foy, s'il n'a esgard à conuention, ni à iustice, ni à pieté: s'il est ennemi de ses suiets, brief s'il pratique toutes les meschâcetez que nous auons specifiees, ou les principales d'icelles, alors certainement on le pourra iuger tyran, c'est à dire ennemi de Dieu & des hommes. Il n'est donc pas ici question d'un Prince qui ne soit pas des meilleurs, ni des plus sages, ni des plus grands iusticiers, ni des plus vaillans, mais d'un Prince tres-meschant, malicieux & traistre, contempteur des loix, ennemi du peuple & fourrageur du Royaume. La prudence d'un Senat, la droiture d'un iuge, la prouësse d'un capitaine à l'auanture aidera le Prince inepte & couard: mais le tyran souhaite aux Seigneurs du pays, aux Conseillers d'Estat, aux chefs de guerre vne seule teste, laquelle il puisse abatre tout d'un coup, & n'y a gés qu'il haïsse plus que ceux-là. Ce Prince inepte & lasche peut estre supporté, encores que de droit lon pourroit le deposer:

mais le tyran plus il est supporté, plus il se rend insupportable.

OVTREPLVS, cōme le Prince ne peut de droit faire tout ce qu'il luy plaist: aussi souuentefois n'est-il pas expedient que le peuple face ce que le droit luy permet de faire: pource qu'il peut auenir que le remede sera plus dangereux que la maladie mesme, tellement qu'il vaudra mieux tēter & essayer tous autres moyens deuant que venir aux armes. Si dōc ceux qui representent le peuple voyent que lon machine contre l'Estat, ou que mesmes on vse de violence manifeste, leur deuoir est premierement d'auertir le Prince, sans attendre que le mal s'augmente & se rende irremediable. La tyrānie ressemble à vne fièvre hectique, laquelle du commencement est aisée à guerir, mais mal aisée à conoistre: puis apres on la conoist assez, mais elle se rend incurable. Et pourtant les Estats serōt soigneux d'y remedier de bonne heure, n'omettant rien qui soit pour cest effect. Si le Prince poursuit, & ne se soucie point des diuerses remonstrances qu'on luy aura faites, ains vise seulement à ce but de pouuoir cōmettre impunément tout le mal qui luy plaira: alors il est coupable de tyrānie, & peut-on pratiquer cōtre luy tout ce que le droit & vne iuste violēce permettent cōtre vn tyran. Nō seulement la tyrannie est vn crime, ains le chef & cōme le comble de tous autres crimes. Le tyran renuerse l'Estat, brigande tous les suiets,

met

met embusches à la vie de tous, est periure à l'édroit de tous, & viole la saincteté des sermēs solennels. Pourtant il surpasse en meschanceté les plus horribles voleurs, brigāds, meurtriers & sacrileges que lon sauroit penser, autāt que c'est vn crime beaucoup plus grief d'offenser tout le corps d'un peuple, que quelques membres d'iceluy. Si les brigands & sacrileges sont estimez infames, si on les fait mourir pour leurs malefices, sauroit-on inuēter vn supplice assez grand au crime de tyrannie?

DAVANTAGE, nous auons prouué que tous Rois reçoient leur dignité Royale de la main du peuple : que tout le peuple considéré en vn corps est par dessus & plus grand que le Roy: qu'iceluy Roy est tant seulement premier & souuerain gouuerneur & seruiteur du Royaume, qui n'a pour maistre & vray Seigneur que le peuple. Il s'ensuit donc que le tyran offensant le peuple commet felonnie contre le Seigneur du fief, blesse la sacree Maiesté du Royaume, est rebelle: & pourtant merite la punition ordonnee par les loix, voire encores plus grāde. Pourtāt, ce dit Bartole, il pourra estre depōsé par le Seigneur souuerain, ou iustement puni, suiuant la loy Iulia condamnant ceux qui font violence au public. Le souuerain c'est tout le peuple, ou ceux qui le representent, comme ceux que nous appellons Electeurs, Palatins, Pairs, Estats & autres. Que si le tyran s'est auancé iusques là qu'on ne le

*An traité
de la tyrā
nie, & du
gouuerne
ment de la
Republi
que.*

puisse degrader qu'avec main armée: alors fera-il loisible à ceux-là de faire prendre les armes au peuple, enrôller & leuer gens de guerre, & employer tous moyens de force & de ruse de guerre contre celuy qui aura esté iugé ennemi de la patrie & de l'Estat public. En somme, lon pourra prononcer telle sentence contre luy que contre Manlius Capitolinus à Rome, Tu m'estois Manlius, lors que tu fis trebuscher les Gaulois qui vouloyent mōter au Capitole: mais pource que maintenant tu es deuenu l'un de ceux là, tu seras precipité du haut en bas de ce mesme lieu d'où tu les as repoussés.

*Valer. lib.
6. l. 3.*

Pour cela les officiers du Royaume n'en courront la note de sedition. Il faut necessairement que deux parties se récontentent en vne sedition, lesquelles debatenent l'une cōtre l'autre ordinairement, si que c'est chose necessaire, que le droit soit à l'une & le tort à l'autre. La partie qui maintiendra les loix, le profit du public, & l'Estat du Royaume aura le droit de son costé: & au contraire celle-là tout le tort, qui violera les loix, soustiendra le menton aux violateurs d'icelles & aux destructeurs de la patrie. Celle-là aura le droit, dit Bartole, qui taschera d'abolir la tyrannie: & l'autre sera en tort qui voudra renuerfer le gouvernement legitime. L'une qui regarde le bien public sera licite: l'autre qui ne vise qu'au bien particulier, sera illicite. Parquoy, dit Thomas d'Aquin, dau-

*An traité
des Guel-
fes & Gi-
bellins.
arg. l. 3. §.
cū igitur.
D. de vi
& vi ar.
Tho. Aq.
sec. secun.
q. 12. art.
11 in fine.*

dautant que la domination tyrannique ne se rāge point à procurer le bien public, ains seulement le particulier du dominateur, elle n'est plus iuste, & la troubler ce n'est point esmouvoir sedition. Aussi les officiers du Royaume ne seront pas coupables du crime de lese Maieſté. Ce crime ne se commet sinon quand on s'attache au Prince legitime, lequel n'est autre chose sinon vne Loy parlante. Parquoy, veu que celuy qui aneantit les loix entāt qu'en soy est, ne peut auoir ce nom: ceux qui prendront les armes contre luy ne peuvent estre chargez de tel forfait. Aussi ce crime s'adresse à la Re-
L. I. D. ad leg. Iul. maiest.
 publique: mais pource qu'il n'y a point de Re-
Cice. Parad. 4.
 publique sinon là où les loix sont en vigueur, non pas où vn tyran engloutit l'Eſtat à son plaisir, c'est le tyran qui est coupable du crime de lese Maieſté, & ceux-là protecteurs du public qui en vertu de leur autorité & selon leur deuoir courent sus au tyran. Et en cela il ne faut pas estimer que ce ne sont pas les particuliers & ſuiets qui s'en meslent ains le corps du peuple, c'est à dire la seigneurie ou ſouueraineté qui demande compte à son procureur de son administration. On ne peut non plus estimer perfides les officiers du Royaume, qui s'acquitteront ainsi du deu de leur charge. Il y a en tous lieux entre le Prince & le peuple vne obligation mutuelle & reciproque. L'un promet d'estre bon Prince, l'autre, d'obeir moyennant qu'on le gouuerne comme de rai-

son. Ainsi donc le peuple est obligé au Prince sous condition: le Prince au peuple purement & simplement. Pourtant si le Prince ne tient pas promesse, le peuple est en sa liberté, le contract rescindé, & de droit l'obligatiō est nulle. Donques si le Roy regne iniustement il est perfide, & le peuple pareillement s'il n'obeit à celuy qui luy commande choses raisonnables. Mais le peuple n'est coupable de quelconque desloyauté s'il renonce tout ouuertement à celuy qui commande l'espee au poing, ou s'il tasche de le repousser avec les armes, lors qu'il se maintient selon Dieu.

*L. 1. D. de
reg. iur.*

*L. 160. D.
de reg. iur.*

IL sera donc permis aux officiers du Royaume ou à tous, ou à bō nombre d'iceux pour le moins de reprimer le tyran. Et non seulement cela leur est loisible, mais aussi leur deuoir le requiert si expressement, que s'ils ne le font il n'y a excuse quelconque qui puisse couurir leur lascheté. Car il ne faut pas que les Electeurs, Palatins, Pairs & autres Officiers notables pensent auoir esté establis seulement afin de faire leurs monstres, estans habillez à l'antique lors qu'on sacre le Roy, comme s'il falloit iouër vne farce, & que ce iour-là ils representassent sur vn eschaffaut Roland, Olinier, Renaud & tels autres personnages, pour ramener en memoire & contrefaire les cheualiers de la table ronde: puis apres que le monde s'est retiré, & que l'un d'entre eux aura tiré le rideau, ils estiment auoir fort bien ioué leur roolle;

roolle, de s'estre à toutes restes acquittez de leur deuoir iusques à vne autre pareille fois. Ces ceremonies-là n'ont point esté ordonnées pour faire rire, ni ne se font par maniere de acquit: ce ne sont pas ieux de petis enfans qui font le Roy de la poule: ains il faut que les Electeurs, Pairs & autres tels seigneurs sachent qu'ils sont appelez pour auoir non seulement part à l'honneur, mais aussi à la charge, & que la Republique a esté recommandee voirement au Roy, comme au souuerain & principal tuteur, puis aussi à eux, comme conseillers & tuteurs avec le Roy.

ET pourtant, tout ainsi que les tuteurs (ie di
 mesmes les honoraires) sont esleus pour auoir
 l'œil sur celuy qui est le principal tuteur, afin
 d'estre sans cesse autour de luy pour sauoir l'es-
 tat de son administration, & comme il se cō-
 porte: semblablement ceux-ci sont ordonnez
 afin d'auoir l'œil sur le Roy, & empescher qu'il
 n'entreprene rien au dommage du peuple, le
 Roy n'estant réputé tel, sinon pource qu'il a le
 principal soin de la tutelle. Item cōme lon im-
 pute aux cōtuteurs les fautes du tuteur qui ma-
 nie les affaires, si quand ils ont deu & peu ils ne
 l'ont descouuert & fait deposer, a sauoir s'il a
 failli de leur communiquer les affaires de son
 administratiō, s'il ne s'y porte pas fidelement,
 s'il fait quelque chose au deshōneur ou au dō-
 mage de son pupille, s'il soustrait quelque bien
 de la pupillarité, & s'il est ennemi du pupille:

*Vlp. l. 3.
D. de adm.
& peric.
tut. &
curat.*

*L. 27. de
eod.*

*L. 14. D.
de admi-
nist. & pe-
ric. tut. l. 3.
D. de su-
spec. tut.
& cur.*

brief, s'il est vn lourdaud, paresseux, & homme sans iugement, &c. aussi les Ele&cteurs, Pairs & tels autres seront cōptables du gouuernement du Prince, s'ils n'abolissēt ou preuienēt la tyrānie du Prince, ou s'ils ne supplēēt à sa fetardise par leur soin & diligēce. Finalemēt cōme le tuteur oubliāt à faire pour sō mineur tout ce que vn sage pere de famille pourroit executer, semble estre inexcusable, & que pour mieux s'acquitter on luy baille des cōseillers qui sōt tenus veiller sur luy: avec beaucoup plus iuste raisōles officiers d'une courōne pourront & devront agir contre vn Prince qui au lieu de pere de famille sera deuenu ennemi de son peuple: veu qu'ils sont autant comptables du fait d'iceluy que du leur propre. Il faut aussi que tels Officiers se ramentoient que le Roy tient voirement le premier rang en l'administration de l'Estat: mais qu'eux le secōdent & suivent chascun selon son rang. S'il ne s'acquitte pas de sō deuoir ils ne sont tenus de le suivre: s'il ruine le public, ils ne feront pas les aueugles. Car la Republique leur a esté commise aussi biē qu'à luy, en telle sorte que ce n'est assez qu'ils ayent soin de bien faire, mais conuient aussi qu'ils cōtiennent le Prince en sa charge. Brief, tout ainsi que le Roy a promis de procurer le profit du public, eux semblablement. Encores donc que luy se periure, eux ne penserōt pourtant estre quittes de leur promesse, non plus que les Euesques s'ils enduroyent vn Pape heretique & ruinant

L. 10. &
33. D. de
adm. &
peric. tu-
tor. & cur.

ruinant leur Eglise: au contraire ils se tiendrôt pour dauantage obligez plus ils le verront se plaie en son iniquité. Mais s'il y a de la collusion entre eux & luy, ce sont preuaricateurs: s'ils dissimulent, il les faut appeller traistres & deserteurs: s'ils ne garantissent l'Estat de toute tyrannie, on les doit mettre eux-mesmes au roolle des tyrans: comme à l'opposite ils sont protecteurs, tuteurs & petis Rois, s'ils gardent & maintiennent sain & sauf l'Estat qui leur a esté baillé en garde & en charge.

COMBIEN que ces choses soyent assez fermes d'elles mesmes, si les peut-on encores verifier par exemples. Les Rois de Chanaan, qui ^{148. 9.} tenoyent le peuple d'Israel sous vne dure seruitude corporelle & spirituelle, estoient vrais tyrans d'exercice, encores qu'ils eussent quelque titre: car Eglon & Iabin auoyent paisiblement regné enuiron l'espace de vingt ans. Dieu suscite extraordinairement Ehud qui tue par embusches Eglon, & Debora laquelle desfait l'armee de Iabin, deliurât par tels moyens son peuple de la tyrânie sous laquelle il gemissoit. Les Magistrats ordinaires, les Princes des lignees & tels autres officiers pouuoient bien entreprendre cela, comme de fait Debora leur reproche leur lascheté, & deteste mesmes la desloyauté de quelques vns en cest affaire. Mais il pleut ainsi à Dieu, ayant pitié de son peuple, de remedier à la nonchalance des Magistrats ordinaires. Roboam fils de Salomon refuse de

*S. August.
lin. 1^{re}. de
la Cité de
Dieu, cha.
22.*

descharger le peuple des imposts & surchar-
ges non nécessaires, & quoy que les Estats l'en-
priaissent il s'enorgueillit, & appuyé sur le cō-
seil de ses mignons, menace de faire encores
pis à l'auenir. Nul ne doute que suiuant la te-
neur de l'alliance premierement traitee entre
le Roy & le peuple, les principaux du Royau-
me n'eussent l'autorité de reprimer vn tel or-
gueil. Ils s'oublierent dōc grandemēt en cela,
qu'ils firent par reuolte & diuision ce qui se
deuoit faire en l'assemblée des Estats: item, de
ce qu'ils trāsporterēt le sceptre de la lignee de
Iuda (à qui Dieu auoit attribué le Royaume)
à vne autre lignee: en apres, comme cela est a-
uenu en d'autres faits, pource qu'ils manierent
& poursuiuirent tresmal vne cause iuste & le-
gitime. On lit beaucoup de tels exemples es
histoires des autres Royaumes & gouuerne-
mens publics.

*Tit. Lin.
li. 1.*

BRVTVS chef de la gendarmerie & Lucre-
tius gouuerneur de la ville de Rome, assemblēt
le peuple contre Tarquinius Superbus, & par
l'autorité du peuple chassent ce Roy du thro-
ne Royal. Qui plus est, ses biens sont cōfisquezz
dont il appert assez que si Tarquinius eust esté
saissi au corps, pour certain il eust esté puni se-
lon les loix publiques. Les causes de ceste de-
positiō sont, que Tarquinius abolissoit la cou-
stume par laquelle le Roy demandoit auis au
Senat, qu'il faisoit la guerre & la paix à sa fan-
taisie, qu'il traitoit alliances sans en demander
conseil ni consentement au peuple ni au Se-
nat,

nat, qu'il violoit les loix commises à sa garde: brief, qu'il ne tenoit compte d'observer les conuentions accordees entre les Rois precedens & les seigneurs & peuple de Rome. Quāt aux Empereurs Romains, chascun se souuient & a deuant les yeux la sentence prononcee par le Senat contre Neron iugé en icelle ennemi de la Republique & condamné à estre trainé à la voirie: & l'autre sentence, en vertu de laquelle Vitellius fut ignominieusement mutilé, pourmené en miserable estat par la ville, & finalement mis à mort: vne autre contre Maximinus, despouillé de l'Empire, Maximus & Albinus establis en sa place par le Senat. On y en pourroit adiouster d'autres recueillies des plus asseurez historiens. L'Empereur Traian ne pensoit pas estre exēpt des loix, ni ne vouloit qu'on l'espargnast s'il deuenoit tyran: car en baillant l'espee au grand Preuost de l'Empire, si ie commande comme il apartient, dit-il, aide moy avec ceste espee: si ie fais autremēt desgainela contre moy. Semblablement les François, par l'autorité des Estats, & à la sollicitation des officiers du Royaume, chasserēt du throne Royal Childeric premier, Sigebert, Theodoric & Childeric troisiēme, à cause de leurs tyrannies, & en esleurēt d'autre race pour gouverner le Royaume. Mesmes ils en deposerent quelques vns, à cause de leur faineantise, & faute de sens qui mettoit l'Estat

en proye, & faisoit que les putains, maque-
reaux & flatteurs gouuernoyent tout à leur
plaisir: ostans à tels mal-auisez Phaëthons
la bride du gouuernement, de peur que tout le
peuple ne fust consumé d'un embrasement si
dangereux & ineuitable. Entre autres nous a-
uons Theodoric degradé à cause d'Ebroin,
Dagobert à cause de Plectrude & de Thibaud
son putier, avec certains autres: les Estats esti-
mans autant insupportable le commande-
ment d'un Prince effeminé que d'une femme,
& portans aussi enuis le ioug de quelques ty-
ranneaux manians les affaires sous le nom d'un
Prince abesti, que le ioug d'un seul tyran: brief
ne voulans non plus estre gouuerner par un
homme possédé du diable que par le diable
mesme. Il n'y a pas long temps que les Estats
contraignirent Louys onzième, Prince fort
haut à la main, de receuoir trente-six cura-
teurs, par l'auis desquels il seroit tenu de gou-
uerner les affaires d'État. Les descendants de
Charlemagne substituez à ceux de Merouee
au gouuernement du Royaume, ou ceux de
Capet preferez aux Carlouingiens par ordon-
nance des Estats, & qui regnent encores au-
jourd'huy, n'ont pas autre droit que celui qui
a esté décrit ci dessus: & a esté permis de droit
à tout le corps du peuple représenté par le con-
seil du Royaume, qu'on appelle l'assemblée des
Estats, de les degrader, ou de les establir. Sui-
uant ce mesme droit nous lisons qu'Adolphe
fut

fut depofé de l'Empire d'Alemagne, l'an mil deux cens nonante-fix, pource que par auarice il auoit affailli le Roy de France en faueur de celuy d'Angleterre: & VVenceslas fut aufsi depofé l'an mil quatre cens. Encores ces Princes n'eftoyent pas mefchans, ains du nombre des moins mauuais. Elizabet femme d'Edouard fecond afsembla le Parlement d'Angleterre contre fon mari, lequel y fut depofé à caufe qu'il tyrannifoit fes fuiets, & faifoit mourir les Seigneurs fans conoiffance de caufe. Il n'y a pas long temps que Chriftierne a perdu la couronne de Dannemarch, Henri celle de Suede, Marie Stuard celle d'Efcoffe: & les hiftories dignes de foy tefmoignent plusieurs tels changemens eftre auenus és Royaumes de Pologne, Hongrie, Efpagne, Portugal & autres.

*Froiffard.
liu.1.c.1.*

M A I S que dirons-nous du Pape mefmes? On tiét que les Cardinaux, pource qu'ils l'ont efleu, ou (à leur defaut) les Patriarches qui fecondent les Cardinaux, peuuent en defpit de luy & pour certaines raifons afsembler le Concile, & y iuger le Pape: comme fi par vn noiroire delict il scandalize l'Eglife vniuerfelle, s'il eft incorrigible, fi la reformation eft autant neceffaire au chef qu'aux membres, fi contreuenant à fon ferment il refufe d'afsembler le Concile. Au refte, nous lifons que plusieurs Papes ont efté depofez par l'autorité du Concile. Mais s'ils abusent obftinement de leur

*Ant. de
Butr. Con
fil. quod po
fitum eft
inter cõfil.
Paul.
de Castro,
vol. antiq.
num. 412.
incip. viſo
puncto.*

Mart. autorité, il faut premierement, dit Balde, vſer
Laudenſ. de verbes ou remonſtrances de paroles, ſeçon
in tract. dement d'herbes, c'eſt à dire de remedes, tier-
de Card. cement de pierres: & là où l'adreſſe de l'eſprit
in 2. q. 35. n'eſt ſuffiſante, il y faut employer la force des
Philip. armes. Or ſi par l'auis de la pluſpart des do-
Decius in cteurs par les decrets des Conciles, & par les
quodā con cuenemens il appert que le Concile peut de
ſlio cuius droit depoſer le Pape, lequel toutesfois ſe van-
verba ſue te d'eſtre Roy des Rois, & autant par deſſus
vunt And. l'Empereur que le Solcil eſt par deſſus la Lu-
Barb. in ne, s'attribuant auſſi l'autorité de depoſer
d. conſil. 1. quand bon luy ſemblera les Rois & les Empe-
lib. 1. c. 6. reurs: qui doutera maintenant, que l'aſſemblee
Bald. in c. publique d'un Royaume ne puiſſe degra- der
olim. col. non ſeulement le tyran, mais auſſi depoſer le
penul. de Roy duquel là folie ſeroit pernicieuſe au pu-
reſcri. in blic?
Decretal.
Boniſ. 8.
de maior.
& obed.

MAIS poſons le cas qu'en ceſte nauire po-
 litique le pilote ſ'enyure, la pluſpart de ſes ai-
 des ſ'endorment, ou apres auoir beu à outran-
 ce par enſemble ils ſ'amuſent en iouant à re-
 garder vn eſcueil qui menace leur vaiſſeau, le-
 quel au lieu de tenir la route propre au ſei-
 gneur d'iceluy, ſemble eſtre preſt de faire nau-
 frage: que doit faire alors vn ſouſmaître qui
 ſera vigilant & ſoigneux de ſa charge? Sera- ce
 aſſez de tirer l'oreille à ceux qui dorment, ou
 les piquer par les coſtes, ſans oſer cependant,
 crainte qu'on ne l'eſtime vouloir faire quel-
 que choſe ſans commandement, ſecourir &
 garan-

garantir le vaisseau, qui se va perdre? Quelle forcenerie ou impieté seroit- cela? Puis que la tyrannie, cōme dit Platon, est vne yuressē & for- *An 8. & 9. l. de la Repub.*
 cenerie, si le Prince rēuerse l'Estat de fond en comble, la pluspart des principaux s'entendēt avec luy, ou du moins sōt assopis, si le peuple, qui est seigneur de l'Estat, est reduit à l'extremité par la fraude ou nonchalance de tels officiers: & cependant y ait quelqu'un d'iceux lequel aperçoyue la tyrannie s'auançāt au grand pas, & la deteste de tout son cœur, qu'estimōs-nous qu'un tel doye entreprendre contre vne telle tyrannie? Se contentera-il d'aduertir de leur deuoir ses compagnons qui l'empeschent autant qu'ils peuuent? Mais outre ce que il y a du danger à faire tel aduertissement, & qu'en l'Estat des affaires telle sollicitation sera tenue pour crime capital: ce seroit faire tout ainsi que celuy qui se trouuant entre des brigāds au milieu d'une forest, mespriseroit tous moyens de resistance, & apres auoir mis bas ses armes allegueroit l'autorité des loix, & feroit vne belle harangue de la iustice qui doit reigler la vie humaine. A la verité cela s'appelle enrager avec raison. Quoy donc? fera-il semblant de n'ouyr point les cris du peuple? se taira-il voyant entrer les brigands? se contentera-il de bailler & mettre les mains en sō sein? *L. 3. & l. omme deli Etum. §. ult. D. de re milit.*
 Or si les loix condamnent au supplice le soldat qui pour crainte des ennemis aura fait du malade, se montrant traistre & desloyal en cest

endroit: à quelle punition condamnerons-nous celuy qui trahit malicieusement ou lâchement ceux qu'il a prins en sa garde? Vn tel donques sera tenu de commander aux marini-ers avec vn cri d'allegresse: il donnera ordre que la Republique ne reçoie aucun dommage, & maugré le Roy mesme conseruera le Royaume, sans que le Roy ne seroit point, & s'il n'y a autre remede tiendra les pieds & poings liez à ce Roy, afin de le guerir de sa frenesie & fureur.

*C. nullus
in Cartha-
gin. Con-
cil. Do-
ctores Pon-
tificij.*

CAR, ainsi que nous auons desia dit, toute l'administration du Royaume n'a pas esté resignée par le peuple entre les mains du Roy seul, comme l'Euesché ou charge de l'Eglise vniuerselle n'a esté commise au Pape: ains aussi à tous les Officiers du Royaume, qui s'y doiuent employer de tout leur pouuoir. Or dautant que la concorde procede & part de ceux qui gouvernent, pour euitier toute ialousie entre les personnes esleues en mesme degré, le Roy fut establi pour estre assis au plus haut lieu du gouvernement public. Le Roy iure qu'il aura soin du bien du Royaume, vn chacun des officiers de la couronne promet le semblable de sa part. Si donc le Roy, ou plusieurs de ceux-là faussans leur promesse ruinent l'Estat ou l'abandonnent au besoin, faudra-il que les autres ensuiuent telle lâcheté, & quittent tout, comme si le mauvais exemple de leurs compagnons les absoluoit de leur ser-

serment? Mais au contraire, en voyant les autres ne tenir compte de la foy promise, c'est lors qu'ils doyuent mieux garder la leur: veu mesmes qu'ils sont ordonnez pour cest effect comme Ephores & Controllours publics, ioint que toute chose qui vise au but pourquoy elle est faite, est estimee, iuste quand elle y tēd & nō point autremēt. Et si plusieurs ont promis vne mesme chose, l'obligation de l'un est-elle annulee par le periure de l'autre? si plusieurs sōt pleiges d'une mesme somme, & l'un fait bāqueroute s'ensuit-il que les autres soyēt quittes? Si plusieurs tuteurs administrent mal le bien de leur pupille, & il y a quelque hōme de conscience entre eux, est-il deschargé par la faute de ses compagnons? Au cōtraire les vns ne sauroyent se purger qu'ils ne soyent dif-famez de periure, si entant qu'en eux est ils ne s'efforcent de s'acquitter de leur promesse: ni les autres ne peuuent excuser leur insuffisance & mauuais deportemēt au fait de la tutele mal mesnagee, que par mesme moyē ils n'accusent to' ceux qui ont manié la tutele avec eūx: veu mesmes que non seulement le tuteur vnique, *L. 3. D. de administ.* mais aussi celuy qui l'a esté & ne l'est plus, peut *& peric.* tirer en iustice tous autres qui sont suspects *tutor. &* & donner ordre qu'ils ne touchent à rien. Et *& cur. l. 3.* pourtāt ceux qui ont promis s'employer pour *D. de sus-* tout vn empire ou Royaume, comme le Con- *pect. tutor.* nestable, les Marefchaux, Pairs & autres, estās *& curat.* en prouinces & ceux qui font vne prouince

du Royaume, tels que sont les Ducs, Marquis, Seneschaux, Comtes, Maires & autres sont tenus de secourir toute la Republique, ou la partie d'icelle foulée des tyrans, selon le devoir qu'ils ont receu du peuple apres le Roy. Ceux-là doiuent garantir tout le Royaume de tyrannie, selon le pouuoir què Dieu leur donne: les autres comme deputez és prouinces doiuent garder ce qui est en leur charge: ils doiuent (di-ie) reprimer le tyran comme les autres sont tenus le chasser arriere de leurs limites. Pourtant Mathathias, l'un des principaux, tandis que les vns dissimulent, & les autres sont de la partie ou s'accōmodēt pour la plupart aux menées d'Antiochus pressant tyranniquement le Royaume des Iuifs, afin de re-stablir le Royaume de Dieu abatu par tyrannie, parle à ceux qui prenoient les armes, en la sorte qui s'ensuit: Redressons l'estat de nostre peuple, combatons pour iceluy & pour nos saints lieux. Il appert de ce passage qu'on peut iustement leuer les armes contre vn tyran (comme cestuy-là l'estoit) non seulement pour la Religion, mais aussi pour la patrie. Car ceux-là ne sont taxez de personne d'auoir enuahi le Royaume, ains est dit qu'ils se sont vendiquez le Royaume qui appartenoit à la lignee de Iuda. On trouue és histoires plusieurs exemples seruans à ce propos. Arbactus gouuerneur de Meli, 1. ch. 37. de tue Sardanapale filant entre les femmes & di-

1. Macha.

1.3.43.

Justin. l. 1.

Diodorus

li. 1. ch. 37.

& distribuant tous les thresors du Royaume aux putains. Vindex & Galba gouverneur des Gaules & des Espagnes quittent le parti de Neron supporté en sa tyrannie par le Senat, & attirent la Gaule & l'Espagne à'eux. Mais entre tous actes, l'arrest des iuges de Sparte est notable, & doit passer en chose iugce parmi toutes nations, estant procedé d'un tel Senat que celuy-là. Les Spartiates estans maistres de la ville de Byzance, ils y establirent chef & gouverneur Clearchus, qui ostoit le blé aux citoyens pour le distribuer à ses soldats. Cependant les familles des citoyens mouroyent de faim. Anaxilaus l'un des principaux de la ville, indigné de telle tyrannie, entre en communicatiō avec Alcibiades pour luy rendre la ville, en laquelle il est receu quelque temps apres. A cause de ceste reddition Anaxilaus est accusé deuant le conseil de Sparte, où il plaide sa cause & est absous par les iuges: pource, disent-ils, qu'il faut faire la guerre aux ennemis, non pas à nature. Or il n'y a chose plus contre nature que de voir ceux qui sont commis à la defense d'une place estre plus cruels à l'endroit des habitans d'icelle que les ennemis qui l'ont assiegee. Tel fut l'avis des Spartiates, iustes dominateurs, & se trouuera peu de bons Rois qui n'approuuent ceste sentence d'absolution: car ceux qui desirent regner comme il appartient considerent bien ce que meritent les tyrans, ce que le peuple & les Officiers & principaux

membres d'un Estat peuuent de droit.

MAIS il nous faut passer encores plus outre. Il n'y a ſi petit matelot qui ne ſoit tenu de mettre la main à la beſongne pour empêcher le naufrage du vaiſſeau qui eſt preſt à ſe perdre par la faute où nonchalance du pilote. Chaſque magiſtrat eſt tenu de ſecourir l'Eſtat ſ'il le void proche de ſa ruine par la ſetardiſe ou meſchanceté du Prince & de ſes associez, brief il doit garantir ou tout le Royaume, ou la portion qu'il a en charge, de la tyrannie qui s'en veut emparer. Mais cela ſera-il loiſible au premier venu & à quelque hōme de nulle autorité? Sera-il permis à un Herdonius Sabinus, à Eunus Surianus, ou à un tel maïſtre d'eſpee que Spartacus, brief à un particulier de preſenter le bōnet aux eſclaves, mettre les armes en la main des ſuiets, donner bataille au Prince, encores que la tyrannie preſſe? Nullement. La Republique n'eſt point baillee en garde aux particuliers conſiderez un par un, ains au contraire les particuliers tout ainſi que pupilles ſont ſous la charge des principaux officiers & magiſtrats. Pourtāt ceux-là ne ſōt pas tenus de garder la Republique, qui ne ſe peuuent garder eux-mêmes. Dieu ni le peuple n'ont pas mis le glaive en la main des particuliers: parquoy ſ'ils le deſgaignent ſans commandement, c'eſt faire ſedition, quoy que la cauſe ſemble iuſte. Dauantage ce ne ſont pas les priuez & particuliers qui ſont le Prince, ains tous en

*L'art. c. de
ſedition.*

general & confiderez en vn corps: dont s'ensuit qu'ils sont tenus d'attendre le commandement de tous, c'est à dire de ceux qui representent tout le corps du peuple en vn Royaume, prouince ou ville, ou pour le moins de l'un de ceux-là, auant que rien entreprēdre contre le Prince. Car tout ainsi qu'un pupille ne peut *L. 8. l. 9. D. de au- Elo. & cōf. int. & cur.* intenter action sans l'autorité de son tuteur, encores que le pupille soit vrayemēt seigneur, & que le seigneur ne soit tenu pour tel sinon à raison de sa charge: au cas semblable le peuple ne peut rien entreprendre sinon sous l'autorité de ceux auxquels il a baillé sa puissance & autorité, soyent magistrats ordinaires ou extraordinairement creéz en l'assemblée des Estats, auxquels il a ceint l'espee pour cest effect, s'est liuré à eux comme à ses tuteurs & curateurs, establis en tel degré que le Preteur à Rome lequel appointoit les differens entre les serfs & les maistres, afin que si quelque debat suruient entre le Roy, & les suiets, ceux-là soyent iuges & conseruateurs du droit, de peur que les suiets ne s'auancent iusques là d'estre iuges en leur propre cause. Et pourtāt, s'ils sont greuez de tributs & d'imposts desraisonnables, si on les traite tout autrement qu'on n'a promis, & nul des magistrats ne s'y oppose, ils doyuent demeurer cois & penser que souuentefois les plus sages medecins pour preuenir ou guerir vne forte maladie, commandent la saignée, vne purgation, ou quelque scarifica-

Senec. lib. 1. de bene.

tion : & que les affaires de ce monde vont de telle sorte, qu'à peine vn mal se peut-il guerir sans vn autre mal, & ne sauroit-on obtenir vn bien qu'avec fort grand travail. Ils ont l'exemple du peuple d'Israel qui du temps de Salomō ne refusa point les grandes tailles imposees pour le bastiment du temple & la fortification du Royaume: pource que par l'auis de tous cela estoit mis sus pour la gloire de Dieu, & pour l'ornement & entretenement du public. Aussi ont-ils l'exemple de nostre Sauueur Iesus Christ, lequel estant Roy des Rois, neantmoins pource qu'il conuersoit au monde en autre qualité, & estoit homme priué & particulier, paya volontairement le tribut. Si les magistrats mesmes fauorisent à la tyrannie, ou ne s'y opposent pas formellement: que les particuliers se ramentoient ce qui est dit au 34. chapitre de Iob, qu'à cause des pechez du peuple Dieu permet que les hypocrites regnent, lesquels il n'est possible de ranger ni renuerfer, si les particuliers ne se repentent de leurs fautes pour cheminer en l'obeissance de Dieu: tellement qu'il ne faut apporter autre chose que les genoux ployez & vn cœur humilié. Brief, qu'ils supportent les mauuais Princes, qu'ils en souhaitent de meilleurs, estimans qu'il faut supporter la tyrannie aussi patiemment que lon supporteroit le dommage d'une gresle, d'une rauine d'eaux, d'une tempeste, ou de tels autres accidens naturels: s'ils n'aiment

ment mieux se tirer arriere & changer de pays. Ainsi Dauid s'est retiré aux montagnes, & n'a rien attenté contre le tyran Saul, pource qu'il n'estoit pas l'un des gouuerneurs declairez du peuple: Iesus Christ, le Royaume duquel n'est pas de ce monde s'en est fuy en Egypte, & s'est tiré arriere des pattes de la tyrannie: & saint Paul traitant du deuoir d'un chascun Chretien & non point des magistrats, enseigne qu'il faut obeir à Neron. Rom. 13.

MAIS si tous les principaux Officiers, ou plusieurs, ou l'un d'iceux se met en effort de reprimer vne tyrannie manifeste, ou qu'un magistrat tasche de la chasser loin de la prouince ou portion du Royaume laquelle est en sa charge, & que ce magistrat sous ce pretexte n'ameine point quelque autre tyrannie nouvelle en auant: alors il faut que tous en troupe & à qui mieux mieux se ioignent pour prendre les armes, & qu'ils afsistent de leurs biens & personnes, cōme si Dieu auoit denōcé du ciel qu'il veut donner bataille aux tyrans, & qu'ils s'essayent de deliurer l'Estat public & le Royaume de la tyrannie qui l'opresse. Car Dieu chastie les tyrans par le peuple, comme il fouët le peuple par les mains des tyrans: & c'est vne sentence veritable en tous temps, Que Dieu transporte les Royaumes d'une nation à l'autre, à cause des iniquitez, violences & meschancetez des Princes: mais que la tyrannie ne subsiste pas lōguement. Les Centeniers & gensd'armes executēt de franc courage

Ecclesiast.
10.

le commandement du ſouuerain ſacrificateur Ioiadas, pour abolir la tyrannie d'Athalia. En la meſme forte, tous les fideles Iſraelites ſe rãgent au parti des Machabees, tant afin de reſtablir le pur ſeruice de Dieu que pour maintenir l'Eſtat contre les iniques & malheureux efforts d'Antiochus : au reſte Dieu fauorife, & donne bonne iſſue à leurs iuſtes deſeings.

D I S O N S encores dauantage. Quelques-fois Dieu ne peut-il pas ſuſciter d'être les particuliers quelque vn pour ruiner la tyrãnie? Puis que luy meſme laſche la bride à certains tyrãs fortis du peuple, & dominans ſans titre ni aueu quelcõque, afin de punir par eux les pechez du peuple, pourra-il pas bien auſſi ſuſciter des liberateurs d'être les plus petis du peuple? Luy qui auoit aſſerui ſon peuple Iſrael à Iabin & à Eglon, l'a-il pas deliurẽ & afranchi par Ehud, Barac & Debora, tandis que les magiſtrats & gouuerneurs eſtoient aſſopis? Qu'eſt-ce qui empeſche dõc, direz-vous, que le meſme Dieu qui nous chaſtie en noſtre aage par les tyrans, ne puiſſe auſſi enuoyer extraordinairement quelques chaſtieurs de tyrans? Si Achab extermine les gẽs de bien, ſi Iezabel atitre des faux teſmoins contre Naboth, ne ſe pourra-il plus trouuer de Iehu pour racler la race d'Achab, venger le ſang de Naboth, & faire manger Iezabel aux chiens? I'ay reſpondu ci deuant, que Dieu ſe ſouuient touſiours de ſa iuſtice, & la
main-

maintient autant inuiolable que sa misericorde. Mais dautant qu'en ces derniers temps les signes manifestes, par lesquels Dieu souloit confermer la vocation extraordinaire de ces illustres personnages, nous defaillent pour la pluspart: que le peuple auise bien qu'en desirant trauerser la mer à pied sec il ne soit guidé par vn imposteur (comme nous lisons cela estre auenu aux Iuifs) qui le face noyer: qu'en cherchant vn liberateur il ne suiue quelqu'un qui ayant chassé le tyran ne maintienne luy-mesmes en autre sorte toute la tyrannie: brief, qu'en voulant seruir à la patrie, il ne mesle ses passions parmi, de peur qu'il ne luy en prene comme à plusieurs Republiques d'Italie, asauoir qu'en pensant chasser le mal present il n'en attire vn plus grief & du tout insupportable.

E N somme, pour mettre fin à ceste troisieme question, les Princes sont esleus de Dieu, & installez par le peuple. Comme tous les particuliers vn par vn sont inferieurs au Prince: aussi tout le corps du peuple, & les Officiers du Royaume qui representent ce corps sont par dessus le Prince. En establiissant & receuant le Prince, alliance expresse, ou non expresse de paroles, naturelle, & mesmes civile, se traite entre luy & le peuple: asauoir qu'on luy obeira s'il commande bien, que tous le serviront, si luy mesmes sert à la Republique, que tous se lairront gouverner par luy, s'il se laisse gouverner par les loix: &c. Les Officiers du

Royaume sont gardiens & protecteurs de ceste alliance & conuention. Celuy qui l'enfrainct traistreuſement & de malice obſtinee eſt vrayement tyran d'exercice. Et pourtant les Officiers du Royaume le peuuent iuger ſelon les loix, & ſ'il veut faire teſte leur deuoir les oblige de luy courir ſus avec les armes, ſ'ils ne peuuent autrement le reprimer. Ces Officiers ſont de deux ſortes. Ceux qui ont en charge tout le Royaume vniuerſellement comme le Conneſtable, les Mareſchaux, les Pairs & autres tels, ſont tenus, chaſcun à part ſoy (quand tous les autres diſſimuleroient ou tiendroyēt meſmes le parti de la tyrannie) de reprimer le tyran. Les autres Officiers qui gouuernent quelque prouince ou portion de pays du Royaume, comme les Ducs, Marquis, Comtes, Conſuls, Maires, &c. peuuent ſelon leur droit repouſſer la tyrannie & le tyran arriere de leurs villes & gouuernemens. Mais les perſonnes priuees & particulieres doiuent ſe garder de deſgainer l'eſpee cōtre les tyrāſ d'exercice, pource qu'iceux n'ont pas eſté eſtablis par les particuliers, mais par tout le corps du peuple. Mais quant aux tyrans qui ſe fourrent en auant ſans aucun titre, d'autant que nulle paction n'eſt entreuenue entre eux & le peuple, il eſt permis à tous indifferemment de leur courir ſus: & en ce rāg de tyrans lon peut mettre ceux qui abuſans de la beſtiſe & nonchalance du Prince legitime exercent tyrannie

nie

nie sur les ſuiets d'iceluy. Voila le ſommaire de ce qui a eſté amplement traité en la troiſieſme queſtion, à quoy (pour entiere reſolution) lon peut ioindre ce qui eſt diſcoursu en la ſeconde.

Q V A T R I E S M E Q V E S T I O N ,

AS A V O I R , S I L E S P R I N C E S voifins peuuent ou ſont tenus de droit donner ſecours aux ſuiets des autres Princes , affligez à cauſe de la vraye Religion ou opprimez par tyrannie manifeſte.

NO u s auons maintenant vne autre queſtion à traiter, en la reſoluſiõ de laquelle il faut apporter plus de conſcience que de ſcience, & n'en faudroit diſputer en ſorte quelconque ſi la charité regnoit au iourd'huy au monde. Mais, ſelõ que les hommes ſe gouuernent en ce temps-ci, puis qu'il n'y a choſe plus rare ni plus precieuſe que ceſte charité, il faut que nous traitions ſommairement noſtre queſtion. Nous auons monſtré par viues raiſons que le peuple peut reprimer, chaffer & chaſtier les tyrans Eccleſiaſtiques & ſeculiers: mais à cauſe que telles gens ſont ſi rufeſ, ou que les ſuiets ſont ſi peu auifeſ, qu'à peine peut-on

Q.ij.

descourir le mal, sinon apres qu'il a tout emporté, & que les suiets ne pensent à se conseruer sinon alors qu'ils sont presque ruinez, ou reduits tellement à l'estroit qu'ils n'en peuuent sortir par leurs propres forces, ains sont contrains implorer le secours d'autrui: on demande, si les Princes Chrestiens peuuent selô droit & raison & en bonne conscience secourir tels suiets soustenās la cause de l'Eglise ou de leur Royaume. Il y en a plusieurs qui esperans s'agrandir ou emplir leurs coffres en secourant les affligez, ont incontinent respondu qu'il estoit loisible de ce faire: & c'est ainsi que les Romains, Alexandre le Grand & plusieurs autres, sous pretexte de reprimer les tyrans ont souuentesfois estendu leurs limites. Il n'y a pas long temps que nous auōs veu le Roy Héry deuxiesme faire la guerre à l'Empereur Charles le Quint, sous couleur de defendre & deliurer les Princes protestās: comme aussi Henri huitiesme, Roy d'Angleterre se monstra prest de secourir les Alemās, si Charles le Quint les vouloit molester. Mais s'il y a quelque apparence de danger ou de petit profit, alors on orra plusieurs Princes disputer s'il est loisible ou non de donner secours. Et comme ceux-là couuroient leur ambition ou auarice du voile de pieté, ceux ci au contraire appellent leur lacheté iustice: encores que la pieté, soigneuse du bien d'autrui, ne conseillast aucunement ceux-là: & que la iustice qui regarde entiere-

ment

ment à soulager le prochain n'incitast ceux-ci à se refroidir. Donques sans nous arrester ni aux vns ni aux autres voyons ce que la vraye pieté & iustice cōseillent au fait de la Religio.

P R E M I E R E M E N T tous sont d'accord en ce poinct, Qu'il y a vne seule Eglise, de laquelle Iesus Christ est le chef, & dōt les membres sont tellemēt vnīs & conioints que le plus petit d'entre eux ne peut estre offensé, que les autres n'en sentent le coup & la douleur, comme toute l'Ecriture Saincte en fait foy. Et pourtant l'Eglise est comparee à vn corps. Or il auient ordinairement que le corps perit non seulement par quelque grand' playe du bras ou de la cuisse, mais aussi est grandement intéressé & par fois meurt par vn mal suruenu au petit doigt. En vain donqués vn homme se vantera que la conseruatiō de ce corps luy est recommandee, s'il laisse deschirer & despecer ce qu'il pouuoit conseruer entierement. L'Eglise est comparee à vn edifice. De quelque costé qu'un edifice soit miné, il tombe souuentefois entierement par terre: & à quelconque plâcher que la flamme s'attache, toute la maison est en danger. Et pourtant celuy-là seroit digne de moquerie, qui differeroit d'aller esteindre le feu esprins au toict de la maison, pource que luy demeureroit en la caue. Qui ne tiendroît compte d'esuenter vne mine, sous pretexte qu'elle seroit dressée pour abattre ceste muraille-ci, & non pas ceste-là, chascun le

tiendroit pour insensé. Derechef l'Eglise est estimee ressembler à vne nauire, laquelle en faisant naufrage se perd entierement: à l'occasion dequoy ceux qui sont en prouë & en la carene ne sont pas plus asseurez que ceux qui demeurent en poupe & sur le tillac, si quelque tourmente vient assaillir le vaisseau, veu qu'on dit en commun prouerbe de ceux qui sont en mesme danger, qu'ils sont en mesme nauire & courent mesme fortune. Cela presuppposé, certainement quiconque n'est esmeu de la douleur, de l'embrasement & de l'agitation de l'Eglise, ne peut estre du corps d'icelle, n'est du nombre des domestiques de Iesus Christ, & ne demeure point en l'Arche. Celuy qui en est esmeu tant soit peu, ne doit non plus disputer s'il est tenu de secourir les membres affligez de l'Eglise, que soy mesmes, veu qu'ë l'Eglise nous ne sommes qu'un corps: ains faut qu'un chascun en sa vocation leur assiste comme il doit, & de tant meilleur courage, selon que Dieu luy en aura dōné meilleur moyen: car ce qu'il nous donne n'est pas pour nous, ains aussi pour en faire part aux autres.

COMME ceste Eglise est vnique, aussi est-elle recommandee & baillee en garde à tous les Princes Chrestiens en general & à chascun d'eux en particulier. Dautant qu'il y auoit danger de la laisser en charge à vn seul, & que l'vnité d'icelle ne requiert nullement qu'elle soit diuisee en pieces, & chascune assignee à vn parti-

particulier : Dieu l'a commise toute entiere aux particuliers, & toutes les parties d'icelle à tous en general, non seulement pour la conseruer saine & sauue, mais aussi pour l'amplifier autant que faire se pourra. Tellemēt que si vn Prince a soin d'vne portiō de l'Eglise, cōme de celle d'Alemagne ou d'Angleterre, & cependant mesprise & abādōne vne autre partie oppresse, laquelle il pouuoit secourir, il a abandonné l'Eglise, veu que Christ n'a qu'vne seule espouse, laquelle le Prince doit tellement defendre & garder, qu'elle ne soit violee ni corrompue nulle part s'il est possible. Tout ainsi que chascun particulier est tenu d'auancer la restauration de l'Eglise par humbles & ardentès prieres : aussi les magistrats sont tenus de procurer le mesme avec tous les moyēs que le Seigneur leur a mis en main. Car l'Eglise d'Ephese n'est point vne autre Eglise que celle de Colosses : mais ces deux sont portions de l'Eglise vniuerselle, laquelle est le Royaume de Christ, l'auenement & auancement duquel chascun doit souhaiter : les Rois, Princes & magistrats sont tenus de l'estendre, agrandir, maintenir & faire aparoir en tous lieux & maugré tous ennemis. Pourtant il n'y auoit qu'vn temple en Iudee, edifié par Salomon, ce qui representoit l'vnité de l'Eglise. Or le sacristain ou marguillier d'vn temple meriteroit d'estre mocqué & fouetté à bon esciēt, qui en garderoit seulement vne partie bien

close & couuerte, & ne se soucieroit nullement du reste, encores que la pluye gastaſt tout. Séblablement tous les Rois Chrestiens en receuant l'espee au iour de leur sacre promettent de maintenir l'Eglise Catholique ou vniuerselle: & la ceremonie dont ils vsent alors mōstre cela, car avec ceste espee en main ils se tournent vers Orient, Occident, Midi & Septentrion, afin que lon sache que nulle partie du monde n'est exceptee. En se declairant ainsi protecteurs de l'Eglise, cela s'entend infailliblement de la vraye, non pas de la fausse: au moyen de quoy ils doyuent s'employer à la reformation & vraye restauration de celle qu'ils tiennent estre pure & vraye, c'est à dire Chrestienne & reglee parole de Dieu.

Nous auons des exemples pour prouuer que les princes craignans Dieu l'ont ainsi pratiqué. Du temps d'Ezechias Roy de Iuda, le Royaume d'Israel estoit des lōg tēps au parauant, aſauoir depuis le Roy Oſee, aſſerui au Roy des Assyriēs. Et pourtant si ſeulement l'Eglise de Iuda, & non toute l'Eglise vniuerselle, eust esté baillee en garde à Ezechias: & si en la cōseruatiō de l'Eglise il eust ſalu tenir meſme meſure qu'au partage des terres, & en l'impoſitiō des tributs, il n'y a doute qu'Ezechias ſe fuſt contenu en ſon pays lors que les Assyriens dominoient ainsi par tout. Or nous liſons qu'il enuoya des poſtes en Israel, aſauoir vers les ſuiets du Roy d'Assyrie pour les faire venir en Ieru-

Ierusalē à la celebration de la Pasque : & mesmes il aida aux fideles Israëlités des lignees d'Ephraïm, de Manassé & autres suiets aux Assyriens, à ruiner les hauts lieux qui estoient en leurs quartiers. Nous lisons aussi que le bon Roy ^{2. Rois 22.} Iosias chassa l'idolatrie non seulement de son ^{2. Chron.} Royaume, mais aussi hors du Royaume d'Israel ^{34. & 35.} lors entierement asservi au Roy des Assyriens. Et à bon droit: car quand il est question de la gloire de Dieu & du regne de Christ, il n'y a bornes ni limites qui doivent arrester le zele des Princes Chrestiens. Si l'aduersaire est puissant & a de grands moyens, ceux qui craignent vraiment le Seigneur doivent à l'exemple des surnommez apprendre à ne craindre personne. Aussi plusieurs Princes Chrestiens ont ensuiui tels exemples depuis le temps que l'Eglise conuaincue en Palestine fut espandue par tout le monde. Constantin & Licinius gouuernoient l'Empire ensemble, l'un en Orient, l'autre en Occident. Ils estoient associez ayant pareille puissance l'un que l'autre. On dit communement qu'il n'y a point de commandement de pair à pair: ce nonobstant Constantin assaillit en guerre ouverte Licinius, lequel bannissoit, tourmentoit & saccageoit les Chrestiens, & plusieurs de la noblesse entre autres, sous pretexte de Religion. En ceste guerre Constantin contrainst son aduersaire de donner aux Chrestiens exercice libre de leur Religion: & pource qu'il rompoit sa foy, & retournoit à ses precedentes cruautés, Constantin le fit attraper

& mourir en la ville de Theſſalonique. Les Theologiens d'alors celebrent ſi hautement la pieté de ce Conſtantin, qu'aucuns ont eſtimé que ce qui eſt contenu en Iſaie, euſt eſté expreſſement dit de ceſt Empereur, aſauoir que les Rois ſeroient paſteurs & nourriſſiers de l'Egliſe. Apres la mort d'iceluy, l'Empire Romain fut diuiſé entre ſes enfans egale-
ment, ſans que l'un fuſt auantagé plus que l'autre. Conſtans fauoriſoit aux Chreſtiens, Conſtanti-
us qui eſtoit l'aiſné, ſouſtenoit les Ariens, & chaffa hors d'Alexandrie le docteur Athanaſe, grand aduerſaire des Ariens. Certainement ſi
jamais il y a eu deu auoir quelque conſidera-
tion en matiere de confins, c'eſt entre freres. Et neantmoins Conſtans menace de courir
ſus à ſon frere ſ'il ne reſtablit Athanaſe, & luy
euſt eſmeu vne guerre, ſ'il euſt guerres delayé.
S'il en eſt venu iuſques là pour le reſtabliſſe-
ment d'un Eueſque: cela ſeroit-il pas plus rai-
ſonnable, ſi vne partie du peuple eſtoit tyran-
niſee, qu'elle demandat ſecours & exercice de
ſa Religion ſous l'autorité des magiſtrats &
gouuerneurs? Ainſi, à la perſuaſion de l'Eueſ-
que Anticus, Theodoſe fit la guerre à Coſroës
Roy de Perſe, pour deliurer les Chreſtiens
tourmentez à cauſe de la Religion, combien
qu'au reſte ils ne fuſſent que perſonnes pri-
uees & particulieres. Ces Princes tant equita-
bles, qui ont laiſſé ſi grand nombre de bonnes
loix, & qui ont eu ſi grand ſoin du droit,
n'euffent

n'eussent pas entrepris tels actes, s'il leur fust venu en pensée que cela estoit vsurper sur les limites d'autrui & violer le droit des gens. Mais à quel propos les Princes Chrestiens ont-ils tant de fois voyagé en la terre sainte contre les Sarazins ? pourquoy a-on demandé & leué tant de dismes saladines ? que veulent dire tant d'alliances & tant de croisades contre les Turcs, s'il n'a point esté loisible aux Princes Chrestiens, voire aux plus eslongnez de retirer l'Eglise de Dieu de la main des tyrans, & les Chrestiens captifs hors du ioug de seruitude ? Mais quelles raisons les esmouuoient à entreprendre telle guerre ? sinon, pource que l'Eglise estant vne, Christ appelloit chascun de toutes parts aux armes ? que les perils communs requeroient que tous courussent au deuant pour les repousser d'un cōmun effort ? Ce qui cōuient entièrement au propos que nous deduisons. Si cela leur a esté loisible contre Mahumet, & non seulement loisible, mais aussi que les lasches & delayeurs ayent esté iugez dignes de punition, comme les gens de bonne volonté ont receu diuerses recompenses : pourquoy sera-il defendu quand lon s'attachera à l'Antechrist ? Si ç'a esté vne guerre legitime de guerroyer les Turcs assaillans nostre Troye, pourquoy sera-elle illicite si lon court sus à vn Sinon boute-feu detestable ? Brief, si lon a estimé actes heroïques d'affranchir les Chrestiens de seruitude corporelle

(car quant aux consciences les Turcs ne contraignent personne) est-ce pas chose encores plus louable d'afranchir & remettre en liberté les ames captiues?

Ces exemples de tant de Princes craignās Dieu pourroyent seruir de Loy. Mais il faut ouir ce que Dieu mesmes prononce en plusieurs endroits de sa parole, par la bouche des Prophetes, contre ceux qui n'auancent point le bastiment de l'Eglise, ou qui ne tiennent cōpte de l'affliction d'icelle. Les Gadites, les Rubenites, & la demie lignee de Manassé demandent à Moysse qu'il leur donne partage deçà le Iordain: ce que Moysse leur accorde, mais à cōdition, que non seulement ils aiderōt leurs autres freres Israelites à cōquerir le pays de Chanaan, mais aussi marcheront les premiers & feront l'auātgarde, puis qu'ils auoyent esté partagez les premiers. S'ils font autrement il les anathematize, & les compare à ceux qui auoyēt esté iugez rebelles en Cadesbarné. Et quoy? dit-il: vos freres combattront, & vous-vous reposerez cependant? mais au cōtraire, vous passerez le Iordain & ne retournerez en vos maisons que premierement Dieu n'ait chassé ses ennemis de deuant sa face. Alors serez-vous innocens en la presenee du Seigneur & de son peuple Israel. Il montre par cela. que ceux qui ont esté premierement benis par le Seigneur tout bon & tout puissant doyuent attendre sa vengeance sur leurs testes s'ils ne secourent leurs

Nom. 32.

Iosué. 4.

12.

Deut. 3.

20.

leurs freres, s'ils n'ont part à leurs trauaux, &
 s'ils ne marchēt les premiers à la guerre. Sēbla
 blement, lors que sous la conduite de Debora *Iug. 5.*
 les Nephthalites & Zabulonites leuerēt les ar-
 mes contre le tyrā Iabin: & cepēdant les Rube-
 nites, qui deuoyent estre les premiers en cāpa-
 gne, se dōnoyent du bon tēps, en iouant de la
 fluste autour de leurs troupeaux: les Gadites pē-
 soyēt estre en seureté ayās la riuere entre deux:
 les Danites se glorifioyēt en leurs ports de mer:
 & ceux de la lignee d'Aser se cōfioyēt en la for-
 ce inaccessible de leurs mōtagnes: l'Esprit de
 Dieu parlāt par la Prophetesse les cōdāne tous
 en termes bien expres. Maudissez Meroz, & ses
 habitās, dit l'Ange du Seigneur, car ils ne sont
 point venus au secours du Seigneur avec les
 vaillans. Mais benite soit lahel fēme de Heber
 Cineē, laquelle pouuāt alleguer l'alliāce de sō
 mari avec les Chananeēs, neātmoins tue Sifa-
 ra chef de l'armee. Et pourtāt Vrie parloit en
 vray seruiteur de Dieu & de la patrie, quād il di-
 soit, l'Arche du Seigneur, Israel & Iuda sont és *2. Sam. 11.*
 têtes, ils demeurēt és pauillōs, passēt les nuits *11.*
 entieres en plaine cāpagne, & moy i'iray bāque-
 ter avec ma fēme, & me dōneray du bō temps?
 Aussi vray que Dieu vit, ie ne fcray iamais cela.
 Tout au cōtraire, l'impieté des Princes d'Israel
 se descouure, quād sous l'asseurāce des hautes *Amos. 6.*
 mōtagnes de Samarie & de la forteresse de Siō,
 ils se desbordent en dissolutiōs, bāquetēt, boy-
 uēt le vin delicieux, dormēt és liets d'yuoire &
 se parfument, mesprisans cependant le pauvre-

Ioseph (c'est à dire le troupeau du Seigneur) froissé, fourragé, & harassé de toutes parts & n'ont compassion quelconque de son affliction. Pour ceste cause, dit le Seigneur des armées, ie hay l'orgueil de la maison de Iacob, ie dereste ses palais magnifiques. I'ay iuré par mon ame, que ie liureray la ville & l'entour d'icelle: & ceux qui se veautrēt ainsi en leurs delices, marcheront les premiers en captiuité. De mesme impieté sont entachez les Ephraimites, qui au lieu de gratifier & louer Gedeon & Iephthé des victoires obtenues sur les Madianites & Ammonites desquels ils triomphoyent, portent enuie à ceux qu'ils auoyent abandonné au besoin. Autant en faut-il dire des Israelites, qui voyans Dauid demeuré Roy paisible, disent tout haut, nous sommes ta chair & tes os, & quelques anneés apres le voyans en affaires, crient, nous n'auons point de part en Dauid, ni d'heritage au fils d'Isai. Mettons aussi en ce rang tous les Chrestiens de nom qui veulent bien communiquer à la table de l'Eglise, & refusent boire en la coupe d'affliction avec leurs freres: cherchent salut en l'Eglise & ne se soucient nullement de la conseruation & prosperité d'icelle ni de ses membres: brief adorent vn mesme Dieu & Pere, recognoissent & s'auouent d'vne mesme famille, font profession d'estre vn mesme corps en Iesus Christ, & toutesfois ne donnent secours ni soulagement quelconque à leur Sauueur affligé & necessiteux

Iug. 8. &
12.

2. Sam.

5. 2.

2. Sam.

20. 1.

teux en ses membres. Quelle vengeance pensons-nous que Dieu fera d'une telle impiété? Moïse compare ceux qui abandonnent leurs freres, aux rebelles de Cadesbarné. Or nul d'eux, par sentence de Dieu, n'entra en la terre de Chanaan. Que ceux-là donc ne prétendent rien en la Chanaan celeste, qui ne veulent tendre la main à Christ crucifié, mourant tous les iours mille fois en ses membres, & (par maniere de dire) leur allant demander l'aumosne de porte en porte. Le Fils de Dieu adiuge, par arrest de sa bouche, au feu éternel ceux qui ne l'ont logé quand il estoit étranger, qui ne se sont souciez de le reschauffer, vestir, nourrir & visiter, le voyans transi de froid, nud, disetteux, malade & captif. Et pourtant que ceux-là attendent les supplices perdurables à iamais qui font la sourde oreille, oyans Iesus Christ souffrant toutes ces choses journellement en ses membres: combien qu'au reste ils aient une belle apparence & fassent les grands Chrestiens: leur condition sera beaucoup plus grieveuse que celle des autres infidelles. Car quoy? Sont-ce proprement les Iuifs, les Scribes, & les Pharisiens qui crucifient Iesus Christ? Faut-il dire le mesme des Payens, des Turcs, & de quelques Chrestiens, qui le persecutent, tourmentent & saccagent en ses membres? Non certes. | Les Iuifs ont creu & protesté qu'il estoit seducteur, les Payens l'estiment mal-faiteur, les Turcs infidèle, les au-

tres heretique : tellement que si lon considere l'intention de telles gens , selon laquelle on a acoustumé de mesurer les fautes, on dira qu'ils ne semblent pas faire la guerre à Iesus Christ, ains à vn autre , & à des gens qui meritent ce traitement. Mais ceux vrayement & proprement persecutent & crucifient Iesus Christ, qui faisans estat de le reconoistre pour leur Mefsias, Redempteur & vray Dieu, le laissent gehenner & crucifier en ses membres , encores qu'ils pourroyent bien empescher tels maux. En somme celuy qui ne deliure point de la main du meurtrier son prochain qu'il void en peril euident , il est autant coupable que le meurtrier mesme : car puis qu'il n'a tenu conte de le secourir , il a voulu qu'iceluy fust tué. En tout crime il faut considerer la volonte. Mais, pour dire ce qui en est, les Princes Chrestiens nommeement, qui ne secourent point les fideles affligez pour la waye Religion, sont beaucoup plus coupables de meurtre que nuls autres , attendu qu'ils pouuoient sauuer vne infinité de gens , qui à faute de secours sont mis à mort , ioint que c'est beaucoup plus grand crime d'auoir laissé tuer son frere que quelque autre estranger. Je diray d'auantage, que leur faute est plus grande que celle des tyrans mesmes : car il y a beaucoup plus d'offense de tuer vn homme de bien, innocent & craignant Dieu, qu'un brigand, imposteur, magicien ou heretique : c'est vn crime trop plus

*S. August.
sur le
Pseu. 82.
S. Ambroise au
1. liu. des
Offices.
Gratian
au decret.*

pl'esträge de faire la guerre à Dieu qu'à vn hō me mortel : brief, en vn mesme fait la perfidie surpasse & est plus à condāner que l'ignorance.

M A I S pourroit-on bien dire le mesme de ceux qui n'assistent aux personnes oppressees de tyrannie, ou qui luy font teste pour conseruer vn estat public? Car en cest endroit la conionction & alliance ne semble pas estre si estroite entre les vns & les autres, ains est question de la Republique, diuersement gouvernee selon les pays, & recommandee particulièrement à ceux-ci ou à ceux-là, & non pas de l'Eglise de Dieu qui est composée de tous, & est recommandee à tous en general & à chacun en particulier. Le Iuif n'est pas seulement prochain au Iuif, mais aussi au Samaritain & à tout autre hōme, dit Iesus Christ. Or nous deuons aimer nostre prochain cōme nous-mesmes : & pourtant le Iuif doit deliurer le Iuif & tout autre estrāger aussi de la main du brigād, si cela est en sa puissance & s'il veut s'acquitter de son deuoir. Et personne ne disputera s'il est loisible de secourir vn autre, si lon estime raisonnable d'estre secouru au besoin : ioint que c'est chose beaucoup plus iuste de secourir autrui que soy-mesme, attendu que ce qui se fait par pure charité est plus iuste & louable que ce que lon execute par colere, par appetit de vengeance, ou par autre transport d'affectiō, & que personne ne tient mesure en se vengeant es torts qu'on luy a faits, au contraire les

pl^r desbordez peuuēt se moderer en s'opposāt aux torts qu'ils voyent faire à leurs prochains.

*An 1. &
3. des Of-
fices.*

A v restē, les Payens mesmes nous pourront apprendre ce que la sociēté humaine, & la nature commune de toutes choses requierent de nous en cest endroit. Pource, dit Ciceron, que tous hommes ont vne mesme nature humaine, nature prescrit & ordonne, qu'un homme desire & procure le bien de l'autre quel qu'il soit, seulement pour ceste cause qu'il est homme: autrement il faut que toute association humaine perisse. Et pourtant, comme la iustice a deux fondemens: le premier, qu'on ne face tort à personne: le second, qu'on aide à chacun, si faire se peut: aussi y a-il deux sortes d'injustice, l'une, de ceux qui font tort à leurs prochains, l'autre de ceux qui pouans empescher le mal neantmoins laissent leurs prochains acablez sous iceluy. Car quiconque fait tort à autre, il vse de violence enuers son cōpagnon, estant poussé de colere ou de quelque autre passion: mais celuy qui ne reuenge point l'affligé, & ne pare point aux coups, encores qu'il en ait le moyen, vn tel est autant coupable que s'il abandonnoit ses parens, ou ses amis, ou sa patrie. Ce que le premier fait est attribué à colere, qui est vne courte rage: la faute commise par le deuxiesme descouure vn meschant cœur & vne ame tortue, bourreaux & tyrans perpetuels de la conscience. La fureur du premier se peut excuser en quelque sorte, mais la

ma-

malice du second n'a couleur quelcō que. Vous direz, ie crain qu'en secourant l'vn ie ne face tort à l'autre: & ie vous respon que vous voulez couvrir vostre lascheté du manteau de iustice: & si vous mettez la main sur la cōscience, vous cōfesserez que cest toute autre chose que iustice qui vous destourne de vostre deuoir. Car, comme le mesme Ciceron dit en vn autre endroit, ou tu ne veux pas te rēdre ennemi, ou te trauailler, ou faire quelque despense: ou bien la nonchalance, la stupidité, ou tes estudes & occupations te detiennent tellement que tu es content de laisser là ceux que tu deuois cōseruer. Or en disāt que tu te mesles de tes affaires, craignant de faire tort à autrui, tu tombes en vne autre sorte d'iniustice: car tu abandonnes la societé humaine, tu n'y apportes rien de ton esprit, de ton corps, ni de tes biens. Vous oyez l'auis des Philosophes Payēs & Politiques, qui ont beaucoup pl⁹ sainctemēt parlé en cest endroit que plusieurs Chrestiens de nostre tēps.

DE là est venu que les loix Romaines condamnent le voisin qui ne garātīt point le serf estant outrageusement traité de son maistre. Entre les Egyptiens, si quelqu'un eust veu en passant vn autre assailli & offensé par des brigands, & ne luy dōnoit secours selon son pouoir, il estoit coupable de mort: & le moins qu'il deuoit faire estoit de deferer les aggresseurs au Magistrat. S'il n'en tenoit conte, il receuoit vn certain nōbre de coups sur sō corps,

*Diodore
Sicilien
au 2. liu.
chap. 2.*

& ne mangeoit ni beuvoit de trois iours. Si le voifin eft ainfi obligé & tenu de faire deuoir à fon voifin, voire enuers vn incognu affailli par vn brigand: ne fera-il pas encores plus loifible à vn bõ Prince de fecourir, nõ pas les ferfs cõtre vn maiftre courroucé, ou les enfãs cõtre vn pere furieux, mais le Royaume cõtre vn tyran, la Republique contre vn particulier, le peuple (quj eft vray feigneur) contre vn feruiteur & procureur du public? Et s'il n'ẽ tiẽt cõte, meritera-il pas d'ẽtre appellé tyran luy mefmes & d'ẽtre chastié pour tel, commẽ l'autre d'ẽtre appellé brigãd, qui n'aura fecouru fõ prochain? Thucydide fur ce propos dit que nõ feulemẽt

Ann. 1. l. iii. ceux-là font tyrans qui font esclauẽs les autres hõmes, mais beaucoup pl^{us} ceux qui ayãs moyẽ de reprimer telle violẽce ne s'en fouciẽt aucunemẽt. Entre autres, ceux qui veulent ẽtre appelez proteẽcteurs de la Grece & defenfeurs de la patrie: cependãt ils ne daigneroyẽt pas fe remuer pour defgager ceux qui fõt en peine. Cela eft tresbien dit. Car quant au tyran il eft cõtraint de fe comporter outrageufemẽt en l'Eftat qu'il a vſurpé par violence, & tiẽt le loup par les oreilles, comme diſoit Tiberius, ne le pouuãt retenir qu'avec force, ni laſcher qu'au grand hazard de fa vie. Afin donc d'ẽſtair d'ẽtre vn crime par vn autre crime, il enfile vne meſchancetẽ à l'autre, & eft contraint faire tort à autruy, pour faire du bien & procurer quelque repos à ſoy-mefme. Mais le Prince qui regarde
comme

comme en passant le temps les forfaits du tyrā, le massacre des innocens, lesquels il pourroit conseruer, pour certain en prenāt son plaisir à vne escrime si sanglante, est d'autāt plus coupable que le tyran mesme : & celuy qui fait entretuer les autres est plus homicide que ceux qui tirent : & celuy qui de gayeté de cœur meurtrit vn homme merite plus grieve punition sans comparaison qu'vn qui l'auroit fait par necessité & pour se garantir soy mesme.

Si quelques vns obiectent, Que c'est faire *Pompon. de reg. in- rml. 36.* cōtre tout deuoir de se mesler des affaires d'autrui: ie respōs avec le vicillard de Terēce, ie suis homme, i'estime que tout deuoir d'humanité m'est conuenable. Si d'autres voulans couvrir leur lascheté alleguent que les bornes & iurisdicions sont distinctes, & qu'il n'est loisible de faucher la moisson d'autrui: aussi ne suis- ie pas d'auis que sous tel pretexte vn Prince enuambe sur l'autre & s'empare de ses pays, pour tirer en son aire le blé qui ne luy appartient pas, ce que plusieurs ont fait avec telle couerture. Ie ne veux pas, di- ie, qu'à l'exēple de cest arbitre, duquel parle Ciceron, vous vous apropiiez la chose qui est en controuersie. Ains ie *An 1. lin. des Off.* requiers que vous reprimiez le Prince qui enuahit le Royaume de Christ, que vous conteniez le tyran en ses limites, que vous tendiez la main au peuple affligé, & que releuiez la Republique abatus par terre, vous comportant de telle sorte en cest affaire que sans auoir es-

gard à vostre particulier vous monstriez n'auoir autre but que le bien & repos de la société humaine. Car puis que la iustice regarde tousiours dehors, & l'iniustice arreste l'homme entierement à soy-mesme: ce sera fait en homme de bien, si en cela vous n'auiez aucun esgard à vostre profit particulier.

P O V R dire tout ce que dessus en vn mot, si le Prince outrepassé outrageusement les bornes de pieté & de iustice, le Prince voisin pourra sortir iustement & religieusement hors de son pays, non pas pour empieter celuy d'autrui, mais pour donner ordre que l'autre se contienne en ses limites: & s'il ne tient conte de son deuoir en cest endroit il se monstre inique & meschant. Si vn Prince tyrannise le peuple, le Prince voisin doit donner secours au peuple d'aussi franche volonté, qu'au Prince son compagnon, cas auenât que le peuple se fust mutiné contre iceluy: & doit encores estre plus prompt à secourir le peuple, veu qu'il y a beaucoup plus de pitié en plusieurs affligez qu'en vn seul. Si Porsena remeint à Rome Tarquinius Superbus, Constantin appelé par le peuple & Senat Romain aura encores plus iuste titre pour chasser le tyran Maxentius. Brief si l'homme se fait loup contre son prochain, qui empesche, suiuant le proverbe, que l'homme ne soit vn Dieu à l'homme? Et pourtant les anciens ont mis Hercules au nombre des dieux, pource qu'il chastia & dópta Procrustes, Busyris & autres tyrans, pestes du

genre humain, & monstres de la terre, où ils regnoyēt. Ainsi, tandis que l'Empire Romain demeura libre, on l'appella la sauuegarde de tout le monde contre la violence des tyrans, pource que le Senat estoit le port & refuge des Rois, peuples & nations. Semblablement Constantin, appelé par les Romains contre Maxentius, eut Dieu pour general de son armee, & toute l'Eglise celebra merueilleusement ce voyage, encores que Maxentius eust mesme autorité en Occident que Constantin en Orient. Aussi Charlemagne entreprit la guerre contre les Lombards, estant requis de secourir la noblesse d'Italie: combien que le Royaume des Lombards eust pied ferme des long temps auparauant, & que luy ne peust s'attribuer aucun droit sur eux. Pareillement lors que Charles le Chauue Roy de France eust fait tyranniquement mourir le gouverneur du pays entre Seine & Loire, avec le Duc Lambert, & vn Seigneur nommé Iamætius, & que d'autres grâds Seigneurs du Royaume se furent retirez vers Louys Roy d'Alemagne, frere de mere du Chauue, pour demâder secours cōtre le Chauue & contre sa mere nommee Iudith, l'une des plus meschantes femmes du môde, Louys leur donna audience en vne grande assemblee des Princes Alemans, par le commun auis desquels il fut arresté qu'on feroit la guerre au Chauue, afin de reestabliir en leurs biens, honneurs & estats ceux qui auoyent esté chassez. Brief, cōme il y a eu quelques tyrans ça & là: aussi tous

*Cicer. an
2. lin. des
Offic.*

les historiens montrent qu'il s'est trouué des Princes voisins pour s'opposer à la tyrannie & maintenir le droit du peuple. Les Princes d'aujourd'huy ensuiuât tels exemples doyuent reprimer les tyrâs des corps & des ames, ennemis de la Republique & de la gloire du Fils de Dieu: autrement eux-mêmes à bon droit mériteront le nō de tyrans. Et pour clorre ce discours en vn mot, la pieté cōmande qu'on maintienne la Loy & l'Eglise de Dieu: la iustice veut qu'on lie les mains aux tyrâs ruineurs du droit & de toute bōne police: la charité requiert que lō tende la main & qu'on releue ceux qui sont accablez. Ceux qui ne tiennent conte de telles choses, veulent chasser la pieté, la iustice, & la charité, voire les abolir tellement qu'il n'en soit plus parlé au monde.

F I N.

Corrigez ainsi les fautes.

Page 16. li. 9. tout. Dauâtage lisez tout: dauâtage. 43. 11. s'il obeit l. s'il faut obeir. 48. 2. aux l. les. 53. 9. debtes l. débiteur. 67. 20. posez l. pe-
sez. 84. 14. ceux est l. ceux. la est & 15. à ceux l. à ceux-ci 85. 15. & 86.
16. Ehu. l. Ehu. 94. 14. ne face mal. l. fera mal. 102. 18. puisse l. peur.
103. 28. peuple au l. peuple, ce. 120. 17. Liegeons l. Liegeois. 133. 7.
Archa l. Archz & 19. promesse l. prouesse. 138. 19. l'homme compo-
sé l. l'homme est cōposé. 140. 2. lien l. lien. 142. 2. considerer l. con-
seruer. & 30. temps les l. tēps apres les. 144. 17. viuroit l. viuoit. 146.
9. femme l. faute. 149. 9. qui l. qu'il & 19. Athanas l. Athamas. 150. 31.
s'efforce l. s'offre. 153. 26. son l. leur. 160. 1. n'eut l. n'ont. en la mesme
pag. l. 16. rayez ces mots, Mais c'est vne chose, iusques à Nous lu-
uōs. lig. 20. don l. dire. 166. 9. Arnallatus l. Armillatus. 171. 14. renou-
uelee l. renouvellee l'an mil cinq cens soixante six. 174. 30. Cweia l.
Cucia. 186. 26. decerneyent l. decerneront. 196. 16. habile l. habillé.
198. 22. les l. leurs. 201. 17. n'ont l. n'a. 209. 6. ou vn l. ou à vn. 212. 24.
nations l. Royaumes. 216. 47. facent l. font.







